

弘一大師書簡

懺雲









弘一 晚晴 大師 道人 影



老實念佛

歲次鵝尾大華嚴寺沙門玄會

寶墨師大一弘



# 序

弘一大師入滅後。福建永春李芳遠君輯師書牘若干通。寄稿至滬。囑爲刊行。顧所收不多。未足成集。年來多方徵求搜羅。益以己所舊藏。其量已遠倍於李君所輯。世方多難。散失堪虞。因排百難而使之成書。斯編所收。皆師出家後所作。師爲一代僧寶。梵行卓絕。以身體道。不爲戲論。書簡即其生活之實錄。舉凡師之風格及待人接物之狀況。可於此髣髴得之。故有見必錄。雖事涉瑣屑者。亦不忍割愛焉。師別署甚多。五十以後。喜用晚晴稱號。常自署曰晚晴院沙門。或晚晴老人。顏其白馬湖之精舍曰晚晴山房。亂後鄉村不寧。山房無人居守。門窗磚瓦被盜盡。聞將成廢墟矣。斯編名曰晚晴山房書簡。不特從師夙好。亦將藉以爲勝跡留一紀念也。編中書簡。除余所藏者外。來自各方。助爲繕寫者。同事豐君滄祥。郭沈君澄。朱君子如。及門寶德。清宗性。姊弟。付刊者。同事徐君調孚。校對者。同事周君振甫。例得備書。以誌功德。中華民國三十三年中秋夏。丐尊識於上海寓舍師之畫像前。

# 目次

與堵申甫居士十四通	一	與陳无我居士三通	五四	與寂山法師	一一一
與蔡子民居士等	五	與陳海量居士三通	五五	與性願法師五通	一一一
與姚石子居士	六	與劉質平居士	五六	與廣空性常法師	一一四
與王心湛居士	一	與龔勝信居士	五六	與性常法師四十通	一一四
與許晦廬居士二通	一二	與沈彬翰居士	五六	與弘傘法師	一二三
與鄧寒香居士二通	一三	與劉光華居士	五七	與妙蓮法師五通	一二四
與俗宗兄紹蓮居士	一六	與豐子愷居士二通	五七	與傳貫法師八通	一二五
與李圓淨居士十二通	一六	與李芳遠居士四十通	五八	與豐德律師四通	一二七
與蔣竹莊居士	二三	與旋勝慈居士三通	六七	與念西豐德律師	一二九
與黃幼希居士	二四	與楊勝南居士	六九	與仁開法師	一三〇
與聶雲臺居士	二五	與王正邦居士	七一	與律華法師	一三一
與趙柏頤居士	二六	與慈航居士六通	七一	與芝峯法師五通	一三一
與蔡巧因居士四十通	二七	與健魂居士	七三	與慧律法師	一三四
與葉青眼居士	四二	與伯衡居士	七四	與如影法師三通	一三四
與朱穌典居士四通	四三	與拯邦居士	七四	與妙慧法師二通	一三五
與高勝進居士四通	四四	與一乘居士	七四	與廣心法師等	一三六
與崔樹萍居士二通	四五	與詞源居士	七五	與廣洽法師	一三六
與郁智朗居士十通	四六	與勝順居士	七五	與東華法師三通	一三六
與呂伯攸居士	五二	與春發居士	七五	與妙齋法師二通	一三七
與黃善登居士	五二	與宏智女居士等	七五	與曇昕法師三通	一三八
與繆滌源居士	五三	與俗姪晉章居士六通	七六	與覺徹法師三通	一三九
與穆憊蓮居士	五三	與夏丐尊居士九十四通	七七	與覺圓法師八通	一四〇



可多居古道序  
惠書函志 拙書附郵奉  
又方集以加集四冊以供法主宗  
惠施修書。悉收到其中空目  
錄已寄來。倘以前款太多數  
諸購戒律。餘者請他種  
佛書。并購俗典近十圓。隨  
以附回。不宣。

在重慶前

演



勾子居士 文席 今曰己未年  
 今歲樹多寓字法緣 便中  
 惠施廿金以備賄 合上之申 及基  
 記需用 捐書一印 附奉  
 事心覽 不宣

己卯元月某晨

後言

啟



近奉身禮教前強健  
 神願主老慈了 必念 謝 聞  
 之力更健 十幾少年  
 盡力 且力 皆信 但精





# 晚晴山房書簡第一輯

釋演音 弘一

## 與堵申甫居士十四通

申甫居士慧鑒。尊邑救國會前寄捐冊一本。已存在伏龍寺書架中。今彼會來函謂急欲結束。此捐冊一時不能取回。乞仁者擔保。即作爲遺失。俟將來往伏龍寺時。即將此空捐冊焚化可也。又於彼會擬認捐大洋壹圓。聊表微意。此款亦乞仁者代出惠施。即交彼會爲感。謹懇不宣。弘一啓。其一

申甫居士曩承惠桂圓。新春返法界寺。乃獲收領。深感深感。曾復明信至尊寓。想已達到。胡子宅梵品學兼優。余所佩仰。今欲在鄉辦慈善事。余亦爲贊成人。乞仁者向邑紳爲之介紹。請其輔助。俾期有成。至用感荷。順頌檀德。演音疏。其二

昨晤馬居士。說及墓誌銘事。欣然許諾。不勝扑躍。仁者近日有暇。希先至馬居士宅陳述謝忱。事略能早日集錄。一併帶去尤善。申甫居士丈室。四月十日。曇昉白。其三

申父居士曩承枉臨金仙。未獲晤談。至憾。毛居士昨夕已來。今午歸去。彼嚮道之念甚切。至用忻慰。謹復順頌道福。音啓。其四

惠書敬悉。近日勞倦。尚未加墨。仁者暇時。希枉談。申父居士丈室。三月廿三日。勝髻疏。其五

申甫居士。惠書忻悉。一一。小碑擬俟明年春暖時動筆。先勿寄下。俟明春居住處定後。再以函示也。拙輯書「華嚴經集聯」。已由開明書店出版。倘仁者未獲披閱。乞致函丐尊居士。即可寄奉也。謹復。不宣。音啓。其六

申甫居士慧鑒。前奉一片。計達記室。朽人擬於秋間返溫州。惟舟車之資。猶未籌措。未審仁者能有資助否。惠函乞寄杭州城內延定巷六號馬一浮居士轉交朽人。至妥。此頌檀福。勝髻疏。五月廿日。其七

申父居士丈室。馬居士來。齋授尊簡。并惠施三十金。敬受。感謝無盡。擬以是中十金供瑣細之需。其餘二十金存貯。以爲行旅舟車等用。佛號當絡續寄上。本月中旬約可先寄奉二十葉內外。謹復。順頌檀德。勝髻疏。六月一日。其八

久別深念。朽人現居常寂光寺。方便掩室。不出外。不見客。唯須請一人爲之護法。每月來此一二次。代爲購辦諸物料瑣事。尊寓距此匪遙。來往殊便。擬請仁者負任此事。未審可否。至於朽人平日所用之錢物。已有他人資助。可以足用。希仁者勿念。上記之事。乞斟酌先示復。寄常寂光寺。稍遲數日。再致函定期。延請惠臨。此未委具。申父居士丈室。月臂疏。正月望日。其九

惠書敬悉。有暇希枉談。不拘日時。若來寺中。告以朽人函請來談之意。即可導入禪室也。先一二日乞訪。



延定馬居士別寫二紙請轉交。有佛書信札等。悉乞帶來。常寂光在城隍山背脚四宜亭旁。由清波門上山之通衢也。遲面盡。不宜申。父居士丈室。正月廿四日。勝髻答白。其十

昨承枉談。至用忻慰。裝訂華嚴經事。今詳細思維。如不重切者。則裝訂之時亦甚困難。因此經共二十七冊。原來刀切偏斜者。以前數冊爲甚。以後漸漸端正。至後數冊。大致不差。故裝訂時。裁翦書面。即書皮子及襯紙。每冊前後之白紙。須逐冊比量。甚爲費事。又此書原來刀切偏斜之處。朽人曾詳細審視。非是直線。乃是曲線。下方向上而曲。上方亦向上而曲。此等之處。如裝訂時。欲使書面及前後之襯紙。一一與原書之形吻合。非用剪刀翦之不可。若以刀裁。即成直線。與原書之形未能合也。以是之故。此書若不重切。則裝訂之時極爲困難。且不容易得美滿之結果。今思有二種辦法。其一。爲冒險重切。其二。則不重切。即將書舊有之書皮翻轉。裱貼黃紙一層。俟乾時。用剪刀依舊書皮之大小翦之。其曲線處仍其舊式。即以此裝訂。但冊數之先後次序。不可紊亂。（例如第一冊之書皮。仍訂入第一冊等。）因此書全部前後樣式稍參差也。至於前後襯入之白紙。則只可省去。因此白紙。若一一翦成曲線之形。極爲不易。必致參差不齊也。若依第一種辦法。冒險重切者。則仍每冊前後襯白紙四頁。若冒險重切者。訂書處如不能切。或向昭慶經房。請彼處切之如何。原書即係昭慶經房自切者。諸乞仁者酌之。再者。作云籤條黑邊外。留白紙約二分者。指另印夾宣紙之籤條而言。若橘黃色之籤。因外襯白紙固不須太闊也。叨在舊友。又以裝訂經典爲勝上之功德。故瑣縷陳諸仁者。不

厭繁細。諸希鑒諒至幸。新昌榜字宜以佛經句爲宜。乞商之。此未宣具。申父居士丈室。二月五日。勝臂疏。  
其十一

惠書欣悉一一。馬居士久無消息。今書佛號二葉小橫幅十八葉并佛書二冊別挂號郵奉乞受收。天寒手僵艸艸不工聊爲紀念可耳。不久將雲游遠方乞暫勿惠覆。明歲或至杭州再當晤談。承詢所需至用感謝。現在旅資已具可以無慮。謹答不悉宣。申父居士演音疏。十一月廿日。數年前將出家時曾以陰文圖二冊其書名已忘記係費小樓畫刻板甚精。奉贈仁者。倘此書現在仍存尊處乞暫假一冊寄上海狄思威路永興里底第一號李圓淨居士收能挂號尤妥。因上海諸居士願石印此書廣爲流布也。附白。其  
十一

屹山大士左右。頃承惠書忻慰無似。不慧將於下月初七日舊曆之嘉禾寓精嚴寺藏經閣究心毘尼。仁者近日嘗瀏覽教典否。出家在家原無二致行持不退當來皆可成佛。萬望仁者精進努力依教起修將來有緣必可晤面不一致訊寄嘉興北門外月河商業學校范古農居士轉送最妥。釋演音和南。九月廿八日。其十三

來談歡慰尊名併佛號寫致慧覽過去云云與仁者畏寒者與更三大寶積者與敬廬既晤仁者翌朝入城見開元寺主於浙一館。朽人三月未入城三年未至浙一館今適相值亦勝緣也。請撰募捐疏已慨諾



之矣。拙書爾來意在晉唐，無復六朝習氣，一浮甚讚許。此未委悉。冷菴居士丈室。曇昉疏。九月一日。其十四

## 與蔡子民居士等

舊師子民舊友子淵彝初少卿鍾華諸居士同鑒。昨有友人來，謂仁等已至杭州，建設一切，至爲歡慰。又聞子師等在青年會演說，對於出家僧衆，有未能滿意之處。鄙意以爲現代出家僧衆，誠屬良莠不齊。但仁等於出家人中之情形，恐有隔膜。將來整頓之時，或未能一一允當。鄙意擬請仁等另請僧衆二人爲委員，專任整頓僧衆之事。凡一切規畫，皆與仁等商酌而行，似較妥善。此委員二人，據鄙意，願推薦太虛法師及弘傘法師任之。此二人，皆英年有爲，膽識過人，前年曾往日本考察一切，富於新思想，久有改革僧制之弘願。故任彼二人爲委員，最爲適當也。至將來如何辦法，統乞仁等與彼協商。對於服務社會之一派，應如何盡力提倡。此是新派。對於山林辦道之一派，應如何盡力保護。此是舊派。但此派必不可廢。對於既不能服務社會，又不能辦道山林之一流僧衆，應如何處置。對於應赴一派，即專作經懺者，應如何嚴加取締。對於子孫之寺院，即出家剃髮之處，應如何處置。對於受戒之時，應如何嚴加限制。如是等種種問題，皆乞仁者仔細斟酌，妥爲辦理。俾佛門興盛，佛法昌明，則幸甚矣。此事先由浙江一省辦起，然後遍及全國。弘傘法師現住裏西湖新新旅館隔壁招賢寺內。太虛法師現住上海。其住址問弘傘法師便知。謹陳

拙見。諸乞垂察，不具。弘一。三月十七日。昨聞友人述及仁者五人現任委員，此外尚有數人，或係舊友，亦未可知。并乞代爲致候。

## 與姚石子居士

省書，承仁歸信佛法，至可贊意。輒依鄙見，擇定應用經書若干種，錄之如下。

印光法師文鈔 法師今居普陀，昔爲名儒。出家已二十餘年，爲當世第一高僧。品格高潔嚴厲，爲余所最服膺者。文鈔之首，有余題辭。又新版排印安士全書爲上海佛學推行社所印送。仁如無此書，請致函索取。第二本末頁，附錄余撰定閱印光文鈔次序表。依此次序閱覽，但表中所記一圈者及無圈者，可暫緩閱。自無扞格不通之虞。請先閱文鈔第一冊論第十六頁佛教以孝爲本論，又第二冊書一第三十四後頁以下與衛錦洲居士書，及覆泰順林介生居士書一，三首。因此三首，與仁者近處之境，關係最切。

靈峯宗論 爲明靈峯藕益大師文集。近古高僧中知見最正者。先閱此種，自不致爲他派之邪說所淆惑。集中文字，深淺互見。凡淨宗禪宗及天台賢首慈恩密宗等，皆具說之。非專談一法也。可先閱法語及書信二類。但初學者亦不能盡解，當於閱時自擇其所解者先閱，其難解者不妨暫緩。集中文字，篇幅不長，各爲起止，不妨跳躍閱覽。初閱佛書者，必不能一一盡解。但漸漸修習，其不解者亦可通曉。萬不可急求速效。又集中卷四之二



第四頁孝聞說，卷六之一第十一頁廣孝序，卷七之四第三頁建孟蘭盆會疏，可先檢閱之。

釋門眞孝錄 專輯佛祖經書中論孝親事者。

竹窗三筆 山房雜錄 雲棲遺稿 皆筆記之類，可以隨時擇閱數則。

選佛譜 選佛圖 如世間陞官圖之式，常常習擲，自能通達佛法門徑。譜爲說明者，此作利益甚大。且饒興味。婦孺尤宜勸其常常擲之，以種善根。

佛教初學課本 釋教三字經 皆記佛法之大綱，甚爲簡要。

釋迦如來應化事蹟 爲釋迦之歷史，附有圖甚精。

安士全書 揚州舊有木版二套。近由上海佛學推行社勸募印送，已得四萬餘部。是書宜雅宜俗，人謂救世寶典。良不虛也。

佛學撮要 佛學初階 佛學起信編 佛學指南 六道輪迴錄 學佛實驗談 皆丁福保編。極淺近，且有

興味。凡有不信佛法者，可勸其先閱此類。

南無阿彌陀佛解等三種 爲學佛者最切近之書，內有余之字蹟數幅。

佛學問答 略示佛法之大要。

新版淨土四經 可備讀誦。

彌陀經疏鈔擷 爲解釋阿彌陀經最淺近之書。

觀經圖頌 爲觀無量壽佛圖。

龍舒淨土文 淨土晨鐘 徑中徑又徑微義 此三種皆勸人修淨業之作，最詳明切要。

歸元鏡 依淨宗三祖之傳記撰成戲曲之本，最有興味。

往生集 淨宗往生者之傳記。

以上八種爲淨宗入門之書。淨宗者爲佛教諸宗之一，卽念佛求生西方之法門也。此宗現在最盛，以其廣大普徧，並利三根。印光法師現在專弘此宗。余亦歸信是宗。甚盼仁者亦以此自利利他也。他如禪宗及天台賢首慈恩諸宗，皆不甚逗現今之時機。禪宗尤爲不宜。以禪宗專被上上利根。當世殊無此種根器。其所謂學禪宗者，大率誤入岐途，可痛慨也。

極樂莊嚴圖 西方接引圖 皆阿彌陀佛等像。

釋迦佛坐像

地藏菩薩像

此四種皆佛菩薩像，宜懸掛供養。但阿彌陀佛像二種中，擇掛一種。

地藏菩薩本願經 可備讀誦。



以上所記之經目，爲初學佛法，人事紛繁，未能專力修習者，所應用之書。一以其冊數無多，一以其篇章多，不前後承續，可以暇時隨意閱一二葉，不必從頭至尾用意研味也。若再進一步修習，下記數種，可以請閱。

諸經要集 分類輯錄諸經中之要義。但多屬事相，不難了解。

念佛警策 擇錄淨宗諸家之語錄，甚精要。

徹悟語錄 與梵室偶談合刊。偶談即靈峯宗論中之一種，大半勸修淨業之語，事理圓明。

淨土十要 印光法師盛讚此書，但多未宜初學。若初學者，可先閱是中十疑論淨土或問念佛直指三種。此外則隨分隨力斟酌閱之。

無量壽經義疏 觀經四帖疏 阿彌陀經義疏 行願品疏節錄 皆前列淨土四經之注疏。可先閱四帖疏上品上生章之疏文，續閱阿彌陀經義疏，然後再閱其他。

佛說無常經 爲印度僧衆常諷誦者。卷首余有序文。

在家律要 既修淨業，宜兼持戒律，可先閱此書，較易了解。

閱藏知津 爲藏經目錄提要。

佛學大辭典 搜輯甚富。可備隨時檢查。

因是子靜坐法續編 常州蔣維喬著。前年著正篇，多依道教。今著續篇，純依佛教，補救前愆。若有願習靜坐者，可閱此書。但專念佛者，不習靜坐無妨。又有蒙同善社之誘惑，誤入岐路者，宜速勸其閱此書以糾正之。

佛法廣大，如天普覆，無有世出世間一法能出其外者。故儒道回耶諸法，亦可云屬佛法毫髮之少分，但不如佛法之究竟耳。是以比年以來，吾國佛法昌盛，有一日千里之勢。士夫學者，究心於斯者尤衆。隨其根器之上下，各隨分獲其利益。譬猶一雨之潤，萬卉並育。噫偉矣哉！仁者爲親誦經，謹爲擬定日課如下。誦阿彌陀佛經一徧，往生咒三徧，念南無阿彌陀佛最少一百八句，後誦迴向文三徧。迴向文代擬如下。「願以此功德，迴回亡母高太恭人。若爲亡父或他人若隨改。惟願亡母業障速滅，早生西方極樂世界，見佛授記，普度衆生，盡未來際。並願法界有情，同圓種智。」此課約在四十分鐘以內。若念佛多者，則時間亦增多，可隨力爲之。又地藏菩薩本願經，亦宜諷誦。若人事紛繁，每日可僅誦一品，約三十分鐘以內。若稍暇，每日可誦一卷。合數日誦完一部。每日誦畢，亦誦迴向文三徧，文同上。若更願誦他種經者，如淨土四經中之他三種，皆可誦，繼誦迴向文亦然。如不能常茹素，每晨粥時可茹素一餐，名曰吃早素。仁者可以是以廣勸他人。此事甚不爲難，常人皆可行之，亦可種善因也。又不宜買活物在家中殺戮，若需食者，可買市上已殺之物。如是雖食葷腥，亦可減輕許多罪過。若發心茹素者，可先每月二天，即十五日及三十日。或月小則二十九日。若再增加每月四天，則增加初八及二十三之兩天。若再增加，每月六天，即增加十



四及二十九或月小則二十八日之兩天。於每月六日齋日茹素，功德最大，具如佛經廣明。附寄舊書佛三身讚等三種一冊，敬以奉贈。如願付印，卷尾空白之處，可自加題跋。又書佛號一幅，願以此功德迴向令亡母又舊書菩薩名號一幅，署款奉呈。又寄蓮池戒殺放生文一冊，印造經像文五冊，余定其綱要，屬尤惜陰撰述者。戒殺放生招貼三紙，統係收入。又石印拙書數種，請轉贈吹萬居士。余於二三年來，發願未寫之經典，尚有十數種。秋涼之後，將繼續書寫。仁如需用，俟寫就當以奉贈。率復不具。僧胤疏答石子居士禮席。

## 與王心湛居士

損書承悉一一。小印倉卒鐫就，附郵奉覽。刻具久已拋棄，假鐵錐爲之。石質柔脆，若佩帶者，宜以棉圍襯，否則印文不久將磨滅矣。朽人於當代善知識中，最服膺者，惟印光法師。前年曾致書陳情，願廁弟子之列。法師未許。去歲阿彌陀佛誕，於佛前燃臂香，乞三寶慈力加被。復上書陳請，師又遜謝。逮及歲晚，乃再竭誠哀懇。方承慈悲攝受，歡喜慶幸，得未曾有矣。法師之本，吾人寧可測度。且約迹論，永嘉周孟由嘗云：法雨老人稟善導專修之旨，闡永明料簡之微。中正似蓮池，善巧如雲谷。憲章靈峯，明滿益大師，步武資福。清澈悟禪師。弘揚淨土，密護諸宗。明昌佛法，潛挽世風。折攝皆具慈悲，語默無非教化。二百年來，一人而

已。誠不刊之定論也。孟由又屬朽人當來探詢法師生平事蹟，撰述傳文，以示後世。亦已承諾。他年參禮普陀時，必期成就此願也。率以裁復，未能悉宣。二月四日，曇昉疏答。閱淨土十要，宜先閱念佛直指，淨土法語，淨土或問，淨土十疑論。復閱西方合論。又閱無生論，參觀親聞記。最後閱彌陀要解，參觀便蒙鈔。

## 與許晦廬居士二通

承示印稿，至佳。刀尾扁尖而平齊，若椎狀者，爲朽人自意所創。錐形之刀，僅能刻白文，如以鐵筆寫字也。扁尖形之刀，可刻朱文，終不免琢之痕，不若以椎形刀刻白文，能得自然之天趣也。此爲朽人之創論，未審當否耶。李鄭二君之單條附掛號郵奉，乞收之。仁者暇時，乞爲刻長形印數方，因常須用此形之印，以調和補救所寫之字幅也。朽人於寫字時，皆依西洋畫圖案之原則，竭力配置調和，全紙面之形狀。於常人所注意之字畫筆法筆力結構神韻，乃至某碑某帖某派，皆一致屏除，決不用心揣摩。故朽人所寫之字，應作一張圖案畫觀之，則可矣。不惟寫字，刻印亦然。仁者若能於圖案研究明了，所刻之印必大有進步。因印文之章法布置，能十分合宜也。又無論寫字刻印等亦然，皆足以表示作者之性格。朽人之字，所示者平淡恬靜，沖逸之致也。其一

晦廬居士文席。惠書誦悉。諸荷護念，感謝無已。朽人鬚染已來二十餘年，於文藝不復措意。世典亦云士



先器識而後文藝，況乎出家離俗之侶。朽人昔嘗誠人云，應使文藝以人傳，不可人以文藝傳。即此義也。承刊三印，古穆可喜，至用感謝篆額。二紙率爾寫奉。十四五歲時常學篆書，弱冠以後，茲事遂廢。今老矣，信手揮寫，不復有相可得，寧計其工拙耶。數日後掩室習靜，謝絕訪問。數月之後，乃可與諸友通問。其敏居士乞代致候，不宣。音啓。其三

## 與鄧寒香居士二通

數日前得本月初五日書，即復一片，郵寄西門。想不得達。頃乃獲誦六月抄書，欣悉一一。所論甚是，至可感佩。大乘之人，須發菩提心。心佛衆生三無差別。依是自利利他，直至成佛，圓滿菩提，乃可謂大乘人。至發心之後，處衆處獨，皆無不可。天目中峯和尚語錄中，曾詳言之。錄其文如下。或問古人得旨之後，或孤峯獨宿，或垂手入廬，或兼擅化權，或單提正令，或子籌盈室，或不遇一人，或泯絕無聞，或聲喧宇宙，或親嬰世難，或身染沈疴，雖同少室之門，而各蹈世間之路者，何也。幻曰：言乎同者，同悟達磨直指之眞實自心也。言乎異者，異於各稟三世之幻緣業也。以報觀之，非樂寂而孤峯獨宿也，非愛鬧而入廬垂手也。擅化權而非涉異也，提正令而非專門也。雖弟子滿門，非苟合也，雖形影相弔，非絕物也。其畢世無聞，非尙隱也。其聲喧宇宙，非構顯也。至若榮枯禍福，一本乎報緣。以金剛正眼視之，特不翅飛埃過目耳，安能動其

愛憎取捨之念哉。所以龍門謂報緣虛幻，豈可強爲演祖謂萬般存此道，一味信前緣。苟不有至理鑒之，則不能無惑於世相之浮沈也。華嚴普賢行願品卷二十二善財童子，參德生童子，有德童女，問菩薩云：何學菩薩行，修菩薩道。童子童女乃廣讚親近善知識之利益。善財童子又問：云何能諸善知識法之中，速得圓滿，速得清淨，得不退失。答須持菩薩戒及別解脫戒。若圓滿頭陀功德，能使二戒悉得清淨，不失善法。繼乃廣讚十二頭陀之行。其圓滿阿蘭若一段，請仁者檢閱之。夫位近等覺，尙須樂於獨處，住阿蘭若。何可謂山居辦道者，爲小乘人。近來屢聞世人有此謬論，可痛慨也。至語小乘之人，決不說法利他者，亦非通論。小乘律本關揀別方說法，有十條。揀別如法不如法，又佛稱弟子聲聞衆中，能教化有情，令得聖果者，推迦留陀夷第一。律中具載彼度生之事，有十三事。此外關於說法度生之事，小乘律中屢屢見之。比丘每日須入城市乞食。施者如請說法，隨緣教化。茲不具引。小乘所以異於大乘者，在發心趣偏眞之涅槃耳。豈有他哉。永嘉禪師謂上乘之人，行上而修中下。二乘何咎而欲不修。寧知見愛尙存，去上乘而甚遠。三愛之狀固然，稱位乃儔菩薩。大乘之不修，而復譏於小學。以上摘錄原文。在永嘉集第七章。又萬善同歸集亦引此文。吾人既歸信佛法，皆應發大乘心，而隨分隨力專學大乘。或兼學三乘，皆無不可。不必執定己之所修爲是，而強人必從。以根器各異，緣業不同，萬難強令一致也。其一

前日獲手書，迴環披誦，至爲欣慰。承詢我執之義略述如下。



二執

法我

執

界內  
分段生死  
界外  
變易生死

見思  
塵沙  
無明

惑

藏初果通見地別初住圓初信  
藏四果通已辦別七住圓七信

斷盡

所謂我執者，即圓覺所云，妄認四太爲自身相，六塵緣影爲自心相是也。識論卷一。言之甚詳。請披尋唯識心要卷一第十七頁至廿八頁止。廿八頁中靈峯述辭，至爲精確幸詳味之。又依大乘止觀中所云，若斷我執，須分別性中，止行成就。請檢大乘心觀釋要卷五第五六七頁閱之。而占察義疏卷六第十七十八頁靈峯疏文，即依大乘止觀會合。希彼此互參研尋，最易了解。此外如靈峯宗說第二冊中，亦常常言之。並望披覽。竊謂吾人辦道，能伏我執，已甚不易，何況斷除。故蓮池大師云，當今之世，未有能證初果者。夫初果，僅能斷見惑，已不可得，遑論其他。徹悟禪師云，但斷見惑，如斷四十里流，況思惑乎。故豎出三界，甚難甚難。若持名念佛，橫出三界，校之豎出者，不亦省力乎。藕益大師亦云，無始妄認有己，何嘗實有己哉。或未頓悟，亦不必作意求悟。但專戒淨戒，求生淨土，功深力到，現前當來，必悟無己之體。悟無己，即見佛，即成佛矣。又云，倘不能真心信入，亦不必別起疑情。更不必錯了承當。只深信持戒念佛自然薰地信去。由是觀之，吾人專修淨業者，不必如彼禪教中人，專恃己力，作意求破我執。若一心念佛獲證三昧，我執自爾消除。較彼禪教中人專恃己力豎出三界者，其難易奚啻天淵耶。若現身三昧未成，生品不高，當來見

佛聞法時見惑即斷。但得見彌陀。何愁不開悟。無量壽經四十八願中有云。設我得佛。國中天人若起想念貪計身者。不取正覺。誠言如此。所宜深信。但衆生根器不一。有宜一門深入者。有應兼修他行者。所宜各自量度。未可妄效他人。隨分隨力。因病下藥。庶乎其不差耳。余比來久疏教典。未暇一一檢尋詳委奉答。姑即所見略述如是。其二

## 與俗宗兄紹蓮居士

歲云暮矣。積陰凝寒。言念仁者。渺在天末。靡由省展。惆悵何如。歲月不居。衰老寢至。兒時知交。大半零落。墓門青草。巷口斜陽。人事無常。愴焉興悲。惟有仁者。時相諏問。輒深舊雨之想。尋懷朝露之懷。余與仁交。垂三十年。相知以心。親逾骨肉。入山以來。時且馳想。爲憶仁者。滯情塵網。匪假如來慈力。寧脫忍域苦輪。念佛一門。誠爲津要矣。曩郵印光法師文鈔。當達丈室。幸以清暇。研味其趣。或有未達。毋遺下問。願窮凡智。以酬來旨。附齋佛典一函。希垂省覽。以自督勵。流光邁馳。瞬息來世。幸宜及時努力。毋致當來憂悔。略寫誠款。豈復委宣。

## 與李圓淨居士 十二通

地藏菩薩本迹靈感錄已達五版，至用歡慰。地藏十輪經序品一卷，載讚歎感應之文甚多，乞仁者暇時披閱此經。金陵版大集地藏十輪經最善序品以後，亦乞詳閱之。當獲益甚大。又占察善惡業報經，金陵版經并疏亦地藏菩薩所說。惟此經說修唯識真如觀法，不能通俗耳。連本願經，共三種世稱為地藏三經。又金剛三昧經最後一品，金陵版亦地藏菩薩所說。擇其通俗易解者，演為淺顯之文及表記，則彌善矣。他經多稱為地藏菩薩，唯有大乘本生心地觀經稱為地藏王菩薩。以上諸經之外，他經中載地藏菩薩之名者，如華嚴入法界品四種譯本，晉譯六十卷內，唐譯八十卷內，西秦別譯此品名佛說羅摩伽經。唐貞元別譯此品名尊賢行願品，皆載地藏菩薩之名。但西秦譯曰持地藏菩薩，晉譯曰大地藏菩薩。貞元別譯華嚴十地經，及佛說八大菩薩經等，皆有地藏菩薩之名。此外，又有百千頌大集經地藏菩薩請問法身讚一卷，又秘密部亦有載地藏菩薩者，茲不具錄。朽人受菩薩慈恩甚深，故據所知，拉雜寫出，以奉慧覽。薄益大師靈峯宗論中，屢有關於地藏菩薩之著作。亦乞仁者披閱之。續藏經中有地藏菩薩發心因緣十王經，此是偽經，不宜流布。問地藏菩薩經中，亦有往生淨土之言否？答：有。今略舉之。秘密部地藏菩薩儀軌云：地藏菩薩說呪已，復說成就法。若念滅罪生善，生身後生極樂，以草護摩，三萬遍。地藏十輪經云：當生淨佛國，導師之所居，乘於無上乘，速得最勝智。又云：當生淨佛土。遠離諸過惡，住彼證菩提，令離諸瞋忿。又云：如是菩薩福德智慧速疾圓滿，不久安住清淨佛國。證得無上正等菩提。又云：速住淨佛國，證得大菩提。占察善惡業報經云：地藏菩薩言，若人欲生他方現在



淨國者。應當隨彼世界佛之名字專意誦念，一心不亂。如是觀察者，決定得生彼佛淨國。善根增長速獲不退。故薄益大師依占察經立懺法，謂欲隨意往生淨佛國土者，應受持修行此懺悔法。懺法中發願文云，捨生他世生在佛前。面奉彌陀，歷侍諸佛。親蒙授記，迴入塵勞。普會羣迷，同歸秘藏。又懺法有四部，一占察懺儀。本名占察行法附義疏後，亦有單行本。武昌印一冊。二梵本地藏懺願儀。揚州版一冊。此二種爲薄益大師作，最善。三地藏懺儀。杭州版一冊。簡單可用。四梵本地藏懺。揚州版三冊。太繁雜。其一圓淨居士道席。閏月十八日惠書，昨始收到。又前寄之科文校稿一紙，亦已收到。朽人處舊存有道光年間所刻華嚴疏鈔玄談一部，已下疏鈔正文亦有余未藏。爲依明末刊本照樣雕刻。原文之功德人名等皆照刻。決無變動。似以原印紙頁貼於木板上而刻者。此中文字，曾與金陵流通本對校，完全相同。故知刪節之事，似在明末，而非清代刻藏者所爲也。又朽人昔曾檢弘教藏中疏鈔別行原本，與今流通會本對校，而補寫其闕略處，已將玄談校寫畢。乃詳細披覽，玄談原本前數卷之鈔文中所列之科文尙能齊全。玄談後數卷中，科文則多缺略，或竟全無。由此可知清涼所撰之鈔文原本中，於科文亦未完全列出。因有別行科文可以對閱，故不須一一列出也。後人或有望於此，因將清涼鈔中前後所存列之科廿亦遂隨意妄加刪削，以減少字數，而省刻板之費用。此舉雖是冒昧不當，但當時或尙有別行科文存在，似無大妨礙也。又彼等刪節科文時，復變本加厲，順便將鈔文刪去甚多。雖所刪者多無關重要，但亦非所應爲也。至清代

刻藏時，別行科文似久已不傳，刻藏者於此刪節本不加詳察，遂即依此照刻。以上所言就朽人所憶記者隨意測度，是否未敢必也。道光年刊玄談存在泉州，不及檢閱，或有忘誤，且俟將來返泉州後，再詳細檢閱奉復也。爾來精神頹唐，憤憤日甚，勿勿復此。倘有文義訛誤處，乞亮之爲幸。不宜。舊八月初八日。演音啓其二

惠書，誦悉。今年在各地泉漳廈惠講經，法緣殊勝，昔所未有。律部參考書，皆存廈門。所擬編之書，完成者二。三種，尚須刪訂者二三種。此外多編輯粗成，尚未錄寫。近來身體如常，精神甚衰。倘天假之年，精神康健，能返廈門時，乃可著手編錄也。略復不宜。音啓其三

承寄戒本彙解，已收到。近詳閱仁者前寄來之徐居士遺札，內有痛斥清朝經手刻藏經者之言，實爲誤會。朽人前已考證清楚，俟將來到泉州時，檢閱諸書，詳陳一切。朽人今年於閩南各地講經演說甚忙，爲昔所無。舊曆三月底，在廈門講經。四月八日到漳州講經。本擬住半月，即返廈門泉州，不意三天後廈門難起，遂至今不能歸去。但亦藉此機會，在漳州城鄉屢次演說講經及重興念佛會等。近講事多忙，不及詳復爲歉。尊撰佛法導論，最爲精湛。余常常勸人讀誦此書，便中乞惠施若干冊，付郵寄下。如有他種之淺近佛書，亦乞附寄下。至感。舊閏七月五日。演音上。其四

圓晉居士澄覽。前復函，想已收到。茲寄上彙解序一紙，表二紙，爲數年前仁者所託寫者。豐居士書一紙。

九月二十日發。又一紙，陽曆十一月九日發，共五紙。豐居士之前書，即作爲畫集續編之序文。此外再乞仁者及夏居士各撰序一首。豐居士之後書，可爲仁者撰序時參考之用。以上豐居士之書，共兩通，前一紙後者五紙。已由朽人允許贈與性常法師。茲先寄至尊處。俟畫集編輯既竟，豐居士之書兩通不需用時，乞逕寄交性常法師收受可也。又朽人之意，皆於豐居士後書中附註。乞裁酌之。護生畫集初集及二集，皆由仁者主編。乞皆收入瑩庵叢書中，以爲永久之紀念。又豐居士發心畫至六集爲止。每十年一集三集之畫七十幅，四集八十幅，五集九十幅，六集百幅。朽人不久即往生西方，此畫集亦不中止並乞仁者隨時督促之。又豐居士於今年三月十六日寄來之信，亦述及此事，附以奉覽。此信即存尊處，乞勿寄還也。謹陳，不宜。端陽後二日。音啓。附奉上華嚴集聯跋二紙。其五。

圓晉居士再覽。仁者致常師書，誦悉一一。承詢之事，其一冊爲行事鈔中一部分之科表，唯錄舊科而已。其一冊爲行事鈔持犯方軌表解之初稿，若欲出版，尙須精校重爲編訂。朽人近來對於自己之著作，不願輕易出版者，（一）因以凡夫情見，僭爲編述者，恐未能契理契機，必須先生西方，迴入娑婆，乃可負荷弘法之重任。（二）因律學專門之撰述，出版之後，無人能讀，難於流通。昔蔚如居士刻南山律書，近百餘卷，除贈送之外，罕聞有人出資請購者。即贈送與人，讀者亦希，僅藏置高閣耳。且如朽人近編之南山律在家備覽略編，因普被在家人故，將來出版之後，慕名而請購者，或尙有一二百人。若真能披讀而



研習了解其義者，或亦僅有仁者及古農幼希數居士耳。近來目疾增劇，抄錄備覽僅及一半，約五十餘頁。尚有一半未抄錄，謹復不具音啓。五月十二日。附一紙，乞於便中交與夏居士爲感。此次書寫備覽稿，頗爲用心。每寫一頁，須一小時以上，乃至兩小時。附呈廢稿十善法一紙。其六

圓晉居士澄覽惠書誦悉。宗體篇已於前日寫竟。自今日起，寫畫集題句。俟寫畢，即將畫集依信札例郵奉。題句決定改爲加邊，與畫之邊相同。並題頁數。外國頁數之數目字，則印刷裝訂時，可以整齊也。宗體篇共計九十頁。中國頁數。俟秋涼久晴時郵奉。謹復，不宜。六月初五日。音啓。其七

圓晉居士鑒。惠書誦悉。諸承關念，至用感慰。朽人近年已來，精力衰頹，時有小疾。編輯之事，僅可量力漸次爲之。若欲圓滿成就其業，必須早生極樂，見佛證果，迴入娑婆，乃能爲也。古德云：去去就來，迴入娑婆，指顧間事耳。南山律在家備覽略編第一冊宗體篇，至今晨已將第二次正稿寫竟。尚須整理增刪，然後再寫第三次正稿。以前預計四五月間，可以將第一冊稿本寄奉。近以目力不佳，精神恍惚，恐須延期至五月以後乃成就也。南山年譜，於數年前已編就，今存鼓浪嶼，僅有數紙。以後擬再編靈芝年譜，材料甚少，亦僅三四紙。將來即附於在家備覽第三冊後也。羯磨講錄久已編就。共二冊或四冊。將來尚擬再爲整理，乃能出版。戒本講錄亦久編就。共二冊或四冊。後半尚可，前半須重編。以上兩種，皆須俟編輯在家備覽畢，乃能著手。吾人修淨土宗者，以往生極樂爲第一標的。其現在所有講經撰述等種種弘法之事，皆在

其次。時節到來，撒手便行。決不以弘法事業未畢，而生絲毫貪戀顧惜之心。朽人以上所云編輯諸事，不過姑作此想。經云，人命在呼吸間，固不能逆料未來之事也。余與仁者友誼甚厚，故敢盡情言之。乞勿以此信示他人。他人見者，或爲驚詫也。聶雲臺居士病狀如何，以後來信時乞便中示及。謹復，不宜。舊三月十八日。音啓。其八

圓淨居士慧覽。朽人今歲世壽六十，即擬掩室習靜。暫未能通信。關於畫集事，第二集乞與夏居士接洽一切。現在紙張人工皆漲價，稍遲出版無妨。但此續集將來必須出版，未可中止。朽人在世，可任書寫。倘生西者，乞託豐居士書寫可也。乞夏居士作序，無須再請馬居士作。音啓。其九

圓淨居士文席。近以友人請住檀林鄉中，結夏安居。故得與仁者特殊通信，發起一重要之事，以護生畫集正續編流布之後，頗能契合俗機。豐居士有續繪三四五六編之弘願。而朽人老病日增，未能久待。擬提前早速編輯成就，以此稿本於上海，俟諸他年陸續付印可也。不宜一。音啓。其十

圓晉居士瑩鑒。茲寄上畫六十張，封面二張，扉頁一張，字六十一張，馬序一張。初集字與邊，皆照原樣製版。倘因字之筆畫太細，不能製鋅版者，乞先影印若干冊，後再依影印者製版可也。因影印者，筆畫皆自然加粗故。每頁下端之數目字，皆連製鋅版。其計數至一百下爲百，一百二等不用百〇一字樣。共計一百廿一頁。外國頁數。畫幅上，偶有木炭起艸稿之影子。攝影製版時，乞除去。其分甲乙丙等，悉依豐居士所標寫者。

見每畫幅後上端鉛筆所寫者有四幅以朱筆標寫者係後寄來之畫由朽人隨宜標寫。畫幅後面·上端朱筆所標之一二三等係畫幅之次序今已無用。其補題詩偈者除學童之名以外大約係豐居士所作隨宜署多名耳。六月十日音啓其十一

圓晉居士文席朽人世壽周甲已過擬自下月中旬始至農曆明年辛巳除夕止掩室靜修須俟壬午元旦乃可與仁等通信也。仁者之地址倘有變動乞於辛巳十二月初旬寫交性常法師於壬午元旦清晨由彼面交朽人可也。謹陳不宜九月三十日音啓。護生畫初集題句附寄上子愷寄畫至尊處乞代轉寄其頁數之字乞託人代寫寫之格式附紙說明致夏豐二居士各一紙乞便中轉交。又與豐居士立幅一紙其十二

## 與蔣竹莊居士

竹莊居士丈室惠書忻悉一一。辱承獎譽惶慚何已。芳遠童子十三歲時即與朽人相識爾後常致訊問頗於朽人有所規導。今歲年十九矣。工詩詞善刻印。識見尤超卓絕俗。生於富貴之家而不沈溺晏安。猶如蓬華不著水矣。爾將親近講座希有以詔而教之。當來所造寧可量耶。拙書一葉附奉瑩覽。謹復不宜。壬午元旦音啓。



## 與黃幼希居士

幼希居士道席，不晤倏已十載。近聞仁者校定華嚴疏鈔，至用歡讚。朽人亦久有此志，但衰老日甚，無能爲力耳。前所校點玄談，亦僅自備披覽，中多訛闕，且未及與大正藏本對校，簡陋殊無足觀，故不寄奉。茲述鄙意數則以備參考。一玄談古會本徐居士疑出自唐代，其文與明藏卽是弘教藏之本。中疏鈔別行本文，不同者甚多。一考「會玄記」之牒疏鈔文處，可以見會玄記所依之本與明藏本不同者甚多，亦可考證明藏本之訛字。一金陵新刊本玄談之圈點句讀，唯依文意之大致。若參考會玄記其句讀應改正者不少。一懸談第四卷以下鈔文中，略去疏科者甚多，此非後人所刪。一會玄記常州新版，訛誤甚多。弘教藏本較善，此記瑕瑜不一，亦有文義幼稚處亦多精義。想其精義，或是摘錄前人之作耳。行願品別行疏鈔，似未經楊居士校訂，即付刻，故其訛誤甚多。今略附錄於後，以備參考。有應作小注，而刊作大字者，有應另行起而與上文連續者。第五冊甚多。訛字及句讀誤處頗多。按此書原係別行疏一卷，圭峯義記六卷及科文一冊。自縉雲移疏注經及削成略抄而古疏科記傳者尠矣。以上據宋行霆重刊古本之跋文，載於日本寧樂刊經史中。傳說此疏一卷併義記六卷，有日本明德二年此土明洪武二十四年之翻刻宋古刊本。今存日本東大寺中。精神頹唐，未能詳陳，僅略書此，以供參考。明春即擬往永春等處，住址未定。仁者收到此函後，暫

勿覆。蔣竹莊居士，乞代致候。十年前，曾在清涼寺同聽華嚴經，想尙憶記否。謹陳不宣。再者，華嚴疏鈔中之鈔文，亦有前後不符，又與別行科文不同處。所謂科文，卽是玄談古會本之前所列者，非是今新刊之全科如金陵刊本懸談卷二十一第十四頁第十行「第二『雙會謂』會通『四法』大小不同」云云。上面有「」者爲依明藏補入之字。案此「第二」二字，與別行科文合。但依前鈔文應作第三，此鈔文金陵本刪去，應在金陵本卷二十一第二頁第九行下續之。乞檢明藏可知。除夕前二日演音啓。

## 與聶雲臺居士

雲臺居士道鑒。惠書誦悉。彎彎新月讚偈，余於十年前聞之，已知其非。嘗勸改用普門品中五言偈句。但以人微言輕，又因積習難改，故未能實行。近聞廈門南普陀寺於數年前已改用偈口書中所載普陀七言四句偈，則勝彎彎新月多多矣。此偈附寫紙尾。余意讚偈應選用經中所載者爲宜，似較別撰者優也。但今世諸僧衆，若令其改唱經偈，恐啞啞不能上口。未若改偈口中四句，是爲彼等放偈口時所常唱者，必能易於改變也。爐香讚，此是供養讚，非讚佛也。始見於蓮池大師所訂課誦中，故知此讚最古。其他皆後世俗僧或腐儒之作，罕有可取者。余自慚德薄，雖久有訂正之意，然無人信受，唯可付之長嘆耳。再者，近來念佛時常用之願生西方淨土中四句，其末句爲不退菩薩爲伴侶，語氣殊未充足。似尙有下文者，且此

四句僅言生西，而無利生之願，亦有未合。余於五六年前曾勸人將第四句改爲普利一切諸含識，用普賢行願品成句，則語氣既能完足，且具利生之願。但至今猶無人承用者，可見習慣難改。而僧衆多奔走營務，亦罕有注意於此者，可長嘆耳。謹復，不宜演音啓。讚觀世音菩薩偈，普陀洛伽常入定，隨緣赴感靡不周，尋聲救苦度羣迷，故號名爲觀自在。載於天寧版錄口第三十七頁

## 與趙柏廩居士

前復露片，想已收到。寫經已就，附掛號郵奉。五六年來，未曾用小楷寫經，故筆墨十分生疎，字體亦有俗者，未能校正，未能工整。乞亮之。前次尊函，即可以仿宋小號鉛字排印，附於經文之後，更加題目壹行。前函文義甚佳。僅受具足戒四字，乞改爲受持五戒。前函附奉，併乞收入。此經宜用攝影石印爲宜。因將來他處可以翻印，廣爲流傳。珂羅版不能翻石印。佛學書局以前所印拙書八種，皆用夾宣紙，摺本布面。資本既巨，而印摺未精，反損美觀。今寫之經，擬以連史紙石印。中國舊式連史甚佳。倘價太昂，可改爲江南連史，中國紙簿面，線訂本。與佛學書局所另印之拙書地藏經見聞利益品，大致相同。價廉品精，最爲相宜。此經如是印好，再以石印本交佛學書局翻印，依彼之所好印之可也。上海石印書局，倘仁者有素識者，固善，否則乞與李圓淨居士商之，彼必能盡力輔助也。李居士寓上海狄思威路口寶安路永興里底，乘



公園靶子場電車，可到狄思威路口，或先與函商亦可。云由余介紹可也。寫經每葉中縫，有——  
——之記號，以便印好摺疊時便利齊整。乞即照樣印之。余約於數日後即往廈門。以後暫勿來信俟往廈門後，再以地址奉聞。質平居士處，亦乞代告此意。柏頤居士慧覽。舊十月十八日。演音疏。

## 與蔡丐因居士四十通

丐因居士慧鑒。惠書并靈峯年譜，悉收到。尊翁墓碣，願爲書寫，希示其文句并尺寸。以後惠書，乞直寄慈谿鳴鶴場五磊寺弘一收。五磊住持者，承觀宗寺諦公法派，道風甚隆。同居者九人，而過午不食者有四人。悉修淨業，并達，不宜音疏答。其一

丐因居士慧覽。承施地藏菩薩經像，昨夕已收到。感謝無盡。後日適值菩薩聖誕，先三日寄到，因緣巧合，誠爲漳城佛法復興之象也。近已請本鄉保長講此經，聽者甚衆。仁者法施功德，曷有極耶。謹復並謝。不宣。閏七月二十八日。演音啓。其二

丐因居士道席。前復二明信片，想悉收到。昨今二日，書寫十件，附郵奉上。自今日始，爲僧衆講律，約至舊四月八日圓滿。其餘諸紙，擬俟講畢再加墨也。是間氣候和暖，桃榴桂菊等一時並開，幾不知其爲何時序矣。謹陳不具。舊元旦夕。演音啓。此函將發，獲奉手書，誦悉一一。承施景印墓碣，甚感。南山律苑學侶約

十五人，乞再寄下十五冊。別所需者，由洽法師函達。附白。舊正月三日。其三

丐因居士道席。惠書誦悉。承寄智論地論并記，悉已收到。晚晴種樹甚好。余爲講律多忙，一時未能返浙。仁等能常居晚晴，爲宜。因空室閉鎖，星朽壞也。少渾已往漳州，未能一晤。附奉近書一葉，希受收。普潤爲依。

余學律者，卽是廣洽法師也。謹復，不備。近得印度 Sultannahammed 公司所製名香折短爲四小枝，附奉上。二月十七日。演音疏。其四

初六日來杭，寓招賢寺。數日已來，與諸師友有時晤談。自廿五日立夏日始，方便掩室，不見賓客。疏鈔二十九冊，印一方乞收入。開示錄三冊，乞仁者受一冊。其二轉貽孫李二居士。疏鈔已閱竟者，便中託妥實之友人由紹來杭之人甚多，故可不須付郵。帶至杭州，送呈招賢寺裏西湖新新旅館旁住持弘傘法師，或弘傘法師出外者，乞交副寺師代收，須掣取收條乃妥。轉交朽人往生論註，尚未由溫州轉到。謹達，不具一一。丐因居士。孫居士乞代致意。附一箋乞交李居士。曇昉疏。三月廿二日。其五

惠書忻悉。一一。講律尙須繼續，今歲未能北上也。楊少渾伍敏行夏龍文徐嘯濤諸居士皆乞代爲致候。便中乞託人向上海棋盤街藝學社，或他處購水彩畫用鉛瓶裝硃紅顏料兩打。計二十四瓶，原名 Vermilion，

德國 Schoenfeld 公司製。或他處亦可以價廉者爲宜。顏料係硃紅色，與他種紅有別也。若託能繪水彩畫者購之尤妥。此物分贈與學律諸師圈點律書，及余自用。乞以惠施。俟購妥後，付郵寄下。依包裹例爲感。丐因居士丈。

室演音疏。其六

惠書誦悉。承慈念甚感。講律未竟，不能返浙。又南閩冬暖夏涼，頗適老病之軀也。朱紅遲到無妨，非急需也。年假時，仁者若歸秀州，乞檢大智度論全部付郵寄下至感。謹復，不宜。丐因居士丈室。演音疏。其七

丐因居士慧鑑。惠書誦悉。感謝無盡。傳言失實，非劫持也。今居法界尚安。近歲疾病，精神大衰，畏寒尤甚。秋涼仍往閩南耳。爾來法緣殊勝。上海佛學書局發願印拙書佛經及屏聯近二十種，廣爲流通。華嚴集聯已將寫就，由劉居士影印。近又發心編輯南山律三大部綱要表記，約六七載，乃可圓滿。順達，不宜。晉疏。舊四月六日。其八

丐因居士。近有韓老居士屬書石佛寺聯，擬請仁者代筆。一下款寫亡言，一下款寫論月。茲將原信並紙奉上。寫就乞即交韓老居士爲感。五磊寺主等發起南山律學院，余已允任課三年。每年七個月。舊曆二月十五日。至九月十五日。餘時他往。明春始業。經費等皆已就緒。自今以後預備功課，甚爲忙碌。半月之後，新曆二十五左右動身。印往溫州過冬。住址未定，俟後奉聞。李居士處亦乞代告此意。謹達，不宜。音啓。十月十二日。其九

丐因居士慧覽。惠書誦悉。厚意慇懃，感謝無盡。拙輯地藏菩薩聖德大觀，不久由上海寄奉。仁者與李居士共一包，希轉分贈爲禱。音在此講比丘律學，法緣甚勝。數日後仍續講，或即在南閩過夏也。學校用教



授法書，乞擇其簡要易解者惠施一部，以備研習教授方法，爲講律之用也。盧居士藏東西洋版佛像書甚多，有日本人編蓮座一部，共三冊，專述佛菩薩像之蓮座種種形式，甚爲美備。仁等未能來此觀覽，至爲憾事耳。不宜。演音疏。三月一日。其十

惠書并疏鈔一冊，前日收到。晤談宜俟五十來紹之時，今未能破例也。一浮居士當代陳說，仁與往訪時，於名刺上自寫弘一介紹數字可耳。疏鈔近二十冊，內有數冊俟後續寄。又他種佛書二十餘冊，於正月初十日前送存友人處，以待仁者託人來領。其寄存之處俟後奉達，今猶未決定也。丐因居士除夕月臂疏，其十一前夕來白馬湖秋暮或遊他方。舊藏華嚴部等章疏甚多，仁者若有清暇研玩，當以寄存尊齋，聊供慧覽。便中裁復不宜。丐因居士舊八月廿九日演音疏。護生畫集再版，已由開明書店印行，較爲精美。前僅寄到四冊，在溫即分罄。此書由他人主持發行，未便再索。仁者如欲一閱，便中向開明一覓之。附白。其十二丐因居士慧覽。惠書承悉一一。厚意慇懃，感愧無已。閩中之行，爲是夙約，未可中止。當來迄浙，必來秀水小住，或久居以答仁者屬望之切也。不宜。演音疏。九月十六日。附奉拙書一束，希仁者自受并以轉施他人。數日後乃付郵。又白。其十三

丐因居士文席。是間近無變化，稍遲或往鄉間，屆時再以奉聞也。茲有懇者，今夏朽人曾以所藏行願品梵文寫本，託佛學書局影印流布。於滬變前，由廣洽法師先後滙上二百元爲附印之資。託高觀如轉交。朽

人在青島時，曾得高居士已返北平書，謂不久即可出版云云。迄今尚無消息，頗爲懸念。一月餘前，致函掛號寄去佛學書局局址在愚園路一五四號膠州路附近沈彬翰居士詢問此事，謂前滙款二百元可以留存書局，惟此書原稿甚爲珍貴，請其寄還。至今已一月餘，無有復音。乞仁者爲致電話，詢沈居士。倘書局已歇業，原稿遺失，則可作罷論。倘原稿仍在者，乞彼送至仁者處，乞仁者暫爲收藏。勿寄廈門，費神至感。演音啓。其十四

丐因居士道席惠書誦悉。題字附奉，乞收入。承寄下叢刊五部，至感。下月初旬尚須往惠安縣講經。惠書仍寄泉州承天寺轉交。不宜演音啓。舊二月十一日。在承天寺講行願品，至昨日圓滿，聽衆甚多，黨部青年乃至基督教徒皆甚歡讚。自明日始，在各處演講五日。後在開元寺講心經三日。又數日後在善堂講華嚴大意三日。附白。其十五

丐因居士道席惠書誦悉。前函未收到，以後若有要事以掛號爲妥。簽題及序文奉上。前月所擬第二三輯編訂法，乃一時之理想。近爲詳思，殊難實行。且將來有種種困難。將來編第二輯時，仍擬某第一次大致相似，先列短篇之經律論，律論或缺譯本，後列此土撰述，凡及藝術等文酌選數種附於其後。第三輯以後，亦爾。如此變通辦法，未知可否，乞與書局主事商之。便中示復爲禱。所寄日本書三部，已收到。謹復，不備。演音疏。六月十九日。其十六

丐因居士道席。惠書誦悉。青島或可無戰事，惟商民甚困苦耳。朽人此次居湛山，前已約定至中秋節止。中秋已前不能食言。他往人將譏爲畏葸。節後如有輪船往滬者甚善。否則須乘火車至浦口，轉滬杭。若有戰事，火車不通，惟有仍居青島耳。承詢所需，至用感謝。俟他日若有需用者，當以奉聞。謹復，不備。七月廿一日。演音啓。其十七

惠書誦悉。厚情至爲感謝。朽人前已決定中秋節乃他往。今若因難離去，將受極大之譏嫌。故雖青島有大戰爭，亦不願退避也。諸乞諒之。不宜音啓。其十八

丐因居士智鑒。惠書誦悉。至用歡慰。朽人近年已來，兩遊閩南各地，并吾浙甬紹溫諸邑，法緣甚盛，堪慰慈念。惟以居處無定，故久未致書問訊耳。去歲夏間，曾立遺囑，願於當來命終之後，所有書籍悉以奉贈於仁者。若他人有欲得一二種以爲紀念者，再向仁處領取。是遺囑當來由夏居士等受收耳。數日後，即返法界寺。秋涼仍往閩南。以後惠書，希寄紹興轉百官。若交民局寄者，乞將百官二字改爲驛亭站。若交郵局寄者，宜用百官二字。橫塘廟鎮壽春堂藥店轉交法界寺弘一收。附郵奉拙書一束，內有五言聯及佛力小額，奉贈仁者。此外乞隨意轉施。謹復，不宜。舊正月十一日。演音疏。前存仁處賢首國師墨蹟一冊，近欲請回供養，乞附郵寄下爲感。又圓覺大疏一部，前在閩時以數月之力圈點，并節錄鈔文，乞仁者檢出，覓暇閱之，當法喜充滿也。附白。其十九



丐因居士慧鑒。惠書具悉。寄存之書，共十三包。其中大部之書，有晉唐譯華嚴經賢首探玄記，此書極精要，大本起僧論疏解彙集等。有木夾板二付，晉譯華嚴用。是等諸書，朽人他日倘有用時，當斟酌取返數種。若命終者，即以此書盡贈與仁者，以志遺念。此外有奉贈結緣之書及零紙等五包，每包上有紙籤寫贈送二字，乞隨意自受，並以轉施他人，共裝入兩大網籃，約重七八十斤，擬託春暉中學楊君數年前在紹興同遊若耶溪者，暫爲收貯。將來覓便，齎奉仁者，未審可否，乞裁酌之。若可行者，希即致函楊君來此領取。朽人十日後即往閩中，衰老日甚，相見無期。惟望仁者自今以後，漸脫塵勞，專心向道，解行雙融，深入玄門，別奉上尊書簡札數紙，以贈銘紹諸子。附包入零紙中。此未宣悉。演音疏。九月七日。其二十

頃誦惠書，忻悉一一。拙述四分律比丘戒相表記，今已石印流布。是書都百餘大頁，費五年之力編輯，并自書寫細楷。是屬出家比丘之戒律，在家人不宜閱覽。但亦擬贈仁者及李居士各一冊，以志紀念。開卷之時，不須研味其文義，唯賞玩其書法，則無過矣。又拙書地藏菩薩本願經見聞利益品，書法較迴向品爲遜，今亦付石印以結善緣。尊宗禹澤居士，未審今居杭何處，希示知。擬以四分律表記二冊及華嚴疏鈔四冊，送存彼處，俾便他日面奉仁者。表記冊太大不便郵寄。若地藏經早日印就，亦并交去。否則他日另寄。尊印迴向品共若干冊，并乞示知。四分律表記共印千冊，由穆居士以七百金左右獨力印成。以五百冊存上海功德林佛經流通處，以三百二十冊存天津佛經流通處，皆係贈送。如有僧衆願研求比丘律者，若居士等願

將此以爲紀念者，皆可託人向上海功德林就近領取。地藏經共印多少，如何分法，今尚未悉。朽人不久將往他方，今移居杭州城內銀洞巷六號虎跑下院暫住，料理未了諸事。惠復乞寄上海紅灣鎮立達學園豐子愷居士轉交，恐朽人不久或去杭也。承詢所需，俟後有需，當以奉聞。敬謝厚意。此未宣具。丐因居士丈室。八月廿五日。勝臂疏答。其二十一

丐因居士道席。惠書誦悉。將來共出幾輯，似未可預定。若無有銷路，主事者厭倦，即出二輯爲止。否則可以續出。每輯之形式不同，未可分類標寫部名。如經論等。此事前曾再四躊躇。以不標爲妥。恐以後發生困難。如第一輯所選者，以短易解，切要有興味，有銷路爲標準。但如此類之佛書實不可多得。故第二輯以下須另編輯。且擬每輯變換面目，以引起讀者之興味也。第二輯擬專收音所輯編者三十種。或舊編者如寒笈集等，此外新編，由一人負責。第三輯擬專收佛教藝術。舊輯華嚴集聯可編入。余可以編輯數種，此外由同人分任。共三十種。所預定者大致如是。第一輯所收者經論雜集之部類略備，第二輯多爲警策身心剷除習氣之作，第三輯爲佛教藝術。以後若續出者，每次變換面目。每兩年出一輯。或全輯總售，或又零冊分售。前定名曰佛學叢書，似範圍太廣大。今擬酌定曰佛籍（典）小叢刊（刻），未知可否。乞裁酌之。定名之後，乞以示知，再書寫簽條及序言奉上也。近自博桑國請到佛像書數十冊，及古版佛書近千冊，多爲希有之珍本。略爲研求，乃知是爲專門之學，未可率爾選擇評論。第一輯第二輯擬不用佛像，將來倘第三輯佛教藝

術出版，可以多列諸像，附以說明也。裴相發菩提心文序第十五行非速行也，應作非迷行也。末頁第七行普願大眾以下應提行另起。又第十三行啓發以下之文宜與上行連續，不可提行。年譜在世之時不可發表。幼年諸事，擬與高文顯君言之。廈門大學心理系學生，與廣洽師至契。去歲仲冬大病，內外症並發，爲生平所未經歷。臥牀近兩月，俗謂九死一生。內症至季冬已愈，外症延至本月乃痊。此次大病，自己甚得利益，稍暇擬記寫之。以後惠書，乞寫廈門南普陀寺養正院廣洽法師轉交弘一。不久擬移居古浪嶼，但信件仍由廣洽法師轉送來。其尋常信件，由彼代復，或退還也。謹復，不宣。法華卷已收到，感謝。四月廿三日。演音疏。其二十二

丐因居士慧鑒。惠書，誦悉。爾來身心疲勞，擬於明日始，在此掩室數月靜養。屬題塔經，俟後興致佳時寫奉。近有講稿一篇，擬列於前二篇後，共三篇。題曰養正院親聞記。能於舊曆己卯明年付印爲宜。明年朽人世壽六十，諸友人共印此書，亦可藉爲紀念也。前寄上之印資數十元，爲養正院師生等所施者，亦乞加入，並將姓名載於卷末。又奉化丁居士亦願施資，附寫介紹箋一紙，將來由仁者致函通知可也。印刷之格式，如去秋晤面時所談。正月十九日。演音啓。養正院師生等施資者姓名，此人名務乞列入卷末，因經手募資人可有交代也。佛教養正院前教導釋廣洽，高勝進。學僧釋盛求，瑞伽，賢範，賢悟，傳深，傳揚，廣根，道香，妙廉，妙皆，廣慎，善琛，傳聲，心鏡，瑞耀，如意，靜淵，離塵，智靜，廣餘，及護法王正邦，陳宗泮，施烏格，曾珠



娟。共助印資□十元。此數目已忘記乞填入。以後通信，乞交與夏丐尊居士便中附寄。因掩關期內，僅收夏居士之信札也。其二十三

頃誦書，并承惠施毫筆四管，謝謝。華嚴經疏科文十卷，未有刻本。日本續藏經第八套第一冊，二冊，有此科文。他日希仁者至戒珠寺檢閱。疏鈔科三者，斯鼎足不可闕一。楊居士刻經疏，每不刻科文，厭其繁瑣，蓋未嘗詳細研審也。鈔中雖略舉科目，然或存或略，意謂讀疏者必對閱科文，故不一具出也。今屏去科文而讀疏鈔，必至茫無頭緒。北京徐居士刻經，悉依楊居士之成規，亦不刻科。所刻南山律宗三大部，爲近百冊之巨箸，亦悉刪其科文。朽人嘗致書苦勸，彼竟固執舊見，未肯變易，可痛慨也。丐因居士丈室。十二月初三日。曇昉白。華嚴經疏鈔爲光緒十年妙空大師於江北刻經處刊刻。妙空爲楊居士之師，故楊居士所刻之經疏，亦多刪其科文，依彼舊例。其二十四

明信誦悉。寫經并佛號三葉，附掛號郵奉，乞收入。其餘之紙，已爲汪居士鳳池寫地藏經見聞利益品。又佛號二葉，贈與扶桑竹內居士，廣結善緣。此經如石印時，乞諄囑石印局員萬不可將原稿污損，須格外留意。其籤條乞仁者書寫，式略如下。〔大方廣佛華嚴經〕十迴向品初迴向章弘一大師手寫□□□題端 〱□□□之處，乞仁

者署姓名。朽人約於十七八日下山返杭，以後惠書，乞寄招賢寺交朽人收。十月十四日月臂白。其二十五曩乞李居士奉上一書，想達慧覽。仁者禮誦華嚴，於明年二月十五日，即釋迦牟尼佛涅槃日始課，最爲適宜。此前有

暇，可以檢查文字之音讀。自是日始課者，紹隆佛種，擔荷大法義也。仁者勉旃。茲郵奉禮誦日課一葉，并懸談八冊，希受收。日課中說明甚簡略，茲補記如下。禮敬之前，應先於佛前焚名香供養，能供花尤善。偈讚所書者，爲舉其一例。所誦之偈讚，可以隨時變易，以己意選擇。華嚴經中偈文，悉可用也。誦華嚴經，用疏鈔本誦亦可。若欲別請覓正本，以杭州昭慶慧空經房之本最善。句讀稍有舛誤脫落，但訛字甚少。毛太紙本價四元八角。

新連史本七元八角。若大字摺本，即俗稱梵本者，價十八元。此本核對尤精。

三歸依亦應延聲唱誦。依此課程行持

約須一小時三十分。初行之時，未能熟悉者，至多亦不逾二小時。每日讀華嚴一卷之外，并可以己意別選數品，深契己機者，作爲常課。常常讀誦，或日日誦，或分數日誦。朽人讀華嚴日課一卷以外，又奉行願品別行一卷爲日課，依此發願，又別寫錄淨行品十行品十迴向品。初迴向及第十迴向章作爲常課。每三四日或四五日輪誦一遍。附記其法，以備參考。尊處或無適宜之佛像，今附郵奉日本名畫華嚴圖三葉，又古畫阿彌陀像三葉，以各一葉奉與仁者供養。如李孫二居士亦發心供養者，乞以其餘轉施與二居士。惟舉置而不供養，則有所未可耳。巧因居士丈室月臂疏。十二月十一日。其二十六

巧因居士慧覽。前復書，計已先達。頃誦二十一日尊函，厚意誠摯，感謝無已。往來之緣未熟，宜俟當來。重勞慈念，深用歉然耳。爾來目力大衰。近書華嚴集聯，體兼行楷，未能工整。昔爲仁者所書華嚴初迴向章，應是此生最精工之作，其後無能爲矣。小遲有書物一籃，奉諸仁者。擬乞楊居士便中齎往。遲遲無妨。希

仁者先爲陳述其意。謹復，不具。爲亡蜂念佛，最善。今之僧衆禮懺者，未能如法，若念佛，則得實益矣。音疏答舊四月八日。其二十七

丐因居士慧鑒。昨惠書，并華嚴疏鈔，歡慰無盡。是書爲亡友嘉興陸无病醫士舊藏者。士精通義解，勤修淨業，命終之時，正念現前，念佛而逝。前年嗣子以是惠施於余。卷頭標寫品名卷數，是其遺墨，彌可珍貴。謹復，并致謝意。十月初八日。演音疏。其二十八

丐因居士澄覽。徙居永春深山中，已近半載。衰老日甚，唯冀早生安養耳。屬題經名，附奉上。謹陳，不宣。農曆八月二十日。音啓。其二十九

丐因居士道鑒。惠書，誦悉。承施硃箋羊毫已收到。敬謝。叢刊續輯，擬俟秋涼返廈門時編定，因是間無書籍可檢書也。拙書聯幅等，約於旬日後遞奉。其中有上款者數種，其餘乞仁者與沈知方居士分受，轉贈善友可耳。旬日後郵奉聯幅等時，附講稿二種。青年佛徒應注意的四項及南閩十年之夢影。皆在養正院所講者。去年正月及今年二月。養正院創辦於三年前，朽人所發起者。教育青年僧衆。今夏或將與他院合併。養正之名，難可復存。此二講稿可爲養正院紀念之作品，爲朽人居閩南十年紀念之作也。唯筆記未甚完美，擬請仁者暇時爲之潤色。多多刪改無妨，因所記錄者亦不盡與演詞同也。并改正其訛字文法及標點。題目亦乞再爲斟酌。青年佛徒等。更乞仁者爲立一總名。即以此二篇講稿合爲一部書。雖非深文奧義，爲大雅



所不取，或亦可令青年學子瀏覽，不無微益也。此講稿擬別刊行世界書局，或欲受刊者，廣洽法師處存。有數十元，願以附印也。又擬請仁者撰序及題簽，以爲居南閩十年之紀念耳。謹陳，不宣。六月五日。演音疏。其三十。

書悉讀淨土十要竟，專研華嚴疏鈔，甚善。彭二林華嚴念佛三昧論，應先熟讀。論僅十數紙，詮義甚精。金陵版一冊，價六分。并齋影印八大人覺經一摺，希受收。此未具宣。丐因居士丈室。曇昉疏。冬至朝。其三十一。書悉華嚴疏鈔，唯有仁者能讀誦，故以奉贈。來書謙抑太甚，未可也。疏鈔第十迴向章及十地品初地前半共一冊，乞寄下。疏鈔中近須檢閱者凡五冊，一淨行品一冊，二十行品二冊，三十迴向品初迴向章一冊，四十迴向章一冊，此五冊遲數月後再郵奉尊齋。以外諸冊，不久悉可寄上。懸談在杭州，疏鈔存上海，不久可以寄來。明後二年，謝客養靜，未能通問。迴向初章印就時，乞惠寄朽人五冊，仍交丁居士家。並乞寄天津東南城角清修院清池大和尚三冊。至爲感謝。丐因居士。迴向初章中聽字寫从王，大誤。後忽忽不及改寫。切字从十者，依唐人一切經音義之說，以十表無盡也。月臂。十二月六日。其三十二。

兩書誦悉。懸談八冊，昨夕亦齋至。今郵奉疏鈔十一冊，又往生論注一冊，亦併假與仁者研尋。楊仁山居士謂修淨業者須窮研三經一論，論即往生論也。鸞法師注至爲精妙。楊居士謂支那蓮宗著述，以是爲巨擘矣。附奉上行願品一冊，敬贈與仁者讀誦，并希檢受。華嚴懸談文字古拙，頗有未易了解處，宜參閱。

宋鮮演華嚴談玄供擇，共六卷，初卷佚失，今存五卷，收入續藏經中。及元普瑞華嚴懸談會玄記，四十卷，常州刻經處刊行，共十冊。反覆研味，乃能明瞭。仁者若欲窮研華嚴，於清涼疏鈔外，復應讀唐智儼搜玄記，共五卷，每卷分本末，第四卷之中已佚失，此殘本，今收入續藏經中。及賢首探玄記，二十卷，金陵刻經處刊行，共三十冊。徐蔚如

釐會。清涼疏鈔多宗賢首遺軌，賢首復承智儼之學脈，師質綿續，先後一揆。三師撰述，並傳世間，各有所長，寧可偏廢。乃或故爲軒輊，謂其青出於藍，尋繹斯言，蓋非通論。前賢創作者難，後賢依據成章，發揮光大，亦惟是續其遺緒耳，豈果有踰於前賢者耶。至若慧苑刊定記，共十五卷，第六第七佚失，此殘本，今收入續藏經中。反戾師承，別開徑路，賢宗諸德並致攻難，然亦未妨虛懷翫索，異義互陳，并資顯發，豈必深惡而痛絕耶。春寒甚厲，手僵墨凝，言不盡意。丐因居士丈室，曇昉疏答，正月十四日。今後郵寄書籍，乞包以堅固之紙數層，外以堅固之麻繩束縛穩牢。因由紹至溫，須數易舟車，包紙易致破碎，麻繩亦易磨斷。附白。其

三十三

丐因居士。唐詩人韓偓墓，在泉州城外里許。偓晚年居閩不仕，爲唐末完人。擬刻其詩稿。乞仁者託人代爲抄寫韓內翰別集，每半頁十行，每行廿四字。及韓偓傳，擬刊於卷首，以備付印。倘有舊刊本可得，則不須抄寫矣。又晚晴山房所存瑜伽師地論及論記，唐遁倫撰，共二部，乞於返校時檢出寄下。以後惠書，暫寄泉州承天寺性願法師轉交。音仍居艸庵，稍遲或返大開元寺。謹達，不具。舊正月七日。演音啓。今歲元

且始已講律。願以殘燼餘年，專致力於此也。其三十四

書悉。近與傘法師發願重釐會修補校點華嚴疏鈔。今之會本，爲明嘉靖時妙明法師所會。彼時清涼排定之科文久佚，妙師臆爲分配，故有未當處。妙師會本，後有人刪節，甚至上下文義不相銜接。龍藏仍其誤。今流通本又仍龍藏之誤。已上據徐蔚如考訂之說。傘法師願任外護，并排版流布之事。傘法師謂排版爲定，可留紙版，傳之永久。朽人一身任釐會修補校點諸務。期以二十年卒業。先科文十卷，次懸談，次疏鈔正文。朽人老矣，當來恐須乞仁者賡續其業，乃可完成也。此事須於秋暮自廬山返後，再與傘師詳酌。若決定編印，尙須約仁者來杭面談一切。前存尊齋疏鈔等，乞暫勿送返。是間有續藏可閱。傘師又將覓木版流通本，以爲編寫之稿本。改正科會及增補原文之處，皆翦貼，卽以此本排印，不須另寫。近常與湛翁晤談，彼詩興甚佳。他日來杭，可往訪也。丐

因居士丈室。五月十九日論月疏其三十五

鼻郵明信片，想達慧覽。行期延緩，或須遲至明春耳。寫經珂羅本印就，仍希郵至溫州。前年曾奉上賢首國師墨蹟影本，近檢續藏經，亦載此文，後更附數行委書齋往疏記等名目。仁者有暇，宜至嘉興佛學會中檢尋之。讀藏經第一輯第二編第八套第五冊第四百二十二頁。附奉上拙書菩薩名號一葉。此未宣悉。丐因居士丈室。善攝疏。三月二十三日。其三十六

別久爲念。留滯匡山，忽忽二月。溽暑之候，有如深秋，誠清涼之勝境也。爾來頗思讀華嚴大疏。仁者若已



誦訖者希以郵下。寄九江牯嶺大林寺轉交弘一。仁者精進何如。孫居士學起信論，能得途境不。時以爲念。不具一一。丐因居士丈室。七月晦日。月臂疏。其三十七

昔奉惠書，忻悉一一。今乞孫居士齎拙書石印本數種，希受。爾將移居大羅山。明歲若往嘉杭，當與仁者晤談。不具一一。丐因居士丈室。閏月二十一日。演音疏。其三十八

廈門近日情形，仁等當已知之。他方有勸余遷居避難者，皆已辭謝，決定居住廈門，爲諸寺院護法，共其存亡。必俟廈門平靜，乃能往他處也。知勞遠念，謹以奉聞。不宜。演音啓。其三十九

冠洛居士文席。惠書誦悉。時事未平靖前，仍居廈門。倘直變亂，願以身殉。古人詩云，「莫嫌老圃秋容淡，猶有黃花晚節香。」謹復不具。演音疏。其四十

## 與葉青眼居士

青眼居士慧鑒。頃奉諸居士公函，厚愛誠摯，感謝無盡。擬於舊曆二十五日後動身。此次至泉，依去年與仁者所約定者，暫住溫陵養老院。同行已請定覺圓法師及陳天發童子，與朽人同住院中。由彼照料一切，至爲妥善。謹此預達，不宜。諸居士乞代致候，并達謝忱。恕不另函。三月初十日。音啓。

## 與朱穌典居士四通

曩者，游方會稽，荷承遠送，感謝。寇亂未寧，錢塘之行不果。仍附番舶，歸臥永寧，掩室慶福。小暇當寫佛名，及以警語。遲至歲晚，必可郵達二橋西河尊齋，此不委悉。穌典居士丈室。曇昉疏。十月十四日。其一

書悉。寫件已於陽曆一月十六日寄與周天初居士，託彼轉交。不意至今尚未收到。其時因尚有他物寄與天初，故以附入掛號寄去。彼收到後，亦復一函。其後即未通消息，未知彼或有障緣，或往他方。乞仁者託杭州友人代爲訪問。何如？彼家住杭州旗廈平遠里十八號。倘訪問晤面時，彼云已遺失者，乞即示知，當再補寫奉上。再者，朽人不久或往杭州，亦未可知。惠復乞寫二明信片，一寄溫州，一寄杭州裏西湖招賢寺弘傘法師轉交。如是至爲穩妥也。率復不具。二月廿日。曇昉。經子淵居士現在何處，乞示其通訊之所。其二

穌典居士文席。惠書，忻悉。一一承施紙筆，皆已受領，感謝無盡。護生畫集今承仁者等爲之盡力負責，如能獲圓滿成就，如斯殊勝功德，諸佛菩薩出廣長舌讚莫能窮。一切世間天人等衆皆大歡喜。誠爲近今世界戰雲沈闇中，第一可欣可慶之事也。畫集之資料，佛學書局出版之物猶如是，此四字即書名，頗可參考。仁者倘以前未定閱佛學半月刊者，即乞定閱。有二種，一佛學書局出版者，二慕爾鳴路一百一十一街

六號大法輪書局出版者，名曰覺有情皆半月刊也。能將數年以來出版者，悉皆補購尤善。其中時有戒殺放生之文字，又能常常閱是刊物，藉以重修佛法，亦殊勝之因緣也。畫集之題句，能於編輯時即一一標出尤感。則將來可無須再託人撰題句也。新編畫集共四冊，畫幅甚多。倘豐居士未能速即繪就，擬稍變通。第六集畫百幅者，請豐居士獨力任之。此外三集四集五集之畫幅，則乞仁者及轉託諸善友合力作之。如是則延至明年歲暮，或可圓滿繪就也。謹覆，不宣。農曆九月十八日。音疏答。其三

蘇典居士文席。續輯畫集事，承仁者盡力輔助，至用忻感。斯事之功德利益甚大。務乞仁者主持其事，督促諸居士努力進行，并廣託諸善友分認其事，以期早得圓滿成就，感禱無量。朽人數年已來，體力如常，腰背足步胃口皆無異於少年。閩中產米缺乏，代以雜糧。以小麥大麥磨作粗粒，加入乾蕃薯少許，做成麥羹，其味極佳，且適於衛生。又鮮蕃薯及乾者，爲南閩自昔以來常食之品，其價較米爲廉也。率陳，不宣。閏六月廿七日。音啓。其四

## 與高勝進居士 四通

余近居日光巖方便掩關。諸緇素屬爲演講。竊念余於佛法中最深信者，惟淨土法門。於當代善知識中最佩仰者，惟印光老法師。今舉嘉言錄中數則，如願離娑婆云云，三九頁。既有眞信云云，四二頁。一切行



門云云，四九頁，略爲講釋之。諸君暇時，乞常閱嘉言錄。每次僅閱一二段，不必多，宜反覆研味其義，不可草草也。演音。其一

昨日出外見聞者三事。一，余買價值一元餘之橡皮鞋一雙，店員僅索價七角。二，在馬路中聞有人吹口琴，其曲爲日本國歌。三，歸途淒風寒雨。勝進居士慧覽。正月廿九日。演音。其二

勝進居士澄覽。音邇來心緒不佳，諸事繁忙，養正院訓育課，乞仁者代授。四月初旬，講律事即可結束。將往他方，埋名遜世，以終其天年，實不能久墜此名聞利養窟中，以辜負出家之本志也。不宜。音啓。其三

勝進居士澄覽。近聞仁等集資印經多部，至用歡讚。朽人自去秋始，閉門養疴，老態日增，日未落即臥牀，精神恍惚。故於諸善友所音訊疏闊。近仍居普濟頂寺，不復作出山想矣。泉州等處，米價奇昂，每元僅米一斤，貧民苦矣。臨穎不勝悲歎。略陳，不宜。四月二十八日。善夢啓。其四

## 與崔澍萍居士二通

德振居士慧鑒。前復明信，諒已收到。仁者欲學戒，宜常讀誦梵網經戒本，并詳研賢首疏。雖受五戒，亦應依疏中戒相而研習也。此二書有流通天津版大字梵網經菩薩戒本，不是揚州衆香庵版，金陵版梵網經菩薩戒本疏。即是賢首疏內記，撰者法藏是。余居鄉間，不能通信。俟下半年移居城內，或再致書奉聞。不宜。甲

戊舊正月十六日。演音啓。華嚴經普賢行願品淨行品初迴向章，余有書寫者，佛學書局流通。應常常讀誦，以長養大菩提心。附白。其一

惠書誦悉。茲別當如下。佛制無有遙授歸依之法。今仁者發心在唐開宣文秉受，乃是自誓受戒也。自誓受時，宜注意者，先說三歸之時，正得戒體，此時最爲要緊。後說五戒名者，乃是略宣戒相，非於此時而得戒也。來書所言，各節皆是，至用忻慰。明晨，即擬遠行，略復，不宜。舊正月二十六日。演音啓。其二

### 與郁智朗居士 十通

智朗居士道席。前上明信，想已收到。近獲惠書，具悉一一。爲令兄書一紙，附奉上。是間天氣猶炎熱，近九十度。遲月餘，或返泉州，再爲仁者書寫一二紙也。如閩南時局變化，則未能往。漳州至泉州三百里，車路已壞損，惟可步行，或乘肩輿耳。以前朽人懸揣仁者爲老儒，今誦來書，乃知仁者大兄，年僅四旬，未知仁者年齡若何。具此學識，何以任事於醬園。又仁者與九齡居士爲同族否。朽人約於月餘返泉，仁者仍可通信至漳州一次，以後改寄泉州承天寺轉交。劉質平居士如在寧波中學，亦乞代達此意。不宜。中秋節。演音啓。其一

智朗居士慧覽。前復函，想已收到。頃轉至二月三日尊函，欣悉一一。拙書一葉，附奉上。令姪書中未曾提

及法名，今遽書寫，似有未可。擬請仁者寄與海量居士，託彼先爲陳說勸導，後再以拙書付彼可耳。朽人近雲游諸方，住址無定。仁者獲此書後，乞勿覆謹達，不宜。三月二日音啓。其二

智朗居士道席。惠書誦悉。承施金感謝。當來廈門戰事平靜後，擬移居鄉間。現在仍須居廈門，未能他往也。近閱靈峯宗論，有詩一首，附錄於後。日輪挽作鏡，海水挹作盆。照我忠義膽，浴我法臣魂。九死心不悔，塵劫願猶存。爲檄虛空界，何人共此輪。謹復，不宜。演音疏。其三

智朗居士道席。惠書誦悉。至用欣佩。朽人於出家後，曾發誓不蓄剃度弟子，友人多知之。凡有來乞剃度者，一概辭謝，未能承命。今重聽仁者厚意，十分抱歉。希格外原諒，爲禱。偈句附奉上。不宜。六月十日音啓。

#### 其四

智朗居士道席。惠書誦悉。辟穀似可不須。出家事亦勿執著。惟自懺悔業障，厚植勝因可耳。蓮池大師云，求之既不可得，卻之亦不可免。乞仁者深味此言，素位而行，以待因緣成熟也。拙書一紙，附奉上。不久即他往，以後乞勿來信。當來通訊處，俟後奉聞。演音啓。其五

智朗居士澄覽。惠書誦悉。仁者發心出家，至用歡讚。但剃度之師，以靈巖山監院代理住持妙眞法師最爲適宜。將來即可久居靈巖，由師爲之護助一切也。朽人自初出家後，屢在佛前發誓願，願盡此形壽，決不收剃度徒衆，不任寺中監院或住持。二十餘年以來，未嘗有違此誓願。希仁者鑒此苦衷，而曲亮之。近年



小疾頻發，精神頹唐。以前學律諸師，久已分散。不久或即往生西方。當來在彼世界，可與仁者常相歡聚耳。拙書一紙，附奉上。謹復，不宣。音啓。四月廿七日。其六

智朗居士清鑒。前奉書，想已收到。仁者發心出家，志願誠懇。朽人以宿誓故，未能違越，深負盛意。迄今時用歉憾。竊思閩南頗有高僧。如泉州鄉間某寺轉法老法師，高年隆德，爲是間衆所欽仰。通達教義，專修淨宗行爲高潔，一生未曾任大寺之方丈監院等。朽人已託人預爲商請，未審尊意何如。但仁者來閩之時，須俟

秋涼後，或冬初，其時朽人大約可返泉州相晤談也。約在中秋後離永春。謹詢，不宣。六月十七日。音啓。朽人自閉門養病後，與外間罕通音問。朽人致興仁者之信函，乞勿轉示他人。至要。其七

智朗居士慧鑒。惠書誦悉。朽人已託性常法師致書與轉法老和尚商懇。能荷慈允，固善。否則亦請性常法師代覓請他位良師。閩南各縣。性常法師爲在朽人處學律資格最久者，今居普濟下寺，爲朽人護法照料一切。朽人所居者爲項寺，一人獨居，距下寺約半里。彼於仁者出家之事，可以負責介紹，即朽人不久往生西方，彼亦可負責繼續進行也。仁者於下次來信時，乞附寫一箋與性常法師致謝一切。海道被封，若由陸路來閩，至爲困難，證書亦不易請求。但時局不久即可平靖，乞仁者俟時局平靖，海道開通，然後再來，乃爲穩妥也。剃度師請妥，來閩之期延遲無妨。宜俟時節因緣，未可勉強急迫也。前函承關念一切，至用感謝。永春距海口有兩日路程，且深山幽僻，戰事無礙，常人惟懼鄰縣土匪，然亦不須介意也。朽人於八

月間他往否，未能定。須待時局稍靖，又須身體康健也。以後惠書，仍寄永春。朽人倘他往者，亦可轉送。又朽人自本月二十九日始，閉關圓滿，可以照常通信見客。以後惠書，乞直寫普濟寺內弘一收，即可達到，無須託人轉交也。來書所謂潛行出走，朽人竊以爲未可。若如是者，將來恐不免糾葛。倘仁者之妻來閩尋覓，謂仁者言，若不偕歸者，即決定於仁者面前自殺。當此之時，仁者若任其自殺，則有傷仁慈。否則只可偕歸矣。依朽人拙見，擬定一辦法如下，以備採擇。仁者宜向店中請假七日，返家。於七日中，專心持念觀世音菩薩聖號，涕泣哀懇，乞菩薩垂慈，令妻室發心出家，令長兄岳母於仁者夫婦出家之事歡喜讚歎，不加阻障。云云。七日圓滿，即發信與長兄岳母陳明此事，併於妻室前，宣布此決定之辦法。如是先令妻室出家爲尼，並經長兄岳母歡喜許諾，乃爲穩妥也。朽人出家以前，亦先向眷屬宣布。其他友人有潛行出走而出家者，多無好結果。與其出家後而返俗貽人譏笑，不如不出家之爲善也。拙見如是，希垂察焉。閩南百物昂貴。海船不能運貨來土產甚少。仁者來時，宜攜帶在家之布衣。俟出家後，改爲出家衣形。棉被亦宜帶來。去年朽人製薄棉被一件，價近三十圓。閩南氣候較暖，冬季著小棉襖一件已足。其他夾衣單衣宜帶來。夏布衣宜多帶，閩南夏季甚長也。出家之人，應學朝暮課誦，并宜熟背誦之。此文載在「禪門日誦」中。乞仁者預先學習。書中何者宜讀，何者不須讀，乞詢寧波出家人，即可知之。此紙於今晨匆促書寫，言不盡意。其中或有訛字，乞亮之。謹復，不具。七月十五晨。音啓。其八

智朗居士澄覽。前後信片，想已收到。今晨始獲轉法老和尚復函，猶謙讓未遑。但將來若再面求，大約可得慈諾也。此事係託性常法師代爲介紹。將來仁者來閩時，可由性常法師陪送仁者往老和尚處。萬一老和尚猶不允，可請性常法師再介紹他位良師。朽人或不久生西，亦由性常法師負責介紹，必不中止。乞仁者安心靜候，爲禱。性常法師與朽人同住。仁者宜先致函，陳謝一切耳。仁者來閩之期，似宜延緩。水路不通，旱路不便。且是間物價十分昂貴，仁者現在若即來此出家，於事實上殊多困難。又前仁者來函所云託代領旅外證，是教人妄語，有所未可。且領證亦非易事。故擬請仁者安心靜候，以待時局稍定，再與性常法師斟酌妥善進行之辦法。請剃度師之事，既由性常法師負責。乞仁者無須顧慮，仍暫就職業，以待時節因緣可也。前來書所謂潛行出走，朽人竊以爲不可。若如是者，將來必不免糾葛。宜先向家族諸人陳明，至要至要。朽人出家以前，亦先向眷屬宣布。其他友人有潛行出走者，多無好結果。若妻來寺尋覓，以於當面自殺而迫喝之，將任其自殺歟，抑偕妻歸家歟。此事不可不預慮及，慎之慎之。障人出家有大罪。今錄出家功德經文如下。此依南山行事鈔中引文寫錄。經云：若爲出家者，作留礙抑置，此人斷佛種。諸惡集身，猶如大海。現得癩病，死入黑暗地獄，無有出期。以上經文。乞仁者以此經文爲家族諸人詳釋之，或可消滅阻止之意也。朽人不久或移居他處。以後惠函仍寄永春，即可轉送。時局近多變化，暫未能返泉州也。仁者在家之布衣及棉被，將來或須攜之來閩。此間布價極昂，棉花尤昂。在家布衣可以染色。



而改製也。以後惠書，乞仍寫弘一之名。謹復，不宜。八月初四日。音啓。其九

智朗居士慧鑒。惠書誦悉。仁者出家之心急切，可見道念堅固，至用歡讚。但或因緣未具，亦不宜操之過急，致更引起種種障礙也。蓮池大師云，達宿緣之自致了萬劫之如空，而成敗利鈍興致蕭然矣。乞仁者熟誦之。承詢毛織物可用否。案此類品物，或是不殺獸命而僅翦取其毛者。南山律祖元，翦毛存命，誠用顯仁。故開服者。是以現今僧衆多用之。但亦有人不欲著用者。仁者舊貯之毛絨衫及毯子，即可贈與家族。乞在寧波定製僧用之小棉襖一件，帶閩可耳。閩南冬季無雪，僅此已可過冬。製此物時，宜託善製僧服之裁縫工人。寧波甚多。用墨色，即深灰色。老布作面及裏，形式闊大，宜依老年僧衆著用者之形，萬不可用青年僧衆之美觀時式。不可對胸，至要。此外再做僧用之小衫及袴各一件，或各二件，亦要墨色老布製。因閩南布價極昂。以上數件，乞在寧波做好帶來爲宜。仁者隨攜來閩之白布小衫袴兩套，在家形，亦乞在寧波將此物染成墨色。仁者自己如不能染，乞託裁縫工人染之。小棉被一條，能染成墨色尤善。被面及裏皆然。俾免到閩後再費周折也。仁者擬滙洋五十圓來閩，不宜多，可備零用。至於衣被等物，如上記攜來者數件外，皆可請剃度師父設法募集他人之舊物用之，暫緩新做也。閩南物價極昂。近一月餘，海口被封，滬港等處物品皆不能運入，故物價益巨。米價已漲至每石百二十圓。去春僅五圓餘。去冬朽人製薄棉被一件，價近三十圓，現今益昂。故仁者來閩後，暫不宜製辦衣物也。仁者此次來閩，著俗人之服裝而攜

帶僧服，恐受兵警之盤詰。故朽人另寫一箋，內述仁者欲來闡出家之意。乞以此紙示彼軍警人士可也。又仁者來泉州時，先住開元寺，亦即用此箋作爲介紹書。乞仁者到寺後，以此箋示寺僧，即可優待一切也。仁者到寺後，即寫信挂號寄與朽人，即可託性常法師到泉州接洽一切。性常法師現住泉州，尊書俟彼返時面交。勿勿略復，不具。九月十五日。音啓。其十

## 與呂伯攸居士

前誦來書，歡悅無盡。茲寫佛名三葉，以一葉奉與仁者，其一悌轉施胡居士寄塵，其他可隨意贈與善友也。別奉舊寫殘紙數種，并乞受收。若自受，若轉施他人。朽人爾來禮誦華嚴，謝絕賓客，并暫不通訊問。仁者受收是書後，乞暫勿答覆。伯攸居士丈室。十二月十一日。月臂疏答。聽鐘念佛法，爲朽人所撰述者。此數張中，惟改正訛字一張，其他乞仁者改寫。朽人近年書寫經典，付印者大半已送罄，惟吳幼潛處珂羅版印阿彌陀經或尚有餘，乞仁者向上海寧波路渭水坊西泠印社吳君詢問。

## 與黃善登居士

示悉。骨秋之件，二月前已交佚生先生。印費揭紙石印，文詩稿。應如何辦理，乞君於來杭時訪佚生一談，或

致函亦可。溽暑不多述。即頌近佳。演音和南。七月七日。

## 與繆滌源居士

滌源居士道席惠書，今日始轉遞到。淨峯住持於去年九月辭職。余隨彼往泉州鄉間度歲。今春到廈門。戒法不能遙授。乞仁者於佛前自誓受爲宜。應先受不邪淫不飲酒二戒。其餘緩受。盜戒極微細難持。常人不知，應格外鄭重。至要，至要。出家之事，且看將來因緣如何，不可固執拙書一葉附奉上。通訊乞寄廈門南普陀寺養正院轉交弘一收。謹復，不宣。演音啓。舊閏三月二日。

## 與穆犍蓮居士

犍蓮居士文席惠書，忻悉。一一諸荷護念，感謝無盡。曩因傳貫師勸，往菲延期，遂免於難。否則囚居古浪矣。但對付敵難，捨身殉教，朽人於四年前已有決心。曾與傳貫師等言及古詩云：「莫嫌老圃秋容淡，猶有黃花晚節香。」吾人一生之中，晚節最爲要緊。願與仁等共勉之也。亭亭菊一枝，高標矗勁節。云何色殷紅，殉教應流血。音啓。



## 與陳无居士三通

无我居士道席。前復書，想已收到。泉州友人近擬盡力提倡流通護生畫集，以消災劫。朽人以前亦有重書寫重製鉛版之意。附致李居士一紙，乞仁者詳閱，便中乞爲轉交，並希仁者與李居士共同商酌進行妥善之辦法。李居士不久將隱遯，此事將來圓滿成就，惟有依賴仁者之力也。尊處所立戒殺會章程，再乞寄下數十紙。又皆大歡喜等諸書，亦乞惠寄，至感。泉州善友近發心歸信佛法者甚多，以此諸書贈送，最爲契機。演音啓。再者，前承寄下梵呪音義錄，末頁所示羅馬字發音法，其濁音改讀爲清音者，是否凡遇 g 皆讀如 k，d 皆讀如 t，b 皆讀如 p。乞示知爲感。其一

无我圓淨居士鑒。近獲圓淨居士書，具悉一一。華嚴經疏科文表解出版時，乞寄二部，至泉州承天寺，交弘一收，至感。朽人前補校玄談本，其中有闕略未寫者，亦未及再校。因用以自習，非是預備作印行之稿本。故此書補校疏未精密，不復寄奉。朽人在泉州居住，來客訪問者至多。擬自舊十二月初一日始，在此爲短期之閉關。大約數月之後，或往他處也。閉關以後，通訊者，惟有夏丐尊居士一處。前與仁者等商酌畫集事，尙未完成。以後仁者等關於畫集事，有與朽人通訊者，乞交與夏居士轉寄爲禱。夏居士寓上海福州路開明書店。謹陳，不宜。舊十一月十八日。演音啓。其二

## 與陳海量居士三通

海量居士道鑒。不晤近十載，至爲懸念。朽人爾來未與外間通信，茲因有極重要事，故破例致書與仁者，略陳其概。傳如師近管理水雲洞，體弱多病，數年前修習世間文學，於佛法罕有所知。近惟終日招待香客，督理農務，幾忘卻出家之本務，至爲可慙。朽人未能與彼常晤談，即偶談時，亦未能盡言，未能直言。朽人反覆思維，惟有乞仁者速來南閩，與傳如師同住，時時規勸，盡力扶持。俾傳如師能得精進向道，而仁者居此鄉間閒靜之寺中，亦可安心用功，勝於滬上多多矣。務乞垂憐，故人傳如師近況，深加悲慙，速命駕來閩，至爲感禱。不宜。正月十六日。音啓。其一

海量居士澄覽。茲寄慧圖勝通款二紙，乞轉交厲居士。其餘三紙，乞便中附寄與高居士。遲遲無妨也。去歲靈巖寺主屬撰大師略傳，至今猶未動筆，至用歉然。因撰此傳甚爲不易，若稍讚譽則違遺訓，若太平淡則不契時機，故遲遲有待。前云之軼事一篇，不久即可撰奉。謹陳，不宜。正月十三日。音啓。其二

海量居士澄鑒。覺圓法師近擬輯藥師聖典，欲至上海居士林徧檢各種大藏經，抄寫資料，應在上海居住多時。乞仁者爲之介紹住處，能住居士林內尤善，並爲之護衛一切，以成就彼之弘願。至用感謝。謹陳，不宜。音啓。其三

## 與劉質平居士

質平居士文席。兩次惠書，於昨午始收到。對聯已受雨濕，可知牛皮紙無用，舊式油紙或較佳也。對聯增加上款，則筆跡不符，格式參差，故不寫款。另書小堂幅小聯分贈四居士，單款舊聯亦可附贈耳。又拙書若干紙附郵奉，乞隨宜結緣。寫小楷用之水筆，乞購數枝寄下，因閩製之筆不適用也。余所需者爲水筆，非羊毫，亦非兼毫，乞勿誤會。以後通訊，乞寄泉州大開元寺轉交。舊存廢稿若干紙，並奉上油紙，乞寄回。謹復，不宜。農曆四月五日。音啓。

## 與龔勝信居士

勝信居士，與朽人同住一載，今將別離，屬寫警策之訓。竊謂居士曾受不邪淫不飲酒二戒，今後當盡力護持。若犯此戒，非余之弟子也。余將西歸矣，書此以爲最後之訓。壬午五月一日。晚晴。

## 與沈彬翰居士

彬翰居士文席。前奉惠書，忻悉一一。朽人已於農曆 月 日謝世。前所發願編輯之南山律在家備覽，



未能成就至爲歉然。惟曾別輯盜戒釋相概略問答一卷，雖簡略無足觀，然亦可爲最後之紀念也。附郵奉上，希受收。謹陳，不宜音啓。

## 與劉光華居士

惠書，誦悉。朽人近已移居鄉間，尊翁骨灰，如必欲迎請，俟時局安靖後，再籌鄭重之辦法。若郵寄，甚爲未妥，且不恭敬也。謹復，不宜通訊處，仍如舊。除夕前二日，弘一上。

## 與豐子愷居士二通

子愷居士。前日已至白馬湖，承張居士代表招待一切，至用感慰。茲有四事，奉託如下：（一）乞畫澄照律祖像一幅，別奉樣式一紙，乞檢閱。此像在續藏經中，今依彼原稿，略爲縮小。如別紙中硃筆所畫輪廓爲限。如以原稿太緊密者，乞仁者，依己意稍爲簡略。但仍以工筆細線畫之爲宜。畫紙乞用拷碑紙，因將刻木版也。此畫像，能於舊曆九月中旬隨夏居士返家之便帶下，爲感。（二）前存尊處之馬一浮居士圖章一包，乞於便中託人帶至杭州，交還馬居士。但此事遲早不妨，雖遲至數月之後亦可。馬居士寓杭州聯橋及弼教坊之間，延定巷舊第五號，或第四第六號。門牌內（三）福建蘇居士，今春在鼓山，定印

華嚴疏論纂要多部。此書係康熙古版，外間罕有流傳。每部大約六十冊，實費二十圓。擬以十二部分贈與日本各宗教大學及圖書館等，託內山書店代為分配及轉寄。又以二部贈與上海功德林流通。附寫信二紙，乞於便中轉交內山書店及功德林佛經流通處為感。（四）有人以五圓託仁者向功德林代請購下記之書。華嚴處會感應緣起傳一冊。其餘之資，皆請購功德林藏版地藏菩薩本願經若干冊及其郵費。此書代為郵寄「溫州大南門外慶福寺因弘法師收」。無須掛號。此款乞暫為墊付，俟他日託夏居士帶奉種種費神感謝無盡。惟淨法師偕來，諸事甚為妥善。秋後朽人或雲游他方，仍擬請惟淨法師在晚晴山房居住，管理物件及照料一切。彼亦有願久住山房之意。聞仁者近就開明編輯之事，想甚冗忙。如少閒暇，九月中旬可以不來白馬湖。俟他時朽人至上海，仍可晤談也。俗禮幸勿拘泥，為禱。不具。舊八月廿九日。演音疏。其一

承寄佛書二冊，頃已收到至感。余本擬在白馬湖過夏。因是間近來兵士忽至，昨午曾到山房擾亂。又聞夏宅即擬移居上海。今後一人居此，諸事困難。現已決定往金山寺亦幻法師處或他處，二三日內即擬動身也。夏居士如在上海，乞為致候。所有前託帶來各件，皆乞從緩。不宜。演音疏。其二

## 與李芳遠居士四十通

初學篆字，宜先習說文解字建首。每日寫四字，每字寫數十次。寫時宜提筆懸肘，如是積日漸進，萬不可以求急速。音啓其一

芳遠童子慧覽。惠書誦悉。至用忻慰。此間風光清勝，可以忘憂。湛山寺住衆百餘人，殿閣壯嚴，誠一大叢林焉。朽人講務之餘，頗閒適。約當中秋節後，即可返廈門也。諸承關念，感謝萬千。謹復，不宣。音啓其二

芳遠居士文席。惠書誦悉。至用歡慰。傳貫已返惠安，不久即來廈門。清智法師書已託人送去。仁者發大菩提心，歸信佛法，至堪慶喜。茲付挂號寄上書一包。菩提心戒釋義一冊。此書說十善之義，爲學佛之初步。皆大歡喜一冊。說近時靈感之事。釋迦如來一代記一冊。說佛之歷史。文筆淺顯，甚有興味，易於閱覽。人死問題

一冊。文義稍深，亦可略閱。佛教公論及半月刊各一冊。地藏菩薩本願經一冊。又說要一束。乞以說要對閱經文，自可易於了解。拙書直幅一紙。拙書大聯拓本二對。此聯存鼓山。朽人不久或往泉州鄉間，亦未可知。

臨時再奉告可也。仁者暇時，乞往普照寺一游。在彼居者，皆余之友人。前月彼等曾約朽人往寺居住。因泉州之約已定，故未能往也。附寫介紹箋一紙，乞收入。謹復，不宣。演音啓。舊十二月四日。其三

芳遠童子智鑒。前復書及附寄佛典，想已收到。朽人於前夕到草庵，暫不他往。以後惠書，乞寄泉州南門外石獅下檀林街靈鷲寺轉交草庵。傳貫師仍居廈療病，約於年底返草庵。彼經此意外之災難，爲盜放槍彈，貫穿手腕，十分歡喜，深自慶幸。謂可以成就代衆生受苦之夙願也。將來仁者返廈門時，乞便中到



草庵。在余店站（近青陽站）下車行二里，即至草庵。在車站，即可望見草庵之石樓也。此站舊名福浦，今改稱余店也。小住數日。至佇，不宣。演音疏。舊十二月二十日。其四

惠書，誦悉。傳貫昨已返草庵與朽人同居。腕傷已漸愈。仁者返廈門時，乞來草庵小住。爲佇。除夕前二日。演音上。其五

前寄信片，想已收到。擬於舊曆二十日左右，同往泉州，住承天寺。定於二月初一日起，在彼講經數日。仁者若到泉州時，乞至承天寺晤談，爲佇。以後通信，亦寄泉州城內承天寺。謹達，不具。舊正月初九日。弘一傳貫全上。其六

前寄上信片二紙，想已收到。余約於二十左右，往泉州承天寺。自二月初一日起，講經數日。以後尚須往洪瀨街小雪峯寺。謹復。舊正月初十日。音啓。其七

惠書，誦悉。至爲歡忭。自舊二月初一日起，在此講經，大約十天講畢。仁者能於講期內，到泉州聽經，甚善。謹復。泉州承天寺內弘一上。其八

惠書，誦悉。照相未有存者，俟後寄上下月初旬，擬往惠安講經。承惠磁物，甚感。以後通訊，仍寄承天寺轉交。磁物，亦可存彼處也。舊二月十一日。演音啓。其九

芳遠居士朗鑒。惠書，誦悉。適有去秋到上海時所攝之影，由友人寄來，即以奉贈仁者，而爲紀念。近來講

務甚忙。下月初旬到惠安。月底或往廈門。但尚未決定也。俟後奉達。謹復。不宜。傳貫師附致候。舊二月二十四日。演音疏。其十

芳遠童子慧鑒。惠片誦悉。往惠安僅住數日。即返泉州。廿一日往廈門。下月初旬即往漳州。靜養。俟秋涼後。乃在漳州講經。承惠磁物。乞帶鼓浪。交清智老和尚轉送與朽人。最妥。漳州通信處。爲南山寺轉交。傳貫師因須居泉侍奉老父。不能往廈。仁者與彼通信。仍寄泉州承天寺可也。不宜。演音疏。其十一

明信。誦悉。余於二十一日或二十二日往廈門。二十日有人由廈門來迎接。大約自廿六日起。講三天。下月初往漳州。由南山寺介紹。住鄉間某寺過夏。近來多忙。而身體甚健。此次住泉州不滿兩月。寫字近千件。每日可寫四十件上下。廈門通訊處。由妙釋寺轉交可也。演音白。古曆三月十三日。其十二

芳遠童子慧鑒。古浪了閒別墅。已有正式請帖寄到。明日嚴笑棠居士到泉陪接。遲二三日。即偕往廈門。下月初四五日。往福州城內功德林佛化社諸處演講。但尚未確定。不久仍返泉州。以後通訊。仍寄泉州承天寺。近在承天寺攝影一葉。又在惠安科峯頂攝影一葉。并附奉贈。不宜。三月十九日。演音白。其十三

朽人於廈難事前四天。已到漳州弘法。故能倖免於難。現擬往山中休夏。秋涼後。或可返泉州也。尊寓住址。如變動。乞以信片存交泉州承天寺。最妥。傳貫師或在惠安。或已返泉州。四月十八日。演音啓。其十四

惠書。誦悉。鼓浪嶼不甚安寧。仁者仍住永春爲宜。朽人現居東鄉瑞竹巖。擬在此度夏。秋涼後。倘車路可

通，即可返泉州也。傳貫師已往惠安。彼之通信處，爲惠安北門外輞川同善堂。轉余之通訊處，爲漳州東門浦頭祈保亭。轉交瑞竹巖距城甚遠，二十五里，每月僅有人來此一二次也。朽人自明日始，爲仁者誦藥師瑠璃光如來本願功德經十部。願仁者消除災難，身心安寧，早成佛道，普利衆生。五月十二日。演音再者，朽人既爲仁者誦經，仁者自己，亦應常常行住坐臥，念誦「南無藥師瑠璃光如來」名號，乃有感應。至要，至要。附白。其十五

惠書誦悉。仁者如能專心念佛名，必獲大益。至用欣慰。此復。六月十一日。演音啓。其十六

明信誦悉。所云詩集，未見。現在郵局，亦不能寄印刷品。傳貫師築室事已中止，不久擬返草庵。以後仁者致函與傳貫師，乞寄泉州轉青陽市全順寶號，交小沿塘西天寺轉送草庵。仁者此次避難永春，所見所聞諸事，乞撰述「筆記」數卷，可以爲永久之紀念。演音上。七月初四日。仁者將來可以到泉州昭昧國學講習所，不久即改名專科學校，專研國學，最善。較中學爲佳也。彼處大半爲余之友人，今春曾在彼處演講一次。仁者若欲即往者，乞託承天寺瑞今法師介紹。其十七

前上信片，久未得復，想是學課多忙。傳貫師昨來信，已移居崑山寺。通信處，惠安北門外大前黃鄉合隆寶號轉崑山寺傳貫法師。演音上。其十八

明信片誦悉。余不久即往他處，行蹤難定。以後乞勿來信。至禱。十月十四日。音上。其十九



惠書誦悉。不久即擬往草庵靜養，謝絕一切諸事。仁者如返古浪，乞寫示通訊之處。今年所以往閩南各地弘法者，因余居住閩南十年，受當地人士種種優遇。今余年老力衰，不久即可謝世。故於今年往各地弘法，以報答閩南人士之護法厚恩耳。現在弘法已畢，即擬休養。故往草庵。明年將往惠安，閉門謝客，以終其天年耳。舊十月十四日。音上。其二十

惠書誦悉。至用慙惶。自明日起，即當遵命，閉門靜修，屏棄一切。仁者天真靈性，舉世莫匹。而不欲沈淪繁華，至堪敬佩。深望今後活潑莊嚴，爲當代第一人耳。歲除之後，或往他處。謹復，不宣。弘一和南。其二十一日。演音。其二十一

惠書誦悉。仁者應先修淨土宗，詳細閱覽嘉言錄，爲要。朽人不久或往永春。餘俟晤談。不宣。二月初六日。音上。其二十三

芳遠童子慧覽。惠書誦悉。八日講稿，已由數居士編錄。印資已有五十餘圓。不久性常師即可入城接洽付印之事。前存修持法三千冊，俟時局稍平定，分送與泉州、安海、漳州諸處。現暫存桃源殿可耳。朽人近來閉門思過，謝絕一切人事周旋。附奉上血書佛號一葉，希受收。不宣。四月十日。音啓。八日佛誕會，到者近二百人，并攝影，誠盛會也。其二十四

芳遠童子慧覽。曩郵奉明信至太平村，想已收到。尊作篆書，甚佳。開芳居士遺作，誠見道之言也。山中頗涼爽，午後僅至八十六七度，入夜須覆重衾也。謹復，不備。農曆六月廿一日。音啓。（信殼書）此郵票恐爲他人竊去，故蓋印後，再加封寄之。其二十五

兩奉惠書，具悉。承施箋紙，甚感。尊恙漸痊，爲慰。倘仁者來普濟寺，乞於古曆六月十九日前惠臨。因自二十日始，即謝客養靜，未能晤談也。六月初七日。音啓。其二十六

芳遠童子澄覽。惠書，忻悉。一一憶江南詞等，深有意致。仁者神經衰弱，未可修治高中繁難諸課程，應專修國學爲宜。蜀院固勝，宜俟時事平靖乃可往。現宜暫往滬校肄業。錢居士素未相識，附奉介紹與馬居士簡。可通訊也。郁居士詩稿，未有存者。印稿，俟往泉州後蓋之。因是間所存無多也。舊藏觀音寶相二巨冊，目錄附奉覽。擬以奉贈仁者，習覽臨摹。乞託使人來普濟寺，向性常法師領取。拙書小聯亦并奉上。來領時，乞攜帶大布包袱二件，油紙一張，以備包裹。至要。朽人衰病益甚。昨日始，晤客三日。後仍謝客習靜。略復，不宣。六月十六日。音啓。其二十七

惠書，誦悉。朽人近擬埋光埋名，遯世終老。所云之事，乞緩行之。寫件，俟往泉州後加墨。此復，不備。七月二十二日。音啓。其二十八

自明日起，每日送粥兩次，希爲轉知廚房。早晨送來時間，再延遲一點鐘一小時送來。因余近來老病日

甚晨起手足無力精神頹唐不能早起牀故須再延遲一點鐘也午粥送來時仍舊十一點鐘不可遲病態日甚僅能食粥或地瓜若乾飯菜飯麵皆不能食不可送來芳遠童子惠鑒音上其二十九

芳遠居士澄覽昨誦惠書至用忻慰近兩年來老病頹唐於諸友處罕通音問覺音刊未見承示詩詞以春城煙雨二句最勝近將方便掩室誦經持名約至明歲夏初乃可通訊屬撰詩序亦俟明夏試擬知勞遠念先此奉聞不宜農曆十一月四日音啓其三十

惠書誦悉尊稿乞寄。韓偓詩及彼居永春之事蹟亦乞寫示。演音上。其三十一

承施梅花食品均經妥受感甚愧甚近頗閒適倘逢假日乞渡海一游以便授寫字之法也弘一上。其三十二

惠書誦悉至用欣慰朽人不久即往菴林閉門養靜附奉與沫若居士書乞爲轉達并代致虔仰之意至禱附題偈一紙序文可乞竹莊居士爲之不宜月臂其三十三

書悉仁者能於文藝有所表樹至用欣慰朽人早歲留滯東京亦嘗一度悴心於此今年老衰又入佛門當不復措意且綺語之類佛所深戒尤非沙彌之所宜言矣竹老之言感佩萬分附書靈峯遺語一紙可印卷首世出世事非一番苦心經營其成就必不驚人若欲超脫塵障更須一番風霜磨礪故遲遲出版無妨也。演音疏其三十四



芳遠童子澄覽惠書，誦悉。至用欣慰。見來書有唐人詩，西樓望月幾回圓，句知近境大進。音嬰年亦喜此詩，今老矣，尙復如是。所恨蹉跎歲月，无所成就，愧見故人耳。仁者春秋正富，而又聰明過人，望自此起，多種善根，精勤修持，當來爲人類導師，圓成朽人遺願，謹稽首祝禱焉。演音啓。其三十五

惠書，忻悉。朽人此次居泉兩旬，日墮於名聞利養陷阱中，至用慙惶。明午即歸臥菴林，閉門靜修。特刊一冊，附挂號郵奉。又復竹莊居士函，及與陸嚴二居士寫件，俟後託傳貫師寄上。先此略復，不宣。古十二月二十一日。音啓。其三十六

芳遠童子慧覽。前復明信，想已郵奉。茲寄上紅樹室額，并復蔣居士書及橫披一葉。前者屬撰詩詞序，即以此書代序。何如？今後將靜養，暫未能通信，謹復，不宣。壬午元旦。音啓。漳州頂田下劉綿松居士，英年好學，識見邁俗。仁者可常與之通訊，當獲深益。彼之母子，皆依朽人而歸信三寶也。附白。其三十七

芳遠童子澄覽惠教，誦悉。至用感謝。朽人已於九月廿七日歸廈門。近日廈市雖風聲稍緊，但朽人爲護法故，不避礮彈，誓與廈市共存亡。古詩云：「莫嫌老圃秋容淡，猶有黃花晚節香。」乃斯意也。吾人一生之中，晚節爲最要。願與仁等共勉之。弘一上。十二月二十三日。其三十八

芳遠居士智覽。惠書，誦悉。諸承關念，並示箴規，感謝無盡。此次朽人至泉城，雖不免名聞利養之嫌，但較三四年前則稍輕減。此次至泉，未演講，未赴齋會，僅有請便飯者三處，往之。惟以見客寫字爲繁忙耳。夫

見客寫字，雖是弘揚佛法。但在朽人，則道德學問皆無所成就，殊覺惶慙不安。自今以後，擬退而修德，謝絕諸務。以後於尊處，亦未能通信。倘有惠函，亦不披閱。諸乞原諒，爲禱。前爲嚴居士寫就一紙，並奉上。仁者屬寫各體書，朽人出家以後，即有未能乞諒之仁者，屬蓋印事。此冊前存性常法師處，將來託使人囑彼寄還。因朽人前已蓋奉，不須再蓋，且佳印無多，不足觀也。朽人現在結束一切諸事，未能應命，乞愍其老朽而曲諒之。以後倘有他人詢問朽人近狀者，乞以「閉門思過念佛待死」八字答之，可耳。謹復，不宣。壬午元宵日音啓。此次至泉州，朽人自己未受一文錢。他人有供養錢財者，皆轉贈寺中，或買紙用往返之旅費，由傳貫師任之。附白。其三十九

芳遠居士慧鑒。惠書敬悉。一一。自當遵命閉關，力思往非。仁者慧根深厚，舉世無匹。深望自此用功，勇猛精進。朽人近來病態日甚，不久當即往生極樂。猶如西山落日，殷紅絢彩，瞬即西沈。故未圓滿之事，深盼仁者繼成之。則吾雖凋復奚憾哉。國慶前二日。弘一和南。其四十

### 與施勝慈居士三通

勝慈居士禮席。惠書誦悉。屬書之件，俟舊曆二月十日後，嚴笑棠之友人到泉州時，帶上。尚有華嚴經疏科一巨冊，爲李圓淨居士贈與公閱處。又安海法音錄若干冊，乞由流通處分送可也。以上各件，共爲一

包託嚴居士轉奉。朽人不久或往永春，暫未能通信。謹復，不宣。廿八年正月十四日。演音啓。安海法音錄，爲在安海所演講之本，共印數萬冊，約在二月初出版。先奉上若干冊。以後倘再需者，乞致信與承天寺性常法師請取。附白。其一

勝慈居士慧鑒。去歲十一月廿七日惠書，昨始披覽。竹禪居士書，亦於昨日披閱，欣悉一一。仁者如晤。竹禪居士時，乞代致意。朽人前擬掩室靜養，以事務冗忙，卒未如願。自前日始，已如常晤客通信矣。下月擬在本寺講經，往永春之行，尙未能定。茲託友人之便，帶上一大包。內計華嚴經疏科表一大冊，贈與佛經公閱處。橫額一紙，乞轉交笑棠居士。崇經堂額公閱處牌二紙，呈與仁者。直幅二張，乞轉交沈柏蓀居士。安海錄尙未印出，大約印四千冊。前函云數萬冊，誤算也。俟以後覓便帶上若干冊。種種費神，感謝無盡。不宣。音啓。正月廿八日。

其二

勝慈居士慧鑒。前託東門某商主帶上寫件等，想已收到。朽人擬於舊曆本月下旬往永春，性常師同往。因養正院不能開學。擬贈奉安海法音錄二百冊，現交與承天寺庫房覺圓廣義二法師管理。乞仁者與笑棠居士商酌，倘有便友到泉州者，乞來領取。前云之護生畫集，俟他日出版後，由覺圓廣義二法師即將朽人預寫之明信片寄上，通知仁者再覓便領取可也。謹達，不宣。二月十四日。演音上。其三



# 與楊勝南居士

勝南居士慧覽。惠書誦悉。忻慰無已。前數年朽人曾編輯佛學叢刊一部，計四冊，在上海世界書局出版。仁者依此書研習，最善。次序如下。

總目之次序

研習時先後之次序

一至十二 此皆經文。乞隨己意選擇讀誦。

勝南注：按即華嚴經淨行品。十迴向品。普賢行願品。法華經普門品。地藏經。經。四十二章經。八大人覺經。

十三 依經律論等挈錄。宜後閱。

按即法海觀瀾

十四 解釋人生問題，由淺至深。雖未能盡解，亦應先閱。

七 按即原人論

十五 略說學佛法者應發之心。宜後閱。

按即斐相勸發菩提心文

十六 義理深奧。宜最後閱。

按即華嚴念佛三昧論

十七 以下二種，皆說淨土法門。

六 按即淨土晨鐘

十八 先閱第六章，以後再從初閱起。

五 按即印光法師嘉言錄

十九 入門最佳之書。

一 按即李圓淨編佛法導論

二十 雖未能盡解，亦應先閱。佛法之源流派別略具之。

廿一 以輪擲之，極有興味。如世俗之陞官圖。

廿二 古辭典以下三種，隨時閱之。

廿三 記善惡報應等事。

廿四 古高僧事蹟。

廿五 文簡淨易閱。

廿六 見月律師自傳讀之最有趣味。

廿七 筆記以下三種，皆有興味，乞隨時閱之。

廿八 格言。

廿九 詩偈。

三十

二 按即楊仁山著佛教初學課本

八 按即選佛譜

按即釋氏要覽

按即釋門自鏡錄

按即釋氏蒙求

三 按即緇門崇行傳

四 按即一夢漫言

按即竹窗隨筆

按即榮根譚

按即寒山拾得詩

按即陽復齋詩偈

此書朽人處無有存者。福州諸善友處或有之。倘覓求此書不可得，下記數種，乞先閱覽。閱時宜緩緩研味，反覆尋覽，不可急速。

佛法導論

印光法師文鈔及嘉言錄

佛教初學課本

竹窗隨筆及二筆三筆

菲律賓諸善友來函，約朽人往彼弘法。不久啓程。勿勿略復，不宣。拙書一紙附奉上。農曆十月五日。音啓。

與王正邦居士

正邦居士道席。惠書誦悉。前由漳州到安海，住一月。近已返泉州，居承天寺。今年在各地弘法甚忙，法緣殊盛。在安海演講，聽衆近七百人。近返泉州，軍官來談者甚多。但自慚道德學問皆無成就，勉力支持，至用汗顏耳。前廣洽師所印拙書金剛經，所存無幾。此書接引新青年至爲逗機。軍官等閱此皆生善心，功德尤大。乞勸廣洽師發心募印再版。能印數千冊廣贈尤善。仍託上海費範九居士經手印刷，最善也。通訊處仍是威海衛路影印宋藏經會乞先通信接洽。不宣。演音啓。十月廿八日。

與慈航居士 六通

慈航居士文席。居漳半載，諸荷護念，至用感謝。擬於明晨啓行，未敢勞諸善友相送。將來有緣，仍可再來漳也。尊翁及尊元諸善友，均乞代爲致候。謹陳不宣。戊寅九月十二日。演音啓。以後如有屬書者，乞寫其名款寄下，並註明小聯或小中堂字樣，即可寫奉。無須寄紙來。倘寄紙來者，亦未能書寫也。若是出家



人或女居士，亦乞註明。其一

慈航居士慧覽。前上明信，想已達。二十日抵安海，居水心亭。約下月望後，乃他往。前在閩漳，與仁等時相過從，至爲歡忻。今離羣索居，悵惘何已。上海陳无我居士處，已致函託彼，常常寄諸佛書至尊寓，廣結善緣。他日倘收佛書後，乞隨時通信致謝。彼居上海慕爾鳴路第一百十一號第六號世界新聞社內。謹陳不宣。舊九月二十六日。演音啓。其二

慈航居士慧鑒。惠書誦悉。朽人居安海已近一月，講法數次，聽衆甚多，近七百人。不久，擬返泉州鄉間草庵。附奉三聯，一贈與楊遂厂，一贈與林春元，字仲山，麗華齋印泥店。一贈與王文象，即前余動身時送余乘船。

至石美者。均乞轉交爲感。弘化社寄來之書，乞隨意分贈，並乞贈二冊與郵局林植人居士，至禱。以後隨時有他處寄贈諸書，皆乞仁者隨意分配贈送，無須來函詢問也。不宣。演音。九月三十日。其三

慈航居士禮席。近奉惠書，悉尊慈謝世。承仁等誦經念佛之功德，當可往生善道，或生蓮邦，無復疑慮耳。朽人居安海一月，近返泉州居承天寺，明年暮春或往永春也。尊翁乞代致候。令兄伯初居士居香港久，當已歸信佛法，乞以人生指津與彼閱覽，應深生歡喜心也。以後各處寄佛書至尊處者，乞隨宜贈送。附寄人生之最後等一包，乞督收。演音啓。十月十五日。其四

慈航居士禮席。十七日所發惠書，誦悉。仁者善根深厚，發心歸信三寶，至可慶慰。擬定法名爲勝慈二字。

至於歸依儀式，俟將來晤面時乃可行之。附奉拙書一紙，即可證明仁者歸依之心已成就也。謹復，不宜演音啓。戊寅十一月廿四日。自十二月一日暫閉關用功，俟數月後乃可通信。附白。其五

慈航居士禮席。本擬掩關習靜數月，乃人事紛忙，竟未如願。到泉州後，已寫字五百件左右，近復編錄安海講稿，明正即可付印。二月擬往永春，因久已約定，不得不往也。劉綿松居士青年好學，篤信佛法，以後擬常常訪謁仁者，乞延接晤談爲禱。謹達，不宜。舊十二月十五日。演音啓。其六

## 與健 魂居士

健魂居士文席。惠書，忻悉一一。諸荷護念，感謝無盡。曷因傳貫師勸，往菲延期，遂免於難。否則囚居古浪矣。但對付敵難，捨身殉教，朽人於四年前已有決心，曾與傳貫師等言及。古詩云：「莫嫌老圃秋容淡，猶有黃花晚節香。」吾人一生之中，晚節最爲要緊，願與仁等共勉之也。屬書三紙，已就，附奉上。小字一幅，俟天晴時寫。將來若能與豐居士通信時，當達尊意。謹復，不宜。農曆十月二十五日。音啓。此小字心經一紙，爲特別寫件。乞暫秘藏，勿示他人，恐他人援例請求也。又附奉上單款寫件四紙，乞隨意贈送。此次所用上海宣紙，爲友人所贈，殊不易得也。附白。

## 與伯衡居士

曩承過談，歡忭靡已。蓮華寺主淵法師奉謁左右，乞仁書聯。莊嚴梵室，句爲朽人舊撰，未審可用。不別紙委寫，以奉慧覽。略致誠款，無復覲縷。伯衡居士丈室。正月廿日。曇昉疏。

## 與拯邦居士

拯邦居士道鑒。屢荷惠施，枇杷膏，感謝無盡。今正元旦始，已講律典。老體尙健，獲服良藥，當益康勝耳。謹復，不宜。演音啓。

## 與一乘居士

一乘居士慧覽。正月二十七日所發尊函，數日前始遞到。性願法師往菲律賓已數載，故前函遺失。朽人不久亦往菲島。仁者禮佛誦經，精進無懈，至用歡慰。附奉上拙書二紙，希受收。不宜。農曆十月初十日。音啓。



## 與詞源居士

詞源居士慧覽。在安海居住一月。前日至草庵。因故。已辭謝惠安崑山之事。現暫住草庵。稍遲或往他方也。通訊。仍由泉州承天寺轉交。謹達。不宣。十二月十四日。演音啓。

## 與勝順居士

勝順居士鑒。送上拾圓。歸併救濟貧人款內。乞收入。再者。前商會送來之寫件。內有款字不明瞭者。附貼奉。乞轉詢示知爲盼。十二月初八日。弘一上。

## 與春發居士

春發居士朗鑒。前屬書中幅。已寫就。乞仁者來寺。向性常法師領取。爲盼。謹達。不宣。庚辰元旦晨。弘一啓。

## 與宏智女居士等

宏智老女居士  
腰女居士

全覽。屢承護法。厚施一切。至用感謝。茲有陳者。覺圓法師即擬隨余往閩東。專心用功。暫

未能返泉。彼有老母，現住惠安，未能放心。務乞仁者代爲照拂一切。倘有病苦，或命終時，更乞輔助一切，並念佛資其往生極樂世界。感謝無盡。謹此代懇。諸希慈察。不宣。弘一啓。四月十四日。

## 與俗姪晉章居士 六通

寄上寫經一包，乞收入。其中梵網經多二冊，乞轉贈幼樵品候。二居士爲禱。今年六月初五日爲令祖百二十歲冥誕，仁者應寫經迴向，如何。謹達，不具。五月八日。演音啓。其一

晉章居士慧鑒。到廈門已旬日。前屬爲姚仲矩居士哲嗣書佛號，乞示其名字。附一紙乞交徐居士。廈門榴花盛開，結實甚大，猶著單衣。以後惠書，寄廈門中山公園東門內妙釋寺轉交爲宜。舊十一月十日，演音疏。其二

惠書，誦悉。屬寫各件，俟稍遲書就，一併寄奉。數年前上海報已載余圓寂之事，今爲第二次。記載失實，報中常常有之，無足異也。廈門天氣甚暖，余唯著一件布小衫，一件夏布大衫，出門須執傘，與津地八月底天氣相似。榴花，桂花，白蘭花，菊花，山茶花，水仙花同時盛開。星命家言，余之壽命與尊公相似，亦在六十歲或六十一歲之數。壽命修短，本不足道，姑妄言之可耳。「洗心人讀經室」額紙後方，擬留空白尺餘，由仁者自跋一段，說明此事之因緣。舊十一月廿八日。演音啓。其三

前奉明片，想已收到。茲有奉託者二事：一、乞仁者爲余刻印二三方，寄下以爲紀念。其文字乞於下列數名中隨意選之。「亡言，无得，吉目，勝音，無畏，大慈，大方廣，音弘。」二、四十年前津人習白摺小楷，恆用「昨非錄」，係翰林分寫小楷石印精本，共二冊。其文字皆嘉言懿行，頗可流傳。乞向舊書鋪或親友處覓求一部，惠施寄下至感。寄圖章時，甚費周折，乞向郵局詢問爲要。演音啓。其四

惠書，誦悉。印石已收到，篆刻甚佳。所屬各事，稍暇製就郵奉。先此奉答。雄河居士演音啓。舊二月八日。其五

惠書誦悉。承惠施佛像，「昨非錄」至用感謝。在此講律將畢，即擬往百里外山中度夏。郵政不通以後，乞暫勿通訊。俟秋涼時，返廈門再奉告也。雄河居士演音疏。三月十日。其六

## 與夏丐尊居士九十四通

賜箋敬悉。居士戒除葷酒至善。至善父病日劇，宜爲說念佛往生之法。臨終一念，最爲緊要。臨終時，多生多劫以來善惡之業，一齊現前，可畏也。但能正念分明，念佛不輟，即往生可必。釋迦牟尼佛所說，十方諸佛所普讚，豈有虛語。自力不足，居士能助念之，尤善。勸親生西方，脫離生死輪迴，世間大孝，寧有逾於是者。臨終時，萬不可使家人環繞，妨其正念。氣絕一小時，乃許家人入室舉哀，至要至要。淨土經論集說，昭慶經房皆備，



可以請閱。聞范居士將來杭，在佚生校內講起信論。父病少間，居士可以往聽。紫柏老人集如未送還，希託佚生轉奉范居士。不慧入山後，氣體殊適，可毋念。丐尊大士坐下，演音稽首。六月十八日。其一

銀鐲古研敬受。判教宜先看五教，再閱四教。選佛譜宜每日擲數次。名位繁瑣，非如是不易記憶也。卒復丐尊居士小額附奉。演音。其二

前日葉子來談，藉悉起居勝常爲慰。南京版四書小參中庸直指，仁者如已請來，希假一誦。否則乞詢佚生或有之。俟他日有人來帶下，不急需也。歸元鏡昭慶版頗有可觀，曩以其爲戲曲，甚輕視之。今偶檢閱，詞旨警切，感人甚深。願仁者請閱，並傳示同人。近作一偈附寫奉覽，不具。丐尊居士釋演音。三月十一日。其三

曩承遠送，深感厚誼。來新居樓居士家數日，將於二日後入山。七月十三日掩關，以是日爲音髻染二周年也。吳建東居士前屬撰楊溪尾惠濟橋記，音以掩關期近，未暇構思，願賢首代我爲之。某氏所撰草稿附奉，以備參考。撰就希交吳居士收。相見無日，幸各努力，勿放逸。不一。丐尊居士文席。演音。六月廿五日。

其四

江千之別，有如昨日。吳子書來，知仁歸臥湖上，脫屣塵勞，甚善甚善。余以是歲春殘始來永寧，寓溫州南門外城下寮，掩室謝客，一心念佛。將以二載圓成其願。仁者邇來精進何似？衰老寢至，幸宜早自努力。義海淵微未易窮，討念佛一法最契時機。印老文鈔宜熟覽，翫味自知其下手處也。可先閱其書札一類。仁或

來甌，希於半月前，先以書達，當可晉接。秋涼，惟珍重不具。丐尊居士，便中代求松煙墨二錠寄下。演音八月廿七夕。其五

因事留滯泉州，秋晚乃可入山也。今年未能北上。前承尊戚施眼鏡，甚爲適用。但攜帶未能輕便。仁者前用之眼鏡，如已不合用，聞人云，近十年即須換。乞以惠施。因余猶可適用此光也。且備有兩具，萬一有破碎，亦可資急需。至鏡邊金質，可用他物塗之，無有礙也。惟付郵寄下，頗非易事，或致途中破損。乞託眼鏡公司代寄，當妥善也。惠書，仍寄廈門轉泉州大開元寺。二月後乃移居。丐尊居士道鑒。演音啓。其六

丐尊居士道席。惠書，具悉。承施目魚，此名馬居士定。感謝無盡。印西師盛意，至用銘感。近年來雖無大病，但衰老日甚，殊畏寒暑。閩南氣候調和，適於療養，故暫未能北上，至用歉然。稍緩即擬移居山中。希施資貳拾圓，付郵滙下，以備雜用，甚感。謹復，不宣。八月廿二日。演音疏。其七

丐尊居士。惠書，忻悉。一一。攝影甚美，可喜。山房建築，於美觀上，甚能注意，聞多出於石禪之計劃也。石禪新居，由山房望之，不啻一幅畫圖。後方之松樹配置甚好。彼云，曾費心力，慘淡經營。良由以也。現在余雖不能久住山房，但因寺院充公之說，時有所聞，未雨綢繆，早建此新居，貯蓄道糧，他年寺制或有重大之變化，亦可毫無憂慮，仍能安居度日。故余對於山房建築落成，深爲慶慰，甚感仁者護法之厚意也。秋後往閩閉關之事，是爲宿願，未能中止。他年仍可來居山房，終以此處爲久居之地也。以上之意，如仁者與發起諸居士及

施資諸居士晤面之時，乞爲代達。因恐他人以新居初成，即往他方或致疑訝者，故乞仁者善爲之解釋，俾令大衆同生歡喜之心也。數日以來，承尊宅餽贈食品，助理雜務，一切順適，至用感謝。順達，不具重陽朝演音答。其八

丐尊居士惠書，誦悉。至白馬湖後，諸事安適。至用忻慰。廁所及廚竈已動工構造。廚房用具等，擬於明後日，請惟淨法師偕工人至百官購買。彼有多年理事之經驗，諸事內行，必能措置妥善也。山房可以自炊，不用侍者。今日擬向章君處領洋十五圓，購廚房用具及食用油鹽米豆等物。其將來按月領款辦法，俟與仁者晤面時詳酌。立會經理此款資，甚善。擬即請發起人爲董事。其名目乞仁者等酌定。以後每月領取之食用費作爲此會布施之義而領受之。每月數目不能一定。因有時住二人，或有時僅一人，或三人。此事俟晤面時詳酌。以後自炊之時，尊園菜蔬，由尊處斟酌隨時布施。此事乞於便中寫家書時提及，由使人送來，不須每日送。一切菜蔬皆可食，無須選擇也。草草復此，餘俟面談。聯輝居士竭誠招待一切，至可感謝。不宜舊八月廿九日演音上。外五紙乞交子愷居士。其九

丐尊居士惠書

誦悉。承由尊宅送到書籍及惠施器物，至用感謝。宿疾已漸愈。質平前日來此，二宿

而去。佩弦居士及尊眷屬書之幅，已寫就。俟後面呈臨古法書承爲代寄，甚感。謹復，不具。舊七月八日演音。倘有向尊處詢問余之蹤跡者，乞答以遷居他方，未能見客及通信。現住之地及寺名，乞勿告知。其十



子尊 居士全覽。前日寄奉一函，想已收到。至白馬湖後，承夏宅及諸居士輔助一切，甚爲感謝。前者仁等來函，曾云山房若住三人，其經費亦可足用云云。朽人因思，現在即迎請弘祥師來此同住。以後朽人每年在外恆留數月，則山房之中居住者有時三人，有時二人，其經費當可十分足用也。仁等於舊曆九月月望以後，即陽曆十月十七八日以後，來白馬湖時，擬請由上海繞道杭州，代朽人迎請弘祥師，偕同由紹興來白馬湖。弘祥師之行李，乞仁等代爲照料。至用感謝。迎請弘祥師時，其應注意者，如下數則：（一）仁等往杭州時，宜乘上午火車至閘口。即至閘口虎跑寺，訪弘祥師。仁等即可居住虎跑寺一宿。次晨，偕同過江，往紹興。所以欲仁等正午到杭州者，因可令弘祥師於下午收拾行李，俾次晨即可動身。（二）仁等晤弘祥師時，乞云：「今代表弘一師迎請弘祥師往他處閉關用功。其地甚爲幽靜，諸事無慮，護法之人甚多。但不是寺院，亦不能供養多人。僅能請弘祥師一人，往彼處居住。倘有他位法師欲偕往者，一概謝絕。即請弘祥師收拾行李。所有物件，皆可帶去。明晨，即一同動身云云。」（三）弘祥師倘問，其地在何處。仁等可答云：「現在無須問，明日到時便知。」其餘凡有所問，皆不必明答。朽人之意，不欲向他僧衆傳揚此事。因恐他僧衆倘有來白馬湖訪問者，招待對付之事甚爲困難。故不欲發表住處之地址也。（四）並乞仁等告知弘祥師云：「此次動身他往，不必告知弘傘師。」恐弘傘師挽留，反多周折也。（五）朽人自昔以來，凡信佛法，出家，拜師傳等，皆弘祥師爲之指導一切。受恩甚深，無以爲報。今由

仁等發起建此山房。故欲迎養，聊報恩德於萬一也。弘祥師所有錢財無多。其由開口至白馬湖種種費用，皆乞仁等惠施，感同身受。（六）朽人有謝客啓，附奉上一紙，託弘祥師代送虎跑庫房，令衆傳觀。以上所陳諸瑣碎事，皆乞鑒察。種種費神，感謝無盡。再者，朽人於今者，已與蘇居士約定，於晚秋冬初之時，往福建一行。故擬於陰曆九月底，即往上海，或小住數日，或即乘船而行。並乞仁等便中代爲詢問。太古公司往廈門及往福州之輪船，其開行之時間，是否有一定之規例？如寧波船決定五時開，長江船決定半夜

開之例。此所詢問者，爲時間，非是日期。因日期可閱報紙也。瑣陳草草，不宜。十日三日。演音上。其十一

惠書，誦悉。仁者有疾，行旅未便，本月可以不來。白馬湖朽人於下旬即往上海，當可晤談也。子愷校課與譯務皆甚忙，亦可不來。杭州之事，可以稍緩無妨也。幸勿拘執俗禮。至禱。九月初五日。演音上。其十二

丐尊居士前寄寫經續寄一函，想悉收到。余擬於新曆六月五日，星期四，到寧波。三日自溫動身，在北門白衣寺暫住二三日。乞仁者於六日，星期五，或七日，星期六，自上海搭輪船來爲盼。仁者到寧波時，乞坐人力車，至北門白衣寺。車力約二角餘。到白衣寺，乞問慧性師。倘云不知，乞問念佛堂內出塵老和尚，由彼二人可以引導與余晤談也。有應商酌之事，統俟面談。乞仁者先去信，託尊府人到山房灑掃。又如有寄與弘一之信，乞代收。云云。臨古法書出版後，乞更改寄處如下。前紙作廢。福建泉州承天寺性願法師三十

冊，廈門南普陀大醒法師二十冊，溫州大南門慶福寺因弘法師二十冊，天津河東山西會館南李晉章

居士二十冊，白馬湖弘一十冊，共百冊。種種費神，至爲感謝。附一紙，乞交豐居士。新曆五月廿九日。演音。

其十三

丐尊居士移居之事，諸承護念，感謝無盡。居此已數日，至爲安適。氣候與普陀相似。蚊蠅等甚稀，用功最爲相宜。居此山中，與閉關無以異也。以後出家在家諸師友，有詢問余之蹤跡者，乞告以雲游他方，謝客用功，未能通訊及晤談。云云。附一紙，便中乞交豐居士。不具。演音。本市有工人一名，每日至余處送飯送開水及其他雜事，甚爲精勤。每月似應以資酬謝，與贈送寺中伙食費同時交去。每月應付寺中之伙食費及工人費，擬請由山房存款利息內支付。因余居彼居此，無以異也。前存泉州行李三件，擬託彼覓便人帶至上海，送存江南銀行。乞仁者爲寫一憑信，寄至余處，轉爲寄去。信函寫外行李三件，送交寧波路乞寫極詳細之地址。江南銀行某人收。云云。信內乞寫託其收下，覓便帶至白馬湖夏寓。寧波路之地址，能繪一圖尤善。因外鄉之人，不易尋覓也。附白。其十四

丐尊居士昔承過談，至爲感慰。朽人於八月十一日患傷寒，發熱甚劇，殆不省人事。入夜兼痢疾，延至十四日乃稍愈。至昨日十八日，已獲全愈，飲食如常，惟力疲耳。此次患病頗重，倘療養不能如法，可以纏綿數月。幸朽人稍知醫理，自己覓舊存之藥服之，並斷食一日，減食數日，遂能早痊。此病照例須半月或兩旬。出意料之外耳。未曾延醫市藥，故費用無多，僅半圓餘耳。買綠豆、冬瓜、蘿蔔等。前存之痧藥等，大半用罄，惟



餘藥水半瓶。乞仁者便中託人代購下記之藥以惠施。他日覓便帶下。因山居若遇急病，難覓醫藥。即非急病，亦甚困難。故不得不稍有儲蓄耳。藥名另寫一紙。如此之重病，朽人已多年未患。今以五十之年而患此病，又深感病中起立做事之困難，無有看病之人，故於此娑婆世界已不再生貪戀之想。惟冀早生西方耳。陽曆九月十日以後，仁者或可返里。其時天氣已漸涼爽。已過白露節。乞惠臨法界寺，與住持預商臨終助念及身後之事，至爲感企。此次病劇之時，深悔未曾預備遺囑。助念等事。故猶未能一意求生西方，惟希病愈，良用自慚耳。今病已癒，乞仁者萬勿挂念。豐居士并此致候。不具。八月十九晨演音。其十五

巧尊居士。今晨奉惠書，具悉一一。重陽前後，朽人曾寄信片至開明，通告九月未能返白馬湖。想已遺失。致勞遠念，深爲歉然。日報所載，有傳聞失實處。此書版，舊藏福州鼓山，久無人知。朽人前年無意中見之。乃勸蘇居士印廿五部，以十二部贈與日邦。按吾國江浙舊經版，經洪楊之亂，皆成灰燼。最古者，惟有北京龍藏版大約雍正時刻。今此華嚴經疏論纂要，爲康熙時版。或爲吾國現存之最古之經版，亦未可知也。此意便中乞告內山居士。此外，彼處尚有古版數種，甚盼將來有人印刷流布。附一紙，乞呈西田大士，並希致候，不宣音復。承詢所需，深爲感謝。現無需用，俟後奉達。返白馬湖期，俟講經圓滿再訂。現在每日聽靜權法師講地藏菩薩本願經。白衣寺孤兒院事，甚爲棘手，擬暫緩往。子愷居士處久未通訊，甚爲思念。乞代致候。三年前，往內山居士處時，見其屋隅，即陳列佛書之處，有黃皮厚冊之華嚴……忘其名，爲華嚴概論。

之類。現朽人甚思得此書。他日如仁者見內山居士時，乞爲一詢。如無，亦無妨也。此書倘承惠寄，乞交二馬路全盛信局，即可寄至慈北鳴鶴場，或交郵局，亦可。附白。十二月二日。其十六

丐尊居士慧覽。前上書，想已收到。舊曆明年正月元宵後，即擬覓便返法界寺。極遲或延至正月月底，必可到法界也。其時當先到尊寓午餐，然後乘船而往。再者，前至寧波時，偶一不慎，將衣袋中之鈔票一包，完全遺落。幸得友人資助，得以動身至溫州。將來由溫返白馬湖時，所需路費及買物等費，仍乞護法會有以施助，至爲感荷。以前在閩南過冬兩年，無有所苦。今歲驟值奇寒，老體已不能支持。明冬如仍在世，祇可再往閩南過冬矣。謹達，不具。音上。立春後一日。其十七

丐尊居士兩奉惠書，具悉一一。諸承慈念，感謝無既。茲奉上鈔票洋十八圓。乞便中託人到郵局，以十七圓五角匯往南京。滙票上寫法滙款人，上海兆豐路口開明書店夏丐尊收。款人，南京延齡巷馬路金陵刻經處。所餘之五角，即作爲滙費及掛號信費等可也。附信一件，未封口，乞託人將滙票裝入代爲封口寄去爲禱。種種費神，感激無盡。不具。演音疏。其十八

丐尊居士南京經書已寄到，乞勿念。居法界月餘，甚安。與閉關無以異也。以後倘有出家在家之人，向仁者詢問余之近狀者，乞告以隱遯用功，不再晤面及通信。現住之處勿告彼，云云。他日仁者返白馬湖時，乞惠臨一談，爲禱。閏月十日。音上。其十九

丐尊居士慧覽。紹興諸居士等，盼望朽人往彼一游，甚切。擬二三日即動身往紹。將來或順便至杭滬，亦未可定也。俟返法界寺時，再致函奉達。前得黃寄慈居士函，謂彼校頗欲以拙書臨古印本爲習字用，惜其定價太昂云云。可否乞仁者轉商諸章居士，另印江南連史紙，粗率裝訂者發行，則定價可在六七角也。不宣。中秋節。演音上。其二十

前質平來函，謂歌集不久即可出版，至用感慰。承寄五十冊，乞分寄下記之二處。十冊寄廈門轉泉州大

開元寺內慈兒院葉宗

擇定

二居士收。四十冊寄廈門鼓浪嶼日光巖弘一收。以後通訊處，即改爲鼓浪嶼

日光巖，勿再寄至南普陀也。音啓。其二十一

昨誦惠書，承施資至感，已甚足用。山房潮氣全除，至用忻慰。唯此次余返驛亭時，僅攜帶薄棉被一件。其他蚊帳被褥等，皆存在法界寺中，以是之故，未能在山房止宿。且俟秋涼時，再當來山房也。動身之時未定。早者二十左右，至遲者在月底。謹復，不具。音上。正月初九日。其二十二

返山房後，諸承照料，感謝無盡。子淵及尊府送來燒餅甚多。乞仁者勿再買餅乾，亦勿買罐頭。閉門用功之廣告，擬即日貼於門外。不俟七月六日。但此是對外方人，若仁等則非此限也。白衣寺安心頭陀，今日來山房，聲淚俱下，約余往甬。泥水工人，昨日已做工一日。因天氣陰雨無定，囑彼暫止。以後如有出家人在家人等，向尊處或子愷處，詢問余之消息，乞告以不晤客，不通信等。音上。佛教大辭典太笨重，現在亦



不披閱，乞仍存滬上。倘他日子愷往嘉興時，乞彼於便中帶交「第二中學蔡丐因收。」但不必急急也。又白。其二十三

前復函，想已收到。前存開明發行所之五戒相經及有部毘奈耶，並存尊處之吳夢非居士由南京請來佛經等，皆乞託人於陰曆九月二十日以前帶至白馬湖，爲禱。九月十二日。演音上。其二十四

承託佛學書局所寄之書，已收到。感謝無盡。講經即將圓滿。拙人因天氣太寒，骨節凝痛，困苦殊甚。不得已，擬於五六天後，即往溫州，在彼過年。春暖之後，再當返法界寺。知承遠念，謹聞。不宜。十二月廿六日。音上。以後通訊，乞寄溫州大南門慶福寺。其二十五

別後，安抵廈門，寓太平巖，暫不往泉州。以後通訊，乞寄廈門南普陀閩南佛學院轉交弘一收。小冊之護生畫集，再乞向李居士請施八十餘冊。再多更善。寄至佛學院，交余手收。因將以是分贈院中諸學僧及教職員等也。質平處之住址，已記不清楚。乞仁者費神，將余通訊之處告彼。並乞彼將其通訊之處告知余也。夏居士章居士陶居士等，乞便中代爲致候。並謝余在滬時，承招待之厚情。演音上。舊十月四日。其二十六

丐尊居士來廈門後，居太平巖。擬暫不往泉州，因開元寺有軍隊多人駐紮也。臨古法書序文寫就，附以奉覽。此書出版之後，余不欲受領版稅。即分取售得之資。因身爲沙門，若受此財，於心不安。倘書店願有以

酬報者，乞於每版印刷時，贈余印本若干冊，當爲之分贈結緣，是固余所歡喜仰望者也。將來字模製就，印佛書時，亦乞依此法，每次贈余原書若干冊。此意便中乞與章居士談之，並乞代爲致候。字模之字，決定用時路之體。不固執己見。其形大致如下。將來再加練習，可較此爲佳。

字與字之間，皆有適宜之空白。將來排版之時，可以不必另加鉛條隔之。惟雙行小註，仍宜加鉛條間隔耳。或以四小字占一大字之地位，圈點免去。此事俟將來再詳酌。是間氣候甚暖。日間僅著布小衫一件，早晚則著兩三件。老病之體，甚爲安適。附一紙及滙票，乞交子愷。演音上。其二十七

前郵信片，想已收到。拙書集出版之時，乞檢三十冊寄福建泉州承天寺性願法師收。再檢三十冊寄溫州大南門外慶福寺因弘法師收。並乞掛號，至爲感謝。模字，擬於二三日後即動手書寫。先寫七百字寄上。俟命工鐫刻時，再繼續書寫他字。附聞。二月十一日。演音。其二十八

昨日南普陀送來尊函，及格紙一包，白紙一包，悉已收到。所云字典等一包，想不久亦可寄到。有邵毘柰

耶，請李居士轉交四川徐耀遠居士。承夏居士轉到孫居士一函一片，悉已收到。此事於前函中似已提及。護生信箋，乞即選定并示知其格式，即爲書寫以前屬寫。各件除銅模字須明年乃可奉，其餘各件不久即可寫好郵呈。所有書物等，均乞暫存尊處，俟明年再斟酌辦法。演音。其二十九

書悉。自慚涼德，本無可傳。擬自記舊事數則，或足以資他人改過遷善之一助爾。稍遲當寫奉，不宜。六月十日。演音。其三十

爾來患神經衰弱甚劇。今年擬即在此靜養，不再他往。晚晴山房若無人居住，恐致朽壞。如惟淨師能來住，甚善。否則或請弘祥師，或他人入內住之。此事乞仁者斟酌爲禱。信箋附掛號寄上，乞收入。銅模之字，俟病愈後再執筆。歲晚移居泉州山中，以後惠函，乞寄福建泉州洪瀨雪峯寺弘一收。正月初七日。演音。子愷居士乞致候。其三十一

惠書並施金，悉收到，感謝無盡。擬於舊三月初旬動身，先至溫州。由福州往，不過上海。俟下半年，再至白馬湖。因質平屬撰歌詞，須在溫州撰。彼寺中經書齊備，可資檢閱也。以後惠書，乞寄溫州慶福寺弘一收。謹復。演音。舊二月望日。其三十二

丐尊居士道席。一月半前，因往鄉間講經，居於黑暗室中，感受污濁之空氣，遂發大熱，神志昏迷，復起皮膚外症極重。此次大病爲生平所未經過。雖極痛苦，幸佛法自慰，精神上尙能安也。其中有數日病勢凶



險，已瀕於危，有諸善友爲之誦經懺悔，乃轉危爲安。近十日來，飲食如常，熱已退盡。惟外症不能速愈，故至今仍臥牀上不能履地，大約再經一二月乃能全愈也。前年承護法會施資請購日本古書，其書店爲名古屋中區門前町其中堂。獲益甚大。今擬繼續購請，乞再賜日金六百圓，託內山書店交銀行匯去，購書單一紙附奉上，亦乞託內山轉寄爲感。此次大病，居鄉間寺內，承寺中種種優待，一切費用皆寺中出，其數甚巨，又能熱心看病，誠可感也。乞另滙下四十圓，交南普陀寺廣洽法師轉交弘一收。但信面乞寫廣洽法師之名，可以由彼代拆信代領款也。此四十圓，以二十圓贈與寺中，以他種名義，其餘二十圓自用。屢荷厚施，感謝無盡。演音啓。舊正月初八日。以後通信，乞寄「廈門南普陀寺養正院廣洽法師轉交」。余約於病愈春暖後，移居廈門。又白。其三十三

丐尊居士道席。前復明信，想已收到。宿疾約再遲一月，可以全愈。此次請黃博士治療，彼本不欲收費。惟電火藥物等實費，統計約近百金。若不稍爲補助，似有未可。擬贈以廈門日本藥房禮券五十圓一紙及拙書等。此款乞便中於護法會資支寄惠施，至用感謝。此次大病，內外症並發，爲生平所未經過，歷時近半載，九死一生。雖肉體頗受痛苦，但於佛法頗能實地經驗，受大利益，亦昔所未有者也。謹陳，不宜。三月廿八日。演音疏。以後通訊，乞寫「廈門南普陀寺養正院轉交」。後天起，在此講律。約一月餘講畢，移居鼓浪嶼。通信處仍舊由養正院轉。其三十四

惠書，誦悉。宿病已由日本醫學博士黃丙丁君診治，十分穩妥，不久即可痊愈，希釋懷念。其中堂信已直接寄去。江翼時居士所寄之書，已收到。種種費神，至用感謝。不宜演音啓。往黃博士處診治，乃由友人介紹，已去十餘次，用電療及注射等需費甚多。將來或唯收實費，或完全贈送，尙未知悉。俟後由友人探詢清楚，再以奉聞。附白。其三十五

前函初發出，即奉到開明所寄書籍一包。乞便中代達子愷居士。諸承費神，感謝無盡。閏五月十五日。演音啓。其三十六

惠書，昨晚誦悉。是間近來大兵雲集，各大寺院皆住滿。以前所云在此靜修之事，恐難成就。且俟下月再酌定可也。弘祥師之事，今由余詳思，似須余親往商量，決定可否，乃爲穩妥。倘余於春暖之時返浙者，即擬親往杭州一行也。旅費已不足，擬請仁等爲集資十五圓，滙下存貯。倘於春暖返浙，即以此費充之。萬一仍居閩地者，當存貯此費，以備他日旅行用也。惠書乞寄福建泉州城內承天寺轉交弘一收。滙款之時，亦依此地址書寫。以後乞勿再寄洪瀨。因彼處不穩妥，或致遺失也。不具。子愷居士乞代致候。正月晦日。演音。其三十七

惠書，誦悉。至用感謝。畫集即可收到。講律尙須繼續，今年或不能北上也。不宜演音啓。兩旬之後，擬往百里外山中避暑，乞暫勿來信。將來住處定後，再以奉聞。附白。其三十八

惠書誦悉。承詢所需，至用感謝。此次由閩至溫，旅費甚省。故尚有餘資。宿疾本因路途辛勞所致，今已瘳十之九。銅模字即可書寫。擬先寫千餘字寄上。俟動工鑄刻後，再繼續書寫其餘者。今細檢商務鉛字樣本，至爲繁雜。有應用之字而不列入者。有康熙字典所未載之僻字及俗體字，而反列入者。若依此書寫，殊不適用。今擬改依中華新字典所載者書寫，而略增加。總以適用於排印佛書及古書等爲主。倘有欠缺，他時尚可隨時補寫也。墓誌造像不列目錄，甚善。佛教大辭典，是否仍存在尊處？因嘉興前來書謂未曾收到。如未送去，仍以存尊處爲宜。陽曆四月十九日寄掛號信與上海美專劉質平居士。至今半月餘，無有復音。乞爲探詢，質平是否仍在美專，或在他處。便中示知爲感。演音。陽曆五月六日。其三十九

昨復一片，想已收到。此次寫銅模字，悉據商務新字典。前片云中華新字典者，非也。所載之字，去其鈐腺呎等新造之字，而將拾遺門之字擇要增入。並再參考康熙字典，增加其適用之字。如丐字等。先依此寫成一部。以後倘有缺少者，可以隨時增入也。擬先寫卅紙奉上。計一千〇五十字。俟動工鑄刻後，乞即示知再當續寫。前寄樣紙兩張，作廢。今擬重新書寫也。大約十天後，即可寫就奉上。書寫模字最應注意者，爲全部之字，須筆畫粗細及結構相同。必能如是，將來拆開排列之時，其字乃能勻稱。又寫時，於紙下襯一格紙。每字中畫一直線。依此直線書寫，則氣乃連貫。將來拆開排列時，氣亦連貫矣。今夏或遲至秋中，余決定來白馬湖正式嚴格閉關。詳情後達，先此略白。山房存米甚多。乞令他人先取食之。俟余至山房，再



買新米。演音。其四十

丐尊居士。到溫後，即奉上明信，想已收到。銅模字已試寫二頁，奉上。乞與開明主人酌核。余近來精神衰頹，目力昏花。若寫此體，或稍有把握，前後可以大致一律。若改寫他體，恐難一律。故先以此樣子奉呈。倘可用者，余即續寫。否則擬即作罷。他體不能書寫。所存之格紙，擬寫小經一卷，以奉開明主人，爲紀念可耳。此次旅途甚受辛苦。至今喉痛及稍發熱咳嗽頭昏等症，相繼而作。近來余深感娑婆之苦，欲早命終往生西方耳。謹陳，并候回玉。舊三月晦日。演音。其四十一

丐尊居士。前奉上二片，想已收到。銅模已試寫三十頁，費盡心力，務求其大小勻稱。但其結果，仍未能滿意。現由余細詳思維，此事只可中止。其原因如下：（一）此事向無有創辦者，想必有困難之處。今余試之，果然困難。因字之大小與筆畫之粗細及結體之或長或方或扁，皆難一律。今余書寫之字，依整張之紙看之，似甚齊整。但若拆開，以異部之字數紙，如口、尸、匕、ル等，拼集作爲一行觀之，則弱點畢露，甚爲難看。余曾屢次試驗，極爲掃興。故擬中止。（二）去年應允此事之時，未經詳細考慮。今既書寫之時，乃知其中有種種之字，爲出家人書寫甚不合宜者。如刀部中殘酷凶惡之字甚多。又女部中更不堪言。尸部中更有極穢之字。余殊不願執筆書寫。此爲第二之原因。此原因甚爲重要。（三）余近來眼有病。戴眼鏡久，則眼痛。將來或患增劇，即不得不停止寫字。則此事亦終不能完畢。與其將來功虧一簣，不如現在即

停止。此爲第三之原因。余素重然諾，決不願食言。今此事實有不得已之種種苦衷。務乞仁者向開明主人之前代爲求其寬恕諒解，至爲感禱。所餘之紙，擬書寫短篇之佛經三種，如心經之類是，以塞其責。聊贖余罪。前寄來之碑帖等，余已贈與泉州某師。又新字典及鉛字樣本并未書寫之紅方格紙，亦乞悉贈與余。至爲感謝。余近來精神衰頹，遠不如去秋晤談時之形狀。質平前屬撰之歌集，亦屢構思，竟不能成一章。止可食言而中止耳。余年老矣，屢爲食言之事。日夜自思，殊爲抱愧。然亦無可如何耳。務乞多多原諒。至感。至感。已寫之三十張奉上，乞收入。舊四月十二日。演音上。其四十二

丐尊居士頃誦尊函，並金二十圓，感謝無盡。余近來衰病之由，未曾詳告仁者。今略記之如下。去秋往廈門後，身體甚健。今年正月舊曆，以下同。在承天寺居住之時，寺中駐兵五百餘人。距余居室數丈之處，練習放槍並學吹喇叭及其他體操唱歌等。有種種之聲音，驚恐擾亂，晝夜不寧。而余則竭力忍耐。至三月中旬乃動身歸來。輪舟之中，又與兵士二百餘人同乘。由彼等封船。種種逼迫，種種污穢，殆非言語可以形容。共同乘二晝夜，乃至福州。余雖強自支持，但腦神經已受重傷。故至溫州，身心已疲勞萬分。遂即致疾。至今猶未十分痊愈。慶福寺中，在余歸來之前數日，亦駐有兵士，至今未退。樓窗前二丈之外，亦駐有多數之兵。雖亦有放槍喧嘩等事，但較在福建時則勝多多矣。所謂秋荼之甘，或云如薺也。余自念此種逆惱之境，爲生平所未經歷者。定是宿世惡業所感，有此苦報。故余雖身心備受諸苦，而道念頗有增進。

佛說八苦爲八師，洵精確之定論也。余自經種種摧折，於世間諸事絕少興味。不久即正式閉關，不再與世人往來矣。以上之事，乞與子愷一談。他人之處，無須提及，爲要。以後通信，唯有仁者及子愷質平等。其他如廈門、杭州等處，皆致函訣別，盡此形壽，不再晤面及通信等。以後他人如向仁者或子愷詢問余之蹤跡者，乞以雖存如歿四字答之，並告以萬勿訪問及通信等。質平處，余亦爲彼寫經等以塞其責，並致書謝罪。現在諸事皆已結束。惟有徐蔚如編校華嚴疏鈔，屬余參訂，須隨時通信。返山房之事，尙須斟酌。俟後奉達。臨動身時當通知。山房之中，乞勿添製紗窗。因余向來不喜此物。山房地較高，蚊不多也。余現在無大病。惟身心衰弱。又手顫眼花，神昏臂痛，不易舉，凡此皆衰老之相耳。甚願早生西方。謹復，不具一一。舊四月廿八日。演音。馬居士石圖章一包，前存子愷處。乞託彼便中交去，並向馬居士致訣別之意。今後不再通信及晤面矣。其四十三

丐尊居士慧鑒。前日奉手書，忻悉一一。承寄之書籍，昨日已收到。茲寄上拙書二紙，一贈天香大士，一贈內山居士。附郵挂號奉上。附呈致小樓居士一紙，乞轉交。又致內山居士三紙，乞轉交。並乞爲說明其意，因彼不甚解漢文也。又請經目錄一紙，乞於晚晴護法會支洋三十圓，託人持此目錄，往北火車站東首寶山路口佛學書局購請。並託佛學書局代寄。即將郵資及掛號資付清。所餘之零資，乞購郵票，於他日便中寄下。種種費神，感謝無盡。又致豐居士一紙，亦乞於便中轉交。及附奉拙書六紙，乞隨意轉贈他人。



結緣。此六紙別挂號寄上。十二月十四日。演音疏。其四十四

惠書誦悉。承施資請辭彙，至感。拙書附寄上，乞收入。晚晴修理甚善，江居士經手修理至爲妥也。謹復，不宣。演音啓。前寄下洋五十圓，曾兩次託人送與黃博士，彼堅不受。後乃商酌，即以此資做大藏經等木箱數個，箱外鐫刻黃博士施助字樣云云。附陳。以後惠書乞寫寄廈門南普陀寺養正院廣洽法師轉交弘一。其四十五

前日復片，及寫件一包，想已收到。昨日乃獲披誦辭彙，悉功德人名。前寄寫件不足，數日後再補寫郵奉。先此預陳，不宣。演音啓。其四十六

承轉寄天津之函，已收到，甚感。今秋到滬時，由仁者託同居之張居士，帶往嘉興之佛教大字典一冊，至今彼處未曾收到。乞爲查詢。如已煩人帶往，乞速送至第二中學蔡丐因居士處。如尚未帶去者，即仍存上海尊寓，俟將來再酌定辦法可耳。十二月十七日。演音上。子愷居士託開明寄來大冊畫集兩包，已收到。其四十七

前復明信片，想已收到。近獲扶桑古書多冊，至用歡忭。彼書中常云，鎌倉、南北朝、藤原，乃至德川等時代。此外甚多。於每時代中，又分爲初期、末期等。閱之，不解其所指何時。日本書中，如有說明種種時代年限之表，乞代購一冊，惠施。又日本古書屢云泉州，是否即在大阪附近，今爲何地。便中乞詢內山居士，爲感。演

音上其四十八

半月前曾復函，想已收到。前日由廈門轉到惠書，具悉一一。表記製版印刷皆佳。承仁者護念一切，感謝無盡。以後通訊，仍乞寄廈門南普陀寺廣洽法師轉交。謹復，不宣。演音啓。舊十一月一日。其四十九

數日前曾上一函，想已收到。十二月十八日尊函，昨始披讀。此次印表記，諸承費神，精密周到，至用感謝。寄至廈門四百冊，久已收到。其時代收者或因在泉州，忘寫回信，乞諒之。扶病坐起，書此略復。不宣。演音啓。其五十

丐尊居士道席。惠書，誦悉。近見仁者所撰辭通序，古雅淵懿，至爲歡讚。并悉作者爲老儒，因寫字一葉贈之。乞託宋居士轉交。不宣。二月十七日。演音啓。其五十一

前寄上辭通書面字，想已收到。昨承轉寄超伊師函，已達。至感。開明書店出版之護生畫集，乞惠施二十冊上下，俾便轉贈同人，爲禱。演音疏。辭通出版後乞惠施一冊。其五十二

久未通訊，甚念。廈門天氣甚煖。石榴花，桂花，晚香玉，白蘭花，玫瑰花等，皆仍開放。又有熱帶之奇花異草甚多。幾不知世間尚有嚴冬風雪之苦矣。近由李圓淨居士，交至尊處之天津寄款二十圓，乞便中託人送至愚園路膠州路七號佛學書局交沈彬翰居士，收入第七六六號弘一存款戶頭中，以備將來請經之用。至爲感謝。擬於舊曆正月二十一日，即薄益大師涅槃之日，在此講四分律戒本及表記。演音疏。其

五十二

丐尊居士道席。近因友人之約，已移居南普陀寺暫住。附寄「韓偓」草稿一包，爲余請高君編者。其原委，乞閱此稿「後記」中，即可知之。是事甚有趣味。想仁者必甚歡讚，樂爲出版流布也。此書乍觀之，似爲文學書。但其中提倡氣節，屏斥淫靡，亦且倡導佛法，實爲益世之佳作。其原稿，曾由余刪改。今所寄奉者，爲第二次抄寫之本，多由幼童書寫，頗有訛字。又高君於著作罕有經驗，雖引證繁博，但恐有訛舛處，其標點記號誤脫處尤多。乞仁者先託人爲詳校二次。第一次校正其文字，第二次校正標點記號。至用感謝以後惠書，乞寄廈門南普陀寺養正院廣洽法師轉交弘一收。立春前一日，演音啓。開明版護生畫集，因印刷太多，拙書之字已肥粗不清楚。又杜甫詩，脫落一個字。擬再寫瘦體之字，重製鋅版印行。倘承贊喜，即書寫奉上也。又及其五十四

丐尊居士道鑒。惠書誦悉。至爲歡慰。偓沒後千載，無有人爲之表彰者。今仁者以此稿出版，廣爲流布，偓若有知，當深感謝。俟出版後，並希以若干冊贈與朽人，以分致諸道侶也。護生畫集另製版，甚善。所示辦法，甚爲贊意。茲先書奉金剛偈一葉，餘俟後郵上。余於近六年來，研習南山律羯磨，曾講三次，講稿亦改編數回，竭其心力，願爲弘闡。今歲明年，更擬重爲整理編輯，並自書寫，與前印之戒相表記相似。於廿八年老齡六十歲時出版流布，以爲紀念。擬即用護法會資製版印刷，所闕亦無多也。前承諸友人爲請購



日本佛教大辭彙六冊，至用感忭。彼於末次寄來時，內附廣告，謂又增編續卷一冊，內有全書索引年表等，不久即可出版。乞託內山居士俟出版時，仍乞購以惠施，價約五六圓也。韓偓書端，乞請仁者及葉居士撰序冠之尤善。高君自幼疏食，其母及姊亦爾。全家信仰佛法，高君與姊不婚不嫁，故其家庭與寺院無異。近編此書甚費心力，余亦爲之校改數次。今獲出版，歡慶無盡。謹復，不宜。正月四日。演音疏。其五十五

丐尊居士道鑑。前函想達慧覽。擬茲將四分律比丘戒相表記再版石印二千冊流傳。所需多金，前年曾屬豐居士商諸仁者，由護法會捐助，已荷歡讚。今託上海世界新聞社陳无我居士太平洋報社舊友經手辦理一切需資之時，逕向仁處領取。即依彼說之數目交付爲感。謹陳，不宜。演音疏。其五十六

丐尊居士道鑑。惠書具悉。吉子臨終安詳無苦，是助念佛名力也。余自昨夕始，爲誦華嚴行願品。又有友人不須酬資，亦爲誦行願品及金剛經。附奉上誦經證，請於靈前焚化可也。淨峯寺在惠安縣東三十里半島之小山上，三面臨海，與陸地連處僅十分之一。夏季甚爲涼爽，冬季北風爲山所障亦不寒也。小山之石玲瓏重疊，如書齋几上所供之珍品，惜在此荒僻之所無人玩賞耳。附奉表記附錄一章，擬附於再版表記之後。用小號仿宋字排印。倘陳无我居士來時，乞面交與。若已來者，乞挂號寄至世界新聞社。大約在慕爾鳴路，乞探詢之。費神至感。不宜。演音覆疏。舊五月廿八日。開明出版子愷漫畫，其卷首有仁者序文述余往事者，已忘其書名，乞寄贈四冊以結善緣，至用感謝。其五十七

丐尊居士慧鑒。惠書於今日始收到。因無使人帶來。表記樣本甚爲清楚。余初意以爲依小字攝影恐致模糊。今乃得良好之結果。至用歡慰。此事始終承仁者盡心輔助。感謝無量。淨峯寺寺主去職。余亦隨之。他往。大約居住草庵。以後半月內通訊。乞寄泉州城內百源村百源庵。又名銅佛寺。覺徹法師轉交。半月後通訊。乞寄廈門南普陀寺養正院廣洽法師轉交。至妥。謹復。不宜。新曆十一月四日。演音啓。其五十八

丐尊居士惠書。誦悉。承施多資。至用感謝。前擬贈與草庵二十圓。彼不肯受。今擬以物件等價約近十圓贈奉。其餘十餘圓。即由音自受用也。宿疾已漸愈。以後通訊。乞寄廈門南普陀寺養正院廣洽法師轉交。弘一。至爲穩妥。雖偶雲游他處。彼亦可轉送也。前奉託諸事。諸承費神。感激無盡。謹復。不宜。演音疏。其五十八

丐尊居士道席。到青島後。曾上明信。想已收到。此次至青島。預定住至中秋節爲止。決不能早動身。其時輪船未必有。倘火車尚可通者。則乘火車到杭州。轉濟南換坐京浦車。惟北方三等車。較滬杭寧大異。不能安坐。故不得不乘二等車。預算車資及其他雜用。所需甚多。擬請於護法會資中寄下八十圓。若有火車開行。於中秋節後必可動身也。謹陳。不宜。八月二十日。舊七月十五日。演音啓。其五十九

丐尊居士道席。惠書。誦悉。厚意慇懃。感謝無盡。青島平安如常。書店等久已閉門休業。須俟他日開門。再往商酌領取可也。朽人於中秋節後動身否。暫不決定。倘動身者。所缺路資。亦可向同居某師借貸。俟將來時局平定時再償還。乞仁者勿以是爲慮也。湛山寺居僧近百人。毫無恆產。每月食物至少須三百圓。

現在住持者不生憂慮，因依佛法自有靈感，不至絕糧也。謹復，不宜。舊八月三日演音疏。其六十

丐尊居士道席。前復函，想已收到。青島市面已漸恢復。曾向中華書局領款，彼云：未曾接上海開明之信及電話，現不能領取。云云。其他之某堂書店之款，已經領到。將來若乘火車南下，頗費周折，費昂而多勞。擬改爲乘船，或直往廈門，或先到上海。北地冬春嚴寒，非衰老之軀所能堪也。謹復，不宜。若往上海，擬暫寓泰安棧。新北門外馬路旁，面南，其地屬法租界之邊也。某銀樓對門與新北門舊址斜對門，在其西也。即以電話通知仁者，當獲晤談也。舊八月初八日演音啓。其六十一

兩處之款，皆已領到。值此時局不寧，彼等能如此損己利人，情殊可感。數日後，即乘船返廈門。因有往香港之大輪船，或廈門，故不能往上海矣。謹復，不宜。中秋夕。演音啓。其六十二

在滬歡晤，爲慰。前日安抵廈門。途中毫無障礙。以後通信，寄廈門中山公園妙釋寺轉交萬石巖弘一收。謹達，不宜。錫琛居士乞代致候。十月十八日演音上。金剛經一冊，別郵奉，乞收入。若能常常讀誦，自然身心安寧，無諸煩惱也。附白。其六十三

到廈門後，諸事安適，足慰遠念。近到泉州講經，法緣甚盛。擬請惠寄清涼歌集五十冊，分贈諸友。其資，乞由護法會內支付，爲感。以後通訊，乞寄廈門轉泉州承天寺弘一收。章居士乞爲致候。演音啓。其六十四

今年在閩南各地弘法至忙。於廈門變亂前四天，已至漳州弘法。今居東鄉瑞竹巖靜養。通訊，乞寄漳州。



南門南山寺轉交子愷想仍在長沙便中乞代致意不宜。舊五月一日。演音啓。其六十五

近得子愷函，悉仁者殤孫，境緣惡逆，深爲歎息。若依佛法言，於一切境，皆應視如幻夢。乞仁者常閱佛書，並誦經念佛，自能身心安寧，無諸煩惱。則惡因緣反成好因緣也。朽人近來漳州城區，弘揚佛法，十分順利。當此國難之時，人多發心歸信佛法也。陳无我居士，寓上海慕爾鳴路一百一十一號六號。仁者若能常常訪談，自必胸懷開脫，獲極大之利益也。謹陳，不宜。閏月六日。演音啓。其六十六

惠書，誦悉。現居鄉間高山之上，雖值變亂，亦無妨也。乞勿念將來汽車通時，擬往泉州或惠安，屆時再奉聞也。不宜。小暑後一日。演音上。其六十七

丐尊居士文席。前上書，想悉收到。閩南時局，倘無變化，朽人擬再遲月餘返泉州小住，再往惠安。車路已毀損，由漳至泉州三百里，須乘肩輿，需費甚多。擬請仁者滙資二十圓，乞交上海農民銀行滙漳最妥，因朽人與漳州分行行長相識也。乞勿交郵局滙，領取時甚困難。謹陳，不宜。中秋節。演音啓。其六十八

丐尊居士道席。前上信片，想已收到。茲擬向佛學書局購請佛書，附一函乞託人送去，並乞護法會惠施十五圓，一併送去，至用感謝。朽人在漳，諸事安適，一時尙未能返泉州也。謹達，不宜。演音啓。其六十九

丐尊居士。前明信，想已收到。居此甚安，乞釋慈念。茲有懇者，乞滙洋拾圓，致南京延齡巷馬路金陵刻經處。云係弘一購經之款，請彼存貯，云云。費神至感。通訊處，尙無有定。信面寫開元寺，但音仍住草庵也。距

泉州三十里鄉間。演音疏。其七十

丐尊居士澄覽。惠書誦悉。至用歡慰。書件附挂號郵奉。以後暇時。擬多寫結緣之書幅。俟時局平靖。即可郵寄也。承詢所需。甚感。現無所需。居深山高峯麓。有如世外桃源。永春亦別名桃源也。謹復。不備。農曆中秋後二日。音啓。附一箋及經名三紙。乞費神轉交蔡丐因居士。彼昔居法界環龍路三十號。近未通信。未審住所。乞轉詢之。附白。其七十一

丐尊居士淵鑒。前復書。想已收到。拙書已就計。五言聯八對。七言聯二對。讀律室額一紙。橫幅二紙。斗方一紙。小堂幅長二尺二十紙。大堂幅長二尺餘二十二紙。內有一紙伸鹽款。共計一包。俟有妥便。送至郵局掛號奉上。或須稍遲也。以後暇時。再爲續寫奉上。茲有懇者。便中託人至功德林佛經流通處。以前在北泥城橋堍。未知今遷移否。請購四分律行事鈔資持記一部。計二十冊。價約十圓左右。乞護法會施資。即託

功德林用皮紙包兩層。恐路遠破損。付郵挂號寄下。倘功德林無有。再向佛學書局詢問。以功德林所存者爲善也。以後通訊。寄福建永春縣蓬壺鄉華記藥店轉普濟寺。音啓。四月廿二日。其七十二

丐尊居士澄覽。惠書於前數日收到。行事鈔亦於今晨由寺送至。甚爲歡慰。畫稿久已轉郵寺中。附奉上拙書一紙。謹復。不宜。庚辰元旦清晨。音啓。其七十三

丐尊居士道鑒。惠書誦悉。至用感慰。近來老態日增。足力未健。不勝舟車之勞。恐一時未能北上。至用悵

然耳。近因研習編輯，請經甚多。乞再滙二十圓至金陵刻經處，爲禱。附箋，乞并寄去。以後惠書，乞寄廈門南普陀寺轉交弘一收。謹復，不具。演音啓。其七十四

丐尊居士淵鑒。惠書，誦悉。附奉上致豐居士一箋，及佛字二紙，乞於便中附寄去。又致李居士一箋，乞閱畢，便中轉交。遲遲無妨也。近問郵局，滬閩之間，仍不能寄大包印刷品。前承寄行事鈔資持記，於元旦晨收到，實爲慶幸事也。謹復，不備。農曆三月十八日。音啓。其七十五

丐尊居士文席。兩奉惠書，具悉。一。拙師信已轉交。承示懷舊文，厚意慰勸，至用感謝。聞浙中交通多阻，明年恐不能來山房也。前浙一師學生石有紀居士，近任安溪縣長，曾來談一次。彼謂若往山房，須由江山繞道。老體頹唐，不勝此長途汽車之勞也。不宜立春前一日。演音啓。其七十六

丐尊居士文席。惠書，誦悉。厚情慰勸，至用感謝。朽人擬於舊十二月一日始，新正月二十日在承天寺暫時閉關用功，不定期限，可以於數月後移往他處也。時局不寧，交通阻礙，明年能往江浙否，尙未能定。閉關後，通信者，惟有仁者一處。子愷或有要事，可以書箋附於仁者函中寄來，亦可入覽也。再者，前與陳无我、李圓淨二居士商酌，擬重寫護生畫集，重製銅鐸之版。此事尙未了結。以後彼二居士關於畫集之事，欲與朽人通訊者，亦送至尊處，由仁者便中附入寄來。朽人有必須復彼二居士之信，亦寄至仁者之處，乞爲轉交也。畫集之事，不久即可了結，非是數數通訊也。以後惟有信面寫仁者姓名，仍可送入關內。其他



信件，皆由他人代拆代閱，暫爲存貯，決不送至關內也。承詢資用之事，前資餘者甚多。且閉關後，更少需用。乞勿滙寄。俟將來移居他處時，或有所需，當隨時奉達。附致子愷一紙，乞檢閱，并乞便中加封寄去。遲無妨。將來有寫件寄與子愷者，擬寄至尊處，暫爲保管，因桂林近況至不安也。演音啓。十一月二十日。

其七十七

丐尊居士澄覽。惠書兩通，於今午同時收到。信箋稿寫奉刻木板時，乞勿移動其地位。

印章亦勿移動。

字形配合，及筆氣連貫處，皆未能變易也。護生畫集流布，承代謀畫，甚感。朽人居深山中，諸事如常。永春及泉漳等處居民，多朝散暮歸，唯營夜市，以避機彈，至可慙也。信箋稿之字句，皆出於華嚴經。乞代達无我居士，并希致候。不宜。音啓。六月十九日。其七十八

丐尊居士道鑒。前復書，想已收到。近在惠安弘法，擬以華嚴集聯十冊施送。乞以護法會資請購此書十冊，寄福建惠安縣城內霞梧街集泉茶莊王頌平居士收。再乞以洋二十圓寄與上海佛學書局，附一紙亦乞一併交去。至用感謝。不宜。演音啓。其七十九

丐尊居士文席。惠書誦悉。承施資至感。茲奉上拙書十二紙，乞受收。下月尚須在泉州講經，往永春之期未定。謹復，不備。正月二十九日。音啓。其八十

惠片誦悉。前日已移居永春，距泉州百數十里，爲閩南最安穩之地。山奧幽僻，古稱桃源。明日即往鄉間。

居住。以後通訊，乞寄福建永春縣蓬壺新市場華記寶號轉普濟寺弘一收。舊二月廿七日。音啓。其八十一  
丐尊居士文席。惠書，誦悉。護生畫集，擬先依舊本影印，僅題字重寫，已由佛學書局承印。子愷居士所述  
之意，擬俟時事安靖，再進行可耳。拙書若干紙，稍緩，俟友人入城時寄奉。朽人於前月餘，寄居永春山中。  
以後惠函，乞寄福建永春縣蓬壺鄉弘一收。即可達到。謹復，不宜。四月十四日。音啓。其八十二

丐尊居士文席。數月前，曾將退回信件之籤條數十紙，交與郵局代辦所，代爲張貼退回信件。但仁者之  
信件則在例外。故以前惠書，悉皆收到。此次則爲代辦所執事者誤貼，故未收到，至用歉然。畫集事，具寫  
致李居士書中，乞披覽。以後惠書，乞於函面寫善夢之名，俾代辦所人可以不致再誤會也。不宜。善夢啓。  
十一月廿四日。福建永春縣蓬壺鄉華記藥號轉交普濟寺善夢收。其八十三

丐尊  
圖晉

居士空覽。養疴山中，久疎音問。近以友人請住檀林鄉中，結夏安居。故得與仁者特殊通信，發起一  
重要之事。以護生畫集正續編流布之後，頗能契合俗機。豐居士有續繪三四五六編之弘願。而朽人老  
病日增，未能久待。擬提前早速編輯成就，以此稿本存藏上海法寶館中，俟諸他年絡續付印可也。茲擬  
定辦法大略如下。乞仁者廣徵諸居士意見，妥爲核定，迅速進行，至用感禱。（一）前年豐居士來信，謂  
作畫非難，所難者在於覓求畫材。故今第一步爲徵求三四五六集之畫材。於佛學半月刊及覺有情半  
月刊中，登載廣告，廣徵畫材，其贈品以朽人所寫屏幅中堂對聯及初版印金剛經、珂羅版印，較再版爲優。

今猶存十餘冊。等爲獎酬。(一)此事擬請仁者及范古農沈彬翰陳无我朱穌典六居士，負責專任其事。仍請圓淨居士任總編輯。(一)預定三集畫七十張，四集八十張，五集九十張，六集一百張。每畫一張，附題句一段。(一)已刊布之初二集，畫風既有不同，以下三四五六集亦應各異。俾全書六集各具特色，不相雷同。據鄙意，以下四集中，或有一集用連環畫體裁，或有一集純用語體新文字題句，其畫風亦力求新穎，或有一集純用歐美事蹟。此爲朽人隨意懸擬，不足爲據。仍乞六居士妥爲商定，務期深契時機，至爲切要。(一)每集畫旁之題句，字數宜少。或僅數字，至多不可超過四五十字。因字數多者，書寫既困難，縮印亦未便。(一)徵求畫材之廣告文，乞六居士酌定。徵求既畢，應審核優劣，分別等第，亦乞六居士酌定。至其畫材能適於作畫否，乞穌典居士詳核之。(一)以上且據登廣告徵求畫材而言。依朽人懸揣，應徵之人未必多，寄來之稿亦恐罕能適用。則登廣告徵求畫材一事，將無結果，殊爲可慮。不如專請四位負責，每位各編一集之畫材，如是或較爲穩妥也。乞六居士詳審之。以後關於此字之通信，乞寄與性常法師轉交朽人至感。農曆六月六日。音啓。其八十四

丐尊居士文席。頃奉惠書，忻悉此事。已承仁者盡力規畫，助理一切，至用感謝。徵求期限，似宜再展緩兩月，因遠方郵便遲滯，恆須一二月乃可達也。陳无我居士因修習密宗法，無暇任事，曾來函辭謝。乞仁者再斟酌延請一位，助理此事，爲禱。致穌典居士一紙，乞便中交去。時事不靖，南閩物價昂至數倍，乃至廿



餘倍。朽人幸託庇佛門，諸事安適，至用慚遑。舊存寫小字筆已將用罄。乞仁者以護法會資代購小楷水筆數枝，封入信內寄下爲感。護生畫續編事，關係甚大，務乞仁者垂念朽人懇誠之願力，而盡力輔助，必期其能圓滿成就，感激無量。又有致圓淨居士一紙，乞便中交去，遲遲無妨也。贈品以拙書爲宜，由泉郵遞可作信件例寄。惟宣紙已無購處，僅能用閩產之紙耳。率復，不宣。閏六月廿七日。音啓。倘他日因畫材不足，未能成就四編者，亦可先輯一二編，其餘俟後絡續成之。附白。其八十五

丐尊居士文席。去冬滬變時，曾致明信片，未審收到否。畫集資料，想尚未輯就，無足介意也。因現在諸物昂貴，亦甚難出版。泉州米價將至三百，火柴每一小盒二圓，其他可知。貧民苦矣。朽人幸託庇佛門，食用無慮，諸事豐足，慚愧慚愧。拙書二紙，乞隨意結緣。略陳，不宣。音啓。四月七日。其八十六

丐尊居士道鑒。惠書，誦悉。問答一冊，已收到。承詢所需，至用感謝。朽人近居普濟寺中，所有用款，皆由寺中支付。寺中住持，兼任南洋寺務，故常寄款資來，以助寺用。畫集緣資五百圓，亦其所募集也。故尊處施資，現不需用，乞勿寄下。謹謝，并復，不宣。五月十二日。音啓。其八十七

丐尊居士道鑒。久未致訊，至念。上月徙居山中，距郵政代辦所八里，投信未便，故諸友處悉無音問也。茲擬向佛學書局請經，附一箋乞轉送，并乞由晚晴會施洋三十圓附遞。費神，至感。山鄉風俗淳古，男業木土石工，女任耕田挑擔。男四十歲以上多有辮髮者。女子裝束更古，豈惟清初，或是千數百年來之遺風。

耳。余居此間，有如世外桃源，深自慶喜。開明出版拙書華嚴集聯及李息翁法書，乞各寄下三冊，以結善緣。感謝無盡。惠書乞寄廈門轉惠安縣東門外黃坑鋪港仔街回春號藥店劉清輝居士轉交淨峯寺弘一收。演音疏。其八十八

丐尊居士文席。前復函及寫件，想已收到。茲寄上致子愷居士一箋及寫件一紙，乞便中轉寄。又與李圓淨居士一箋，乞便中託陳无我居士轉交，遲遲無妨也。謹懇，不宣。九月十二日。音啓。其八十九

丐尊居士道鑒。戰事紛起，滬上尚平安否？爲念畫材數則附奉上，以備採擇。以後倘有他處贈與朽人資財者，乞代辭謝，因現不需用也。穌典居士乞代致候。不宣。十一月七日。音啓。近作附錄南閩道耆宿七秩壽聯。老圃秋殘，猶有黃花標晚節。澄潭影現，仰觀皓月鎮中天。其九十

丐尊居士文席。今日已六十矣。今歲擬多寫字結緣。便中乞惠施廿金，以備購宣紙及其他需用。拙書一紙，附奉慧覽，不宜。己卯元旦晨。演音啓。近來身體較前強健，齒力目力皆佳，足力更健，無異少年。但精神頗呈老態耳。知念附聞。其九十一

丐尊居士文席。朽人世壽周甲已過。擬自下月中旬始至農曆明年辛巳除夕止，掩室靜修。須俟壬午元旦，乃可與仁等通信也。仁者通信之處，倘有變動，乞於辛巳十一月寫交李圓淨居士轉送。謹陳，不宣。九月三十日。音啓。其九十二

丐尊居士慧覽。惠書，誦悉一一。子愷處已久不通信。聞友人云，彼之通訊處，爲重慶沙坪壩國立藝術專校。據彼八月廿五日之信云：閩中平靜如常。仁者能入閩任職，則生活可無慮矣。泉州物價之昂，自昔以來，冠於全閩。但米價每石亦僅一百七十元左右。其他閩中產米之區，如漳州及閩東等處，則僅五十元左右。泉州街市無乞丐。另設乞丐收容所。物價亦不甚昂。華僑家族生活亦大致可維持，因努力種植，生產量甚富也。統觀全閩氣象，與承平時代相差無幾。朽人於十四年前，無意中居住閩南。本擬往暹羅至廈門而中止。至今衣食豐足，諸事順遂，可謂徼幸，至用慚愧。唯從前發願編輯律宗諸書，大半未成就。擬於雙十節後即閉關著書，辭謝通信及晤談等事。以後於尊處亦未能通信。仁者欲知朽人之近狀者，乞常訪問上海慕爾鳴路一百一十一號大法輪書局陳无我居士及彼處同住之陳海量居士。因泉州諸僧，常與海量通信，彼深知朽人之近狀也。朽人近作，屢載覺有情半月刊中。先我所辦。乞仁者定此月刊一份，自今年正月始尤善，每年一圓餘。即可常閱覽朽人之近作也。蘇慧純居士，亦爲海量之舊友。仁者能常與海量晤談，當獲益匪淺也。指導生活安慰心靈。不宜。十月一日。音啓。附呈相一紙，爲去秋九月所攝。佛名二紙，乞結緣。其九十三

丐尊居士文席。朽人已於九月初四日遷化。曾賦二偈，附錄於後。君子之交，其淡如水。執象而求，咫尺千里。問余何適，廓爾亡言。華枝春滿，天心月圓。謹達，不宜。音啓。前所記月日係依農曆。又白。其九十四



## 與寂山法師

父大人慈座。頃奉法諭，敬悉一一。尊恙已大痊否？爲念弟子到此以來，承唯善師兄諸事照拂，慈悲攝護感激無既，以後恩師與唯善師兄晤面時，乞常常隨時爲之諄託，一切至爲深感。又弟子在家時，實是一個書獃子，未嘗用意於世，故人情世故一言一動與常人大異，此事亦乞恩師婉告唯善師兄，請其格外體諒而曲爲之原宥也。弟子以師禮事慈座已將三載，何可忽爾變易，伏乞慈悲攝受，允列門牆，至用感禱。承命因，弘與弟子同居，護侍一切，銘感尤深。此復祇叩慈安。弟子演音稽首。四月初九日。

## 與性願法師

五通

性公老人慈座。久未奉候，惟道履貞吉爲祝。後學於初冬移居靈應寺後，辭謝見客通信等事，習靜養病，已過三月矣。茲因有關係法門重大之事，必須奉陳座下，故特破例通信，詳述由致，諸希慈督爲禱。近聞人云，慈座擬辭卻信願寺職務，俟有安人繼位時即可辭職返國云云。後學久違慈範，時以縈懷。今聞慈座返國之消息，不勝慶忭。又望仙普濟諸利，皆待慈座蒞臨興建整頓。時節因緣，蓋非偶然。但信願寺後任住持之人選，後學不揣冒昧，擬推薦以性常師負此重任。乞慈座與諸護法董事商之。性常師與後學

相交多年，道念堅固，任事精勤。以前學律諸師之中，應推常師爲第一。近爲興復望仙寺事，諸方奔走，任勞任怨，尤爲人所難能。慈座能返國興建望仙，請常師在菲島遙爲護法，輔助一切，尤爲適宜。但常師於任職之事，非其所願。必須請慈座與諸董事商酌，宜以最隆重之典禮，至誠聘請。彼或可破格允諾。應具聘書，命僧衆一二位專誠返國，殷勤勸駕，並陪伴常師偕往菲島。至於護照等事，宜早爲準備也。拉見如是，是否有當，希裁酌之。順頌法安，不宣。十二月十二日。後學演音稽首。其一

性公老人慈鑒。前獲慈諭，敬悉一一。厚意慇懃，感謝無盡。紙筆眼鏡等物，近始由水雲取還。遲遲奉復，敬乞亮之。永春佛教會及桃源殿普濟寺等，皆乏有力負責者。後學等深盼慈座返國，整理振興。而望仙寺事，尤爲重要。性常師雖努力盡責，收復寺產，必須慈座速急返國，主持大局，建築工事，乃可進行。李居士謂，建築甚是易事。必須有人發心住持。至於將來居住之僧衆，擬將南山律苑附入望仙寺內。由後學介紹道

行高卓，能耐清苦之僧衆，近十人，久住寺中，息心辦道。後學雖未能久居，每年亦可於夏秋之際居住數月也。慈座若於菲島寺務，未能脫離，亦可兼任。時常往來於菲島永春二地，並承慈光普照，則至善矣。前承惠施百金，已囑送存妙慧師處。以待他年後學往望仙時，充作旅費。謹此奉復。順頌法安。後學演音稽首。六月十七日。其二

性公老法師慈鑒。傳貫師往泉，兩次出口證已領到。但彼等之意，欲令後學從緩動身。只可延期，俟將來

能動身往鼓浪嶼時，再致函奉聞。荷勞慈念，謹先慰達。附奉上致佛教會一箋，又與吳居士歸依文一紙，乞費神轉交。至感順頌。法安後學音稽首十月二日其三

性公老人慈鑒。惠書敬悉。一一承集資印經等，至用歡讚。後學年來已入老境，精神頹唐，時有小疾，惟淨宗勝願，頗能日益增進。此則堪告慰於慈座者也。普濟不久興建法堂等，將來能聚集多數道心堅固之僧衆，隨其好樂，分修禪淨教律等，爲閩南普放大光。謹稽首祝禱焉。敬復順叩法安。後學音稽首四月二十八日其四

性公老法師慈鑒。去秋方擬啓程，變亂忽起，致負旅非縑素諸公厚望，至用歉然。茲有陳者，覺圓法師近來道心堅固，擬放下一切，追隨後學專心用功。百源主持一席，已交與其弟子妙興師暫爲代理，並託諸護法居士爲照顧指導一切。覺圓法師於數日後，卽隨後學往閩東居住，暫不返泉。百源寺務，俟時局稍定，泉非之間能通信時，卽請諸居士代寄此信，呈奉慈座。以後寺務如何規定，敬乞慈座核酌。卽賜復音，仍交與諸居士依教奉行。後學前曾聞李秉傳居士談及慈座有將百源完全放爲居士林之意。後學等甚爲讚成。諸居士亦極歡忭，并謂若改作居士林時，則經費決無困難云云。今據大衆公意，附陳慈照。敬乞覆示，俾便遵循。至於妙興師，本是暫時代理。若改爲居士林後，彼卽退位，專心用功。因後學亦曾勸妙興師不可任職，應放下一切，專心用功云。以後慈座惠書，乞寄泉城諸居士先爲披閱，暫存居士處。因後



學所居荒僻之地，未便通信也。謹陳，順叩慈安。後學音稽首。舊曆壬午四月十三日。其五

## 與廣空性常法師

廣空老法師  
性常法師

全覽。久別爲念。四月八日已往漳州，講演一次。後住鄉間。俟車路通時，或水路通時，請性常法師來漳州小住，再偕返泉州可也。以後通訊，乞寄漳州東門浦頭祈保亭嚴持法師轉交。性常法師到漳州時，亦先到祈保亭詢問。謹陳，順頌法安。弘一上。五月十一日。性常法師來信，已收到。

## 與性常法師 四十通

性常法師道席。惠書，誦悉。承誦經迴向，至用感謝。朽人近年來，身體精神日益衰頹。兩臂常常麻木，手足部常痛。是因血脈不周所致。此間氣候陰寒，潮氣太重，亦是一原因也。中秋節後，如有輪船開行者，即在上海小住，再返廈門。青島溼寒，人多有病。傳貫師現在身著單布衣四件，亦稍患傷風。謹復，不宜。演音啓七月初四日 其一

性常律師道鑒。惠書，頃已收到。此次有發心學律者數人，皆至誠諄切，將來成績必大有可觀。朽人約於二月到泉州。俟瑣事料理既畢，即可返廈講律也。餘容晤談，不宜。舊正月廿五日。演音疏。其二

性常法師道鑒。前獲手書，即復一信片，想尚未收到。朽人現住漳州東鄉瑞竹巖，距城二十五里，擬在此過夏。倘仁者願來此者，乞先到漳州東門浦頭祈保亭嚴持法師處，託彼陪來。或逕至南門南山寺，託人陪來，皆可。謹達不具。五月十四日。演音啓。其三

性常法師道鑒。茲有致性老法師書，乞檢閱，掛號付郵寄去至禱。倘仁者別有意見，不妨書寫另箋附入寄去可也。朽人發起此事，實於各方面皆有利益。仁者往菲島後，仍可爲朽人護法，雖遠隔重洋，實與晤言一室無以異也。乞仁者須痛念法門衰落，發弘誓願，負此重責，萬勿推卻。至要至要。朽人年老多病，不堪任事。仁者爲學律諸師中之巨擘，自應代朽人出而弘法利生，俾不辜負朽人多年以來弘律之勝願也。若惟退居林下，不願出而任事，殊爲未可。乞念法門衆生，奮袂興起，則法門幸甚，衆生幸甚。十二月十二日。音啓。此紙亦可附寄呈與性老法師一閱。閱畢仍可再寄還仁者，留爲紀念也。附白。其四

朽人致性願老法師一紙，及昨日與仁者一紙，併此紙，共計三紙，皆乞寄往菲島。此事關係海外弘法，至爲要緊。朽人身受佛恩，不得不盡力勸請。望仁者不可再固執。此三紙決定寄去。當來結果如何，任緣可也。爲佛門護法，與好事不同。乞勿誤解。此紙，乞呈性老法師慈閱，外兩紙，共三紙。其五

性常法師道席。拙書普門品，若付印時，僅能加紅色直格，不能加方格。方格不可用之理由，因字體有長形有扁形，寫時高低不等，互相借用地位。若加以平均相等之方格，則字形與格線彼此參差。故萬不可

用方格也，若僅直格則無妨。因每行首尾二字皆齊整，中間數字則互相參差也。倘託費居士經手印者，此紙乞寄與費居士。請彼閱畢，仍寄還仁者。音啓。其六

性常法師道鑒。惠書誦悉。以後如有他人與仁者通信時，內附有致朽人之信，託仁者轉交者，乞即復一明信片。其文句如下。「惠書誦悉，屬交弘公之信，已爲轉交。但弘公近來老病纏綿，頽唐殊甚。一切之事皆宜從緩，以待將來。失禮之處，乞仁者格外原諒，至禱。」倘有來信欲受皈依者，乞答云，僅能命法名，寫小中堂一紙。以後暫未能通信，未能請求特別寫件，香金亦不受。云云。山東宋居士處，乞據前之文意，即復一明信片，至感。乞附告云，護生畫材，已轉寄夏居士。宋居士通訊處，山東鄆城潘溪渡宋慈波居士收。十一月初七日音啓。其七

余近來身體精神，日益衰弱。肺病亦頗有進步。想不久即可生西。但現在病勢尚未沈重，不能斷絕食物。故每日仍請妙訣師送飯兩次。惟病人之起居飲食，與健康人不同。此事頗令本常住及妙訣師等，諸多不便。還請彼等格外原諒，是幸。且俟病勢稍重，即可斷絕食物也。以上之意，乞爲妙訣師講解之。自今日始，每日送午飯時，增送滾水，即開水一次。性常法師鑒。音上。其八

有現在不用之衣物數種，須常常曝曬。老病之軀，甚憚其勞。擬暫寄存仁者之處。乞常常取出，於日光中曬之，涼透乃收入包中。種種費神，感謝無盡。性常法師澄覽。夢啓。其九



奉上新寫之梵網戒表二紙，前余所寫之表，不甚清楚。今略增改，抄寫工整。應以此稿爲準。前稿作廢。乞仁者照樣抄寫。宜以薄紙蒙於原稿上，精工注意抄寫之。抄畢，再以仁者所抄之紙，交圓拙妙挾諸師抄寫可也。仁者抄畢，乞將原稿託妙挾師帶下。李圓淨居士通信處，爲靜安寺路何處，乞示知。此上性常法師道鑒。夢啓。

其十

今晨承枉談，厚意盛情，至堪感謝。現在有病，故每日一餐甚宜。將來病愈時，再改爲兩餐可耳。此上性常法師朗鑒。夢啓其十一

性常法師鑒。前購來之連城出產之連史紙，甚佳。惜帶來時，稍沾水，致有痕跡。茲乞再代購連城出產之連史紙，上等，厚的。大洋五圓。並購油紙數張。即託紙店用油紙包好，外包報紙。帶來之時，乞注意勿沾水溼。再者，乞仁者向郵政局詢問現在寄往上海之大包印刷品，可否僅加汽車費大洋八角否。又現在寄往鼓浪嶼之大包印刷品，可否費神，至感。夢啓。再乞代購普通毛邊紙，大洋二圓。亦用油紙一併包好，勿沾水溼，帶下爲禱。其十二

香蕉乞挂於高空之處。一則可免鼠噬，二則可以久存不腐。自明日起，早晨送飯時間，改爲七點半鐘。余之小圖章一方，現在需用。乞交妙挾師帶下。前在永春所印諸講錄，如存者尙多，乞分贈培元高中部諸學生。性常法師。夢上。其十三

前寧波滙來洋八圓。乞於本月二十日，午食以大麵供衆，並分贈。二十日上午九點鐘，普濟寺鐘，請四位法師來談。著大衫。佛字七紙，又小幅一紙，乞收入。四月初旬，仁者在泉州時，劉質平居士曾寄滙洋十圓。已存庫房。乞以此款，附印九華垂蹟圖。性常法師夢啓。其十四

十三日爲朽人出家之紀念日。請寺中諸師，於上午九時，普濟寺鐘，惠臨敘談。性常法師道鑒。夢上。其十五  
寫字之事，現酌定平等統一之辦法。凡本年十二月廿六日以前交來登記者，現在皆書寫。凡十二月廿七日以後交來登記者，皆須俟明年夏季放香時再寫。無論親疏，一律平等，無有厚薄先後。以後他人如有詢問者，即依此意答復。性常法師道鑒。夢上。其十六

今晨仁者云鼓浪嶼滙款之事。以余揣度，大約是請余到彼處講經。若如是者，此款即不應受。且俟將來，看彼處來信所言何事，再爲斟酌。今晨交奉之滙款單三紙及小印章一方，暫存仁者之處可也。性常法師鑒。音上。其十七

金剛經出版後，應贈費居士三十冊，以酬其勞。此事如何分配，乞與性老法師商之。上次印時亦曾贈送。以後仁者與他人晤談或通信時，提及朽人近況，乞告云，近來謝絕通信及見客，養病習靜，無須云編書用功等。送上畫集題句寫廢者，乞隨宜分贈。又普門品乞贈送願讀誦者。性常法師夢啓。其十八

余存太平巖書架中律書數包，已逾數載。恐外包之紙已去，不能辨知爲何人之物。外包紙上，或有余之名，

已記不清楚。乞託龍溪寺寫證明信一封，證明瑞曦師之書的確存在龍溪寺。否則恐他人疑余存太平巖之律書，爲瑞曦師之遺物。將來不能領取也。乞性常法師商之。其十九

性常法師惠書及稿，收到。近精神大衰，不能用心。原稿暫存傳貫師處。俟將來康健有暇時，再披閱也。謹復不具。演音啓。其二十

性常法師惠書，誦悉。勝林居士前交來四金，擬改作經箱用。樟木製，箱面上刻施者姓名。不再印經矣。此意乞於便中代達。不宜。演音啓。閏三月廿九日。近由性願老法師轉交來五圓爲泉州戒淨老和尚所惠

施者。亦擬以此資作經箱，而廣施福。如有人往海印寺者，乞託代致謝忱，並告此意。附白。其二十一

性常法師前復明信，想已收到。茲承會老法師諄諄挽留，令久居萬石巖。故朽人一時尙不能到泉州。知勞遠念，謹以奉聞。並乞代告高文顯居士。十一月十七日。演音啓。其二十二

性常法師本擬不往青島。近因夢參師自青島來迎接，誠意懇勸，未能辭謝。已允數日後同往。但九十月間，決定仍返廈門，居住中巖也。慈公處，余已有函，依此意奉復矣。謹達。不宜。演音啓。其二十三

性常法師惠書，誦悉。今晨安抵湛山寺，諸事順適。青島夏季甚涼爽。學院與寧波觀宗寺相似，學僧約七八十人。重陽後約仍返廈門，居中巖也。謹復。不宜。演音啓。其二十四

性常法師宿疾已漸愈。惟精神氣力反不如前，不如正二月，尙須靜養多時，乃能復原也。性老法師謂，須兩



年乃復元。近在此講戒本，甚爲費力。將來到日光巖閉關後，恐不能繼續講律。他人有問余近狀者，乞以此告之。謹陳，不宜。演音啓。其二十五

性常法師。兩奉惠書，至用感謝。廈門現已平定，可以無慮。朽人稍遲，或可來泉州，與仁者晤談。前朽人曾與廈門人事約定，俟戰事平靖之後，乃可離廈門也。謹復，不宜。演音啓。其二十六

性常法師。惠書，誦悉。朽人先已允萬石中巖之約。然後乃得青島電報，故未能變動也。前已有信，復湛山寺。慈公處，乞仁者代復之，爲禱。演音啓。其二十七

性常法師。惠書，誦悉。將來講律，在日光巖關房中。聞慈舟老人已往山東閉關，學侶大半散去，所餘之少數，現由克定法師暫爲管理。彼曾來函請余往鼓山，任學苑事。余未允也。仁者若致函與彼等，宜寫明由克定法師轉交。因恐彼等已離鼓山也。介紹可以不須。僅可云旁聽，一切費用自備。率復不具。演音啓。其二十八

性常法師。惠書，誦悉。今夏余未能往鼓山，乞代辭謝。法空禪師希爲致候。不宜。演音啓。二月七日。其二十九  
性常法師。惠書，誦悉。本擬於四月八日掩關，因性願老法師諄囑延期，故延至五月，現仍居南普陀也。宿疾於四月八日已全愈。所寫金剛經一部及華嚴經名百紙，亦於四月八日圓滿迴向也。茲託瑞衛師覓便轉託人帶上南山律要一部，及日本古版律書數種，共計兩包。謹復，不具。四月十六日。演音啓。其三十

性常法師惠書，誦悉。承誦經迴向，至感。謹復，不宜。正月十五日。演音啓。其三十一

性常法師惠書，誦悉。分答如下。第二云。我食檀越及僧常食。第三云。我昔受戒時，未能如法，故無夏。第四云。我今三衣鉢具並受持。下一句略去。有未能如法者，後當如法作。第五云。我不別衆食。近向日本請小字舊藏經一部，昨已寄到，共四百十九冊。謹復，不宜。演音啓。三月九日。其三十二

送上舊筆十枝，雖無鋒穎，尚堪隨宜抄寫用之。乞仁者與諸學者分受可也。性常法師音啓。其三十三

昨已覓得他種紙，可以用。乞勿再購紙。僅購水粉十塊，稍遲無妨也。性常法師鑒。音上。其三十四

性常法師道鑑。前復明信，想已收到。法空上人來泉，已晤談二次。今夏未能往鼓山，乞向法空上人代爲婉言辭謝。余於三月，在開元講一夢漫言。以後諸事，皆未定也。謹陳不宜。附件，乞交廣洽法師。彌陀懺要印就時，乞向萬壽巖請數十冊，交與法空上人，帶往鼓山。二月十日。演音啓。其三十五

性常法師道鑑。仁者致書與性願老法師時，乞云。本寺之化身窻及普同塔宜早建築。化身窻宜先築，普同塔或稍遲無妨。再者，焚化尸身，須於命終後，經過七日乃可焚之。萬萬不可早焚。此意，傳貫師尚未了解。乞仁者詳細爲彼言之。此事關係甚大，請傳貫師切宜留意也。此達，不宜。夢啓。其三十六

性常法師慧覽。傳貫師來信，已收到。彼將返草庵，故託仁者轉達。余現住漳州鄉間，助理弘揚佛法，創辦念佛會。自本月十五日始。俟車路或水路通時，性常師來接，余即可他往也。漳州產米甚多，現因車路毀壞，

不能運往他處，故居此決無絕糧之憂也。戒相表記存在妙釋寺，故須緩寄。以上乞轉達，爲禱。七月初四日。演音上。其三十七

性常法師道鑒。曩承慈護，照料布置一切，至用感謝。塵老和尚復來寺，彼意諄諄，約朽人到泉州講經。但朽人痔疾甚劇，難受舟車之勞，故一時不能往泉州。乞仁者於晤彼時，代爲致意。並述抱歉甚深，請其原諒，爲禱。再者，乞仁者便中訪覺圓師，乞代述朽人意云：彼前託編輯藥師聖典彙集。但編輯時需參考書，俟往鼓浪嶼後乃可著手，故一時未能編輯。覺圓師弘揚藥師法門，朽人甚爲讚喜，頗願有以輔助。適值今年四月，爲亡母八旬冥誕。朽人擬編輯藥師經註解一部，以爲迴向。書名尙未定。但朽人處，無有參考書。乞向覺圓師借用藥師經旁解及其他各種註解。又朽人前存覺圓師處，有古刊藥師經註解兩部。以上諸書皆乞彙齊，合爲一包，託安人帶來，或交郵局掛號寄來。朽人即可著手編輯也。倘寄來時，於封面寫明「內係藥師經註解」字樣，又寫「仁者寄」之字樣，即可由本寺執事者轉送至朽人處也。並乞告覺圓師云：前年在承天寺講藥師經時，有某師曾爲記錄，其稿未交朽人閱覽改正。但朽人講時未曾用心詳研，其記錄稿無須流布，應即廢棄。候朽人新編之註解成就時，再刊印流通可也。此信乞交與覺圓師閱覽，並乞仁者代爲詳釋其義，至感。不宣。音啓。正月廿八日。其三十八

性常傳貫 法師全覽。到泉州後，暫居承天寺。三月中，擬在開元寺講一夢漫言。開元近來規矩甚好，將來大有



希望也。謹達不宜。演音啓。梯已出家，名廣培。其三十九

性常法師  
勝進居士

全覽惠書，誦悉。至用忻慰。近日廈門甚爲危險，但朽人未能他往。因出家已來，素抱捨身殉教之願。今值時緣，應居廈門，爲寺院護法，共其存亡。古人詩云：「莫嫌老圃秋容淡，猶有黃華晚節香。」仁等誦此詩句，應爲朽人慶幸，何須爲之憂慮耶。明年正二月，倘時事安靖，朽人或往他處。大約今年即在廈門過冬也。克定師已圓寂。傳貫師前返安海省親，朽人勸其決定於明年再來廈門。因朽人現居萬石巖，由小和尚照應一切，甚爲周到，學律諸師亦爲輔助，諸事無慮。乞仁等安心，俟明春再酌定一切。倘能早爲壯烈之犧牲，則更不須顧慮及此矣。不宜梵網不入難處，乃是常途。別有開緣，未可一致論也。十月十五日。漁音啓。此函乞交與高文顯閱之。高居士前居承天寺，未知今在何處，乞轉詢。其四十

## 與弘傘法師

傘師慈鑒。惠書敬悉。去冬本有撰述歌譜之願，乃今春以來，老病纏綿，身心衰弱，手顫眼花，臂痛不易舉，日恆思眠，有如八九十老翁，故此事只可從緩。承惠日書三冊，其中讚歌二冊敬受，且俟他年恢復康健時，當試爲之。薄伽梵歌，無有需用，謹寄返。又新刻華嚴經傳記一冊，校勘表四分，並奉上，乞收入。重編華嚴疏鈔已由徐蔚如著手，計科文十卷，先刊經疏百二十卷。疏鈔別行。鈔九十卷，經科數卷，專由疏中摘出刊經之科，別行疏二卷。即行願末卷去鈔存疏。新編之書，以清涼一人之撰述爲限。刊資久已集就，此事決

定可以實行。仁者聞之，當甚讚喜。音近來備受痛苦，而道念亦因之增進。佛稱八苦爲八師，誠確論也。不久擬閉關用功，謝絕一切緣務。以後如有縉素諸友詢問音之近況者，乞以「雖存若歿」四字答之，不再通信及晤面矣。音近數年來頗致力於華嚴疏鈔，此書法法具足，如一部佛學大辭典。若能精研此書，於各宗奧義皆能通達。凡小乘論律三論法相天台禪淨土等，無不具足。仁者暇時，幸悉心而玩索焉。謹復，順頌法安。音和南。四月廿八日。徐居士說讀華嚴經法，讀唐譯至五十九卷離世間品畢，應接讀貞元譯行願品四十卷，共九十九卷。應日誦者爲淨行品，問明品，賢首品，初發心功德品，如來出現品，及行願品末卷又十行品十迴向初十之二章。又及。

### 與妙蓮法師 五通

妙蓮法師慧鑒。傳貫師來，談及仁者將移居他處，彼等至用慚惶。竊念仁者居承天福林諸寺，一切縉素皆受仁者之感化，愛念仰望如慈父母。南門外寺院林立，尤希望仁者與彼等僧衆時時接近，隨緣教化。則閩南他日僧英濟濟，法化昌明，悉出仁者之厚賜也。千乞仍住福林寺，不可他往。傳貫師與朽人相交多年，忠厚誠實，堪稱善友也。謹陳，不宜。十月五日。音啓。朽人數日後，即掩室辭謝晤談及通信。草草奉陳，言不盡意。其一

惠書，誦悉。仁者所說甚是，與西藏僧衆之說暗合，小乘律中亦許著革履也。但不用亦無妨，楞嚴經中有禁用之文。若爲牛念佛迴向，彼亦可得功德，固不限定著用也。妙蓮法師玄鑒音上其二

妙蓮法師智覽。茲奉上謝居士受歸戒文一紙，又直幅聯對，并乞轉寄與海量居士。附告云，請謝居士先誦此文，自誓受。將來朽人至滬時，再正式受可耳。受前，宜先懺悔，誦我昔所造等一偈三遍。朽人不久即往惠安。近日事繁神昏，乞仁者俟將來朽人自惠安返泉州時，精神安定，再惠臨研討戒義，爲宜。謹達，不宣。音啓。其三

妙蓮法師慧覽。惠書，誦悉。仁者住處，可以隨宜變動。買紙之事，乞停止。前交與仁者之款，乞暫存尊處可也。謹復，不宣。冬至晨。音啓。其四

妙蓮傳貫。法師同鑒。茲屬妙齋師到福林寺，親近仁等。務乞推愛，照拂一切。並乞時加箴誨，盡力扶持。俾彼可以道心增長，勇猛精進。當來可爲佛門棟梁，作閩南砥柱。悉出仁等之厚賜也。務乞盡情教導，直言勸誡，萬勿客氣，至用感禱。謹此拜懇，不宣。正月廿一日。音啓。其五

## 與傳貫法師 八通

傳貫法師道鑒。此次承遠來問候，茲念一切，至用感謝。一食爲對治惡習，禁語爲減少雜事。至於求早生



西方，乃是宿願，未敢忘懷也。往福林寺，尚須延緩，因緣尚未成熟也。笨女居士所施十金，乞存仁者之處。俟當來往福林時，可以此作旅費。謙空二老人前，皆乞代爲問安致謝。謹陳，不宜。臘八日。音啓。仁者爲謙老人禮華嚴經，已開始否？惟有此事能報親恩。乞精勤禮敬，至禱。其一

傳貫法師道鑒。前上二片，想俱收到。在此講經，不久可畢。以後住處未定。世變日亟，惟求早生極樂耳。附一紙，乞託令師轉寄菲島，呈性願老法師。不宜。演音啓。其二

傳貫法師慧鑒。久未晤談，爲念。謙老人法體康健否？乞爲問安。空上人前惠賜茶葉，久已收到，便中乞代問安并致謝。朽人近來身體尚可支持，惟時有小疾耳。茲有懇者，前年廣洽師曾贈與仁者石印小冊法華經一部。近朽人擬讀此經，請仁者以此經轉施與朽人，至用感謝。郵費大約三角五分半。單掛號，汽車費在內。乞寄至永春蓬壺鄉普濟寺內善夢收。近已改名曰善夢，謹陳，不宜。善夢啓。立夏日。其三

傳貫法師慧覽。居惠安一月，諸事圓滿。昨夕已返泉州，住養老院中。謙老人前，乞代問安。諸居士等，乞爲致候。附二紙，乞轉交杜居士。謹陳，不宜。三月廿八日。音啓。其四

傳貫法師道席。惠書，誦悉。至用歡慰。世間之事，每於無意中而遇得之。可見人力謀畫，不足恃也。詞源居士現在衛生院救護會任職，彼甚關念仁者。便中，乞訪談。崑山紫巖，勝於乾山科山等處多多矣。朽人之意，亦可名爲大華嚴寺。乞與諸善友商之。附一紙，便中乞託尊師轉附寄菲島交高文顯，爲感。不宜。八月

十二日。演音啓。其五

傳貫法師道鑒。仁者及謙空二老人處，倘有不用之舊小衫袴，乞贈與妙齋師數件。又他人倘有舊夏布海青，雖破無妨，亦乞代妙齋募化一件，俾炎暑之時可以著此拜華嚴經也。費神至感。音啓。其六

仁者與本寺當家法師談話時，便中勸彼云，以後每日宜讀藥師經一卷，可以消災延壽。昔覺圓師體弱多病，自發心每日讀藥師經後，至今身體甚爲康健。云云。再者，近日仁者倘精神甚好，乞將朽人處之小鐘修理之。倘精神不佳者，遲緩無妨也。傳貫法師道鑒。音啓。其七

命終前，請在布帳外助念佛號。但亦不必常常念。命終後，勿動身體。鎖門歷八小時。八小時後，萬不可擦身體及洗面。即以隨身所著之衣，外裏破夾被捲好，送往樓後之山凹中。歷三日，有虎食則善。否則三日後即就地焚化。焚化後再通知他位，萬不可早通知。余之命終前後，諸事極爲簡單，必須依行。否則是逆子也。傳貫法師。演音啓。其八

與豐德律師 四通

豐德律師慧鑒。前函想已收到。聞鼓山有人乞仁者介紹來廈學律。案現在已有數人真實發心學習，故朽人擬於閉關後，二月擬來泉因事小住，閉關或稍延期。每星期二四六講含注戒本擇要講及羯磨，星期日

講菩薩戒本宗要。但日光巖不能住，凡學律者皆住廈門隨時渡海往聽可耳。上半年講否未定若不講者，先自預備，亦其忙也。舊病已漸愈，乞勿念不宜。義俊法師乞代致候。演音啓。正月廿一日。其一

豐德律師道席。送上昆尼作持一部，又奉贈華嚴音義二冊，新版四分表記二冊，鐸版印，後有目錄。律學要略四冊，錯字甚多，青年注意四冊。二月在養正院講。乞與念西法師分受之，並乞代爲致候。近由日本請購古版書籍甚多。行宗記會本濟緣記會本皆請到。此爲余十數年來求覓不可得者，今者因緣巧合，三大部會本悉已齊備，不勝慶忭。鼓山已來二位，克定師及某師住妙釋寺。謹陳不宜。演音啓。舊二月廿四日。其二

豐德法師道席。惠書誦悉。居日光別院半載，罕通音問。近至南陀，閉門思過，辭謝訪問。爾者仁開法師等發起屬講律儀，擬於明正講羯磨一部。仁者前寄來之稿，即可於其時校閱也。來書所云自利利他，且約一往而言。若委論之，獨居誦經念佛，以此功德迴向衆生，豈非利他。若出外弘法，而自獲福德，豈非自利耶。謹復不宜。十二月十九日。演音啓。其三

豐德勝士道席。明信誦悉。近來精力漸減者，實因正月間內症已愈，胃口大開，故精力驟增。近則胃口漸漸如常，故精力亦衰。性願老法師嘗謂，此次大病，約需二年乃可復元也。下月即擬掩關靜養，外症初破時，一約明信片一個半大，一約近一個明信片，皆血肉狼藉無有皮膚。近則後者已愈。前者僅餘寸許，大約至多再遲半月即可收口。醫士謂，黃博士泉州人，計需實費近百金，彼決不肯收費分文。其人品至高。此次醫治



雖歷時三個月，實甚順遂。因已好者未曾復爛，是爲幸事。實由仁者等爲之誦經懺悔，乃獲安穩痊愈，起死回生也。仁者俗兄陳居士前曾來談，猶憶去年歸依時，致送資幣。其數幾圓，余已忘記。擬以此資當來印經。仁者如尙記憶，乞便中示知。并法名一。義俊法師乞代致候。念西集一冊附奉上。前來函已收到。乞代告云，郵局定例，凡印刷品，可以用開口信封，以鐵絲束口，貼郵票一分。若信件，須郵票五分。倘內裝信箋，作印刷品寄者，收信之人應罰大洋四角五分。數年前，余曾被罰一次，實無辜而被罰。寫信之人，若已受戒而得戒者，亦犯偷稅之罪也。已滿五，應結重。謹陳，不宜演音疏。閏月廿一日。附奉上永春佛手種茶二瓶，乞受收。其四

## 與念西豐德律師

念西豐德律師鑒。惠書敬悉。承誦華嚴法典，感謝無盡。此次大病，實由宿業所致。初起時，內外症併發，內發大熱，外發極速之疔毒，僅一日許，下臂已潰壞十之五六，盡是膿血。如承天寺山門前，乞丐之手足無異。然又發展至上臂，漸次潰壞，勢殆不可止。不數日，脚面上又生極大之衝天疔。足腿盡腫，勢更凶惡。觀者皆爲寒心。因此二症，若有一種，即可喪失性命。何況併發，又何況兼發大熱，神志昏迷。故其中數日已有危險之狀。朽人亦放下一切，專意求生西方。乃於是時忽有友人等發心爲朽人誦經懺悔，至誠禮誦，晝夜精

勤。並勸請他處友人，亦爲朽人誦經。如是以極誠懇之心，誦經數日，遂得大大之靈感。竟能起死回生，化險爲夷。臂上已不發展。脚上瘡口不破，由旁邊足指縫流膿水一大碗餘。至今飲食如常，臂上雖未痊愈，脚瘡僅有少許腫處，可以免強步行。實爲大幸。二三日後，擬往廈門請外科醫療治臂患，令其速愈。愈後，擬到泉州小住數日。或往惠安住數日。再返廈門，即在日光巖閉關。今日因葉居士來，匆匆寫此奉聞。餘俟面談。此信中恐有錯誤之字，因匆忙故，乞諒之。順頌道安。演音敬啓。

## 與仁開法師

仁開法師道鑒。前承過談，惠施多品，感謝無盡。荷施十金，擬以請購日本古版佛書，而爲永久紀念也。承示諸事，朽人已詳細思審，至爲慚惶。朽人初出家時，常讀靈峯諸書，於「不可輕舉妄動，貽羞法門，」「人之患在好爲人師」此語出孟子，宗論引用。等語，服膺不忘。豈料此次到南閩後，遂爾失足。妄踞師位，自命知律。輕評時弊，專說人非。大言不慚，罔知自省。去冬大病，實爲良藥。但病後精力乍盛，又復妄想冒充善智識。卒以障緣重重，遂即中至。至古浪後，境緣愈困，煩惱愈增。因以種種方便，努力對治。幸承三寶慈力加被，終獲安穩。但經此風霜磨鍊，遂得天良發現，生大慚愧。追念往非，噬臍無及。決定先將「老法師，法師，大師，律師，」等諸尊號，一概取銷。以後誓不敢作冒牌交易。且退而修德，閉門思過。并擬將南山三

大部重標點一次，誓以駑力隨分研習。倘天假之年，成就此願。數載之後，或以一得之愚，卑陋下座，與仁等其相商榷也。前承仁等所示諸事，今非其時，願俟畢日。諸希亮察爲幸。謹陳，不宜。此書本擬請傳貫師賡奉。適今日有使人，託其帶奉。朽人當來居處，無有定所。猶如落葉，一任業風飄泊可耳。

## 與律華法師

律華法師澄覽。朽人與仁者多生有緣，故能長久同住。彼此均獲利益。朽人對仁者之善根道念，十分欽佩。朽人撫心自問，實萬分不及其一。故朽人與仁者，長久同住，能自獲甚大之利益也。妙蓮法師行持精勤，悲願深切，爲當代僧衆中所罕見者。且如朽人心中敬彼如奉師長。但朽人在世之時，畏他人嫉妒，疑議，不敢明言。今朽人已西歸矣，心中尚有懸念者，以仁者年齡太幼，若非親近老誠有德之善知識，恐致退惰，故敢竭其愚誠，殷勤請於仁者，乞自今以後，與妙蓮法師同住，且發盡形承侍之心，奉之如師，自稱弟子。並乞彼時賜教誨，雖受惡辣之鉗錘，亦應如飲甘露，萬勿捨棄。至囑，至囑。音啓。

## 與芝峯法師

五通

芝法師座下。頃奉惠書，並大著，歡喜無量。大著深契鄙意，佩仰萬分。將來流布之後，必可令多數學子同



植菩提之因，仁者法施功德，寧有既耶。前日聞仁者與醒法師有往蘇州之意，鄙見以爲未妥。倘仁者不欲居廈門，則乞移錫金仙。又靜公近擬接受杭州招賢寺，倘能成就，則仁者住居招賢甚爲適宜。末學與仁者神交以來，垂十年矣。竊念當今之世，如仁者英年績學者，誠爲希有。若再深入教海，旁及世俗之學識，如是致力十數年，所造必可在虛大師之上。當仁不讓，願仁者努力爲之。日本學者著作雖條理可觀，然於佛學所造甚爲淺薄。仁者將來學業成就，所有著作，必能令日人五體投地，萬分佩仰。且可譯爲西方文學，傳播歐美，可爲世界第一大導師，則將來受仁者法施之惠者，豈僅中華已耶。末學敬勸仁者，今後無論居住何處，總宜專力於學問及撰述之業。至若作方丈和尚等之職務，願仁者立誓終身決不爲之。因現代出家人中，能任方丈和尚等職務者，甚多甚多。而優於學問，能繼續虛大師弘宣大法，以著述傳布日本乃至歐美者，以末學所知所最信仰者，當以仁者爲第一人矣。末學於仁者欽佩既深，故敢掬誠奉勸。雜陳蕪辭，幸垂省覽。音啓。其一

芝峯法師座下。惠書敬悉。此次講律，聽衆甚盛。寄住寺中者六七十人，皆自己發心過午不食。內有二人，患肺病甚劇。又有一人正在嘔血不止，臥牀不起之時，而立刻停止晚餐，不顧身命，尤令人感佩。現已講羯磨，若欲深造，非有三五年之工夫專心研習不可。聽衆中有二三人誓願甚堅固，或可發心專修也。近來終日忙碌，凡寫字作文等事，皆悉從緩。草此奉復，順頌禪安。演音和南。三月三日。其二

芝峯法師慈鑒。久別，甚念。音今春以來，疾病纏綿，至今猶未復元。故掩室之事，不得不暫從緩。前日到金仙寺訪幻法師，藉聞座下近況，至用欣慰。音因劉質平居士諄諄勸請，爲撰清涼歌集第一輯。歌詞五首，附錄奉上。乞教正。歌詞文義深奧，非常人所能了解。須撰淺顯之註解，詳解其義。音多病，精神衰頹，萬難執筆構思。且白話文字，亦非音之所長，擬奉懇座下慈愍，爲音代撰歌詞註釋，至用感禱。茲略陳拙意如下，未審當否。謹錄之，以備參考。此歌爲初中二年以上乃至專科學生所用。彼等罕有素信佛法者，乞準此程度，用白話文撰極淺顯之註釋，併令此等學生閱之，可以一目了然。註釋中或有不得已而用佛學專門名詞者，亦乞再以小註解之。註釋之法，以拙意懸擬，每首宜先釋題目，後釋歌詞。釋題目中，先述題目之大意，後釋題目之字義。釋歌詞中，先述全首歌詞之大意，次略爲分科，後乃解歌詞之字義也。虛大師所撰之三歸依歌，亦乞撰註釋，並曲譜寄下，以便宣佈。至爲感謝。謹此懇請，順叩法安。演音和南。九月四日。其三。

惠書敬悉。承諾代撰釋文，感謝無盡。居金仙已兩旬餘，承亦幻和尚優遇甚至。自惟德薄能鮮，時用慚悚耳。授華雲師習字已半月，頗有進步。亦嘗與密庵師晤談，彼近閱禪宗語錄，鄙意勸彼應先於法相三論痛下一番工夫，然後再閱禪安之書，乃爲穩妥。未審尊見以爲何如。末學近擬讀大般若經。曩承虛大師諄諄慈訓，深爲感荷。他日通信之時，乞代爲問安。又侍者陳人蓮居士處，亦希致候。謹復，順頌慈安。音和

南。九月廿五日。其四。

芝峯  
慧律

法師全鑒。惠書欣悉。一。甚願即往金仙與仁等晤談。但衰老之軀。頗畏舟車之苦。近來手足無力。恐

有風症之象。且手足時常麻木。故不敢行。又不久天氣即寒。更非老軀所能堪忍。故仍擬暫居泉州。稍遲即移

居山中靜養也。當來若返浙時。必趨候法座。但一時恐未能如願。至用悵然。來函所云邇來遭遇等。似出傳聞之訛。因近來諸事平靜。無有變動。前月開元火災。亦未受擾亂也。大醒寄塵諸法師。已往汕頭。順頌法安。演音和南。八月五日。其五。

## 與慧律法師

慧律法師道鑒。惠書具悉。一。至用欣慰。現已在此講南山律。何時能止。尙未能定。倘至外江時。必來金仙奉訪座下也。芝峯法師已往武昌。舊友雲散。今唯有寄塵法師一人在南普陀耳。音近多忙。不似前居金仙時之清閒。草此奉復。順頌法安。演音和南。二月十七日。

## 與如影法師 三通

如影法師慧鑒。擬請仁者每日讀誦普賢行願品。以此功德。迴向衆生。同消業障。齊成佛道。即是仁者出



家之日。每日必須發願生西，了生脫死，常住快樂。又云上求佛道，下化衆生。是日持誦普賢行願品三卷。周年當爲仁者書寫普賢行願品偈頌一卷，以爲紀念守持。庚辰年。晚晴老人弘一敬述。其一

如影淡食智鑒。仁者發心食淡多年。刺血寫經，勝願隆德，至爲希有。不惜身命，爲法捨身，將來必成人天所尊也。此請仁者仍繼續持誦普賢行願品，可以消災除難。又食淡之事，亦可如常而持，不得違背，道業可能精進勿退也。此請德安沙門演音敬上。其二

如影妙扶二法師全鑒。茲有妙蓮師擬往普濟寺，苦於不識路程。乞二位法師中，有一位枉駕至泉州，陪伴妙蓮師同往普濟寺，至用感禱。再者，朽人擬託仁等代購紙張，帶至泉州。另紙詳陳，乞慧督種種費神，感激無盡。妙慧法師奉若居士本寺諸法師，均乞代爲致候。弘一啓。其三

## 與妙慧法師 二通

妙慧法師道鑒。茲介紹妙蓮師至尊寺居住。彼爲圓英老法師之徒孫。道念堅固，悲心深切。爲余所最景仰欽敬者。彼到尊寺後，乞仁者格外愛護，照拂一切。凡寺中早晚課誦等，皆乞仁者囑彼無須隨衆。可以閉方便關，一心用功。諸承費神，感謝無盡。順頌法喜音啓。林居士乞代致候。再者，又介紹壽山師同來。乞仁者愛護照拂一切，至感音又白。其一

妙慧法師鑒。茲擬做大漚水囊一件。茲送上竹圈一個，即以白布縫於此上。此竹圈係林居士物。乞代告知，即以此贈與余，爲感。送上洋一圓，乞代購白布，以能漚水，而小蟲不得出者，爲宜。費神，至感。音啓。其二

## 與廣心法師等

廣心法師勝良勝慈勝華居士仝鑒。屢奉惠書，敬悉一一。盛意殷誠，感謝無盡。自昨日始見客，稍遲，擬移居近處，仍閉關謝客靜養。年來衰老益甚，精神恍惚，未能勝長途舟車之勞。往漳之約，只可延緩。失禮之罪，諸乞鑒諒，爲禱。順頌法安。演音敬上。卅一年七月廿四日。

## 與廣洽法師

廣洽法師慧覽。變亂後，久不通訊，甚念拙書藥師經，前七年曾以贈與仁者，存貯日光巖木箱中。去年曾聞已借與聶居士影印。近因覺圓師擬建大藥師寺，擬請仁者以此經轉施與大藥師寺，至爲適宜。謹陳不宜。壬午三月卅日。音啓

## 與東華法師 三通

東華法師道席承惠寄石章已收到。感謝無盡。拙書一紙附奉上。謹復。不宜。十月八日音啓。今編藥師經析疑一厚冊。前年在承天寺講藥師經時。他人所記之稿。余未閱過。不可登入報中。其一東華法師慧鑒。惠書誦悉。每日誦經數卷。餘暇則持名或持呪。能勿間斷。爲善執務。陪客行路等時。亦應持念。明年何時來泉。未能預定。須視身體精神如何。屆時由傳貫師預以函達。略復。不宜。十一月廿八日音啓。其二

東海法師慧鑒。領請藥師經析疑寫稿。不預定日期。俟候通知。以後有送紙來者。不收。有由郵局寄名款來者。不寫。必須託專人送名款至荊林。守候領取者。乃可書寫。倘有特別之件。必須用宣紙寫者。由余贈送。有送來者決定不收。辛巳十二月二十二日。弘一。其三

## 與妙齋法師二通

妙齋律華法師澄覽。朽人與仁者多生有緣。故能久長同住。彼此均獲利益。朽人對於仁者之善根道念。十分欽佩。朽人撫心自問。實萬分不及其一。故朽人與仁者長久同住。能自獲甚大之利益也。妙蓮法師行持精勤。悲願深切。爲當代僧衆中所罕見者。且如朽人心中敬彼。如奉師長。但朽人在世之時。畏他人嫉妒。疑議。不敢明言。今朽人已西歸矣。心中尚有懸念者。以仁者年齡太幼。若非親近老成有德之善知識。恐



致退情。故敢竭其愚誠，殷勤勸請於仁者。乞自今以後，與妙蓮法師同住，且發盡形承侍之誓。奉之如師，自稱弟子。並乞彼時施教。雖受惡辣之箠捶，亦應如飲甘露，萬勿捨離。至囑，至囑。演音弘一敬白。其一先念南無阿彌陀佛十句。手持供水及米粒，至出生臺前。念云：以此供水及米粒，施與一切神鬼等衆。惟願是諸神鬼等衆，早得人身，消除業障，往生極樂世界，速證無上菩提。並願以此施食功德，普施有情，齊成佛道。又念：四生登於寶地等四句。又念南無阿彌陀佛十句。畢。妙齋法師鑒：仁者施食，可依此行也。音啓。其二

### 與曇昕法師 三通

曇昕法師澄覽。前承枉談，至爲歡慰。附奉上屏條四紙，敬贈仁者。此爲特別寫件，乞勿示人。又直幅單款者二紙，乞轉贈道公壽慶。朽人未能趨禮。茲託龔天發代表，隨喜盛會。護生畫集，乞交彼帶下。種種費神，感謝無盡。農曆十一月十九日。音啓。其一

曇昕法師道鑒。前荷招待一切，感謝無盡。此次朽人至惠安，當地縉素靡費金錢至巨。不得不居住數月，以答其厚情。前存百源庵之行李三件，乞便中託人送下至感。謹陳，不宣。二月二十九日。音啓。其二

曇昕法師道鑒。惠書誦悉。承寄各件收到，感謝無盡。書幅附奉上行。證擬從緩。不久時事或可平定也。仁

者近來行持如何，時以爲念。常閱高僧傳否。誦經念佛日益精進否。仁者系出名門，幼受教育。應自尊自重，冀爲佛門龍象。以挽回衰頹之法運，扶持顛覆之象。薄益大師寄澈因比丘書云，吾望公甚高，勿自卑等。又云，所有不絕如綫之一脈，僅寄足下，萬萬珍重愛護，養德充學，以克荷之。余於仁者，亦云然矣。寒筮集，甚能警策身心，乞常閱之。不宜音啓。其三

## 與覺徹法師

三通

久未晤談，甚念。弟於廈門變亂前四天，已到漳州講經，故倖免於難。覺圓法師乞爲致候。前寄至妙釋寺之信已轉到。性常法師現住草庵，彼寄來之信亦收到，乞便中代達。弟現住鄉間，通訊，乞寄漳州東門浦頭祈保亭轉交。順頌法安。弟弘一頂禮。五月十一日。其一

在漳弘法諸事，已漸完畢。倘時局平靖，不久即返泉州。擬先到尊寺，暫住數日。性常師與偕往也。謹達，順請法安。弟弘一和南。九月五日。其二

於二十日，已到安海。因弟之瑣事甚多，性常師患眼病，故一時未能返泉。倘惠安傳貫師有信寄至尊寺者，乞費神轉寄至「安海水心亭弘一收」。至感。順頌法安。弟弘一和南。九月二十三日。其三

## 與覺圓法師八通

承轉寄佛學書局兩函，已收到，感謝無盡。據書局來函，謂有梵文普賢行願品十包，寄至尊寺。如寄到時，乞代收藏存貯，不可轉寄。因余稍緩或返泉州，候此處弘法之事略有根基，即可酌定他往之期也。謹復，不宜。演音啓。覺徹法師乞代致候。其一

三書具悉。一一。諸承費神，至用感謝。前存之草包箱、竹籠、經包、紙包、綿被等物，有雨水沖入，乞一一打開箱看，並在日光中曝曬，爲禱。藥師講稿，想現在不能付印，故擬緩緩奉上。前由性常師代復一函，想已收到。謹達，不宜。四月十九日。音啓。其二

惠書誦悉。諸承費神，感謝無盡。講稿擬於下月十五日以前交郵局掛號寄上。余近來身體尚健。余之物件，乞送至百源庵，託覺徹法師收存，併乞代爲問安。五月廿五日。音啓。此講稿擬多印。至少兩千冊，能至四五千冊尤善。講稿頁數，與前所印者大致相同。乞預籌備印費。稿中所載者，爲藥師如來法門之供養禮敬誦經持名持呪等方法，最爲切要，須廣爲流通也。附白。其三

覺圓法師慧鑒。茲寄上講稿，乞收入。其中〈記號〉，即是空一字。校對之時，乞十分注意。己字與已字不同，又圈點，亦乞詳校之。此書與安海法音錄大致相同，乞帶與彼閱之。仁者於七月十五日後往何處，其通



訊地址乞預示知。余之箱物，乞存於百源菴。仁者離承天寺時，乞囑託可靠之人，代余收信件。至禱，不宣。  
六月初十日。音啓。其四

覺圓法師道席。惠書，誦悉。講錄封面，即寫藥師法會可也。茲有二事奉託如下：（一）余之特別通行證，已滿期。乞向師部換取新者。乞訪蔣百齊參議室主任，或張參謀長，皆可。又有郁達夫居士致錢東亮師長之介紹書，亦乞交去。（二）前送寄百源庵之大柳條箱，俗稱爲草包，中有清涼歌集一小包。乞檢出四冊，交郵局掛號寄下。特別通行證如可換得，亦乞一併寄下。否則先將清涼歌集寄下，爲感。曾順居士仍在泉州否？仁者晤時乞爲致候。六月廿二日。音啓。其五

覺圓法師慧鑒。茲擬借閱藥師經晉譯、隋譯、唐義淨譯三種。藥師經各種註解，唯纂解不借，此外皆乞交下。朽人已著手編輯藥師經析疑，年內可以編就，明春抄寫。弘一敬上。其六

敬借閱智燈疏一冊，疏鈔擇要一冊，直解一冊，古疏一冊，講記一冊，旁解一冊，共六冊。其餘十九冊奉還。朽人舊藏古版纂解及義疏兩部已受收。種種費神，感謝無盡。覺圓法師道鑒。音啓。二月十六日。其七

覺圓法師全覽。以後泉州諸公屬寫字者，皆暫辭謝，未能收受。乞云：俟將來居住泉州弘法之時，非關閉用功之時，決定一概收受書寫。現在往他處弘法或用功，故於泉州之寫件須暫辭謝，並乞云：種種失禮之處，請格外原諒，爲禱。音上。正月廿五日。其八

印贈者：蓮

因

寺

南投縣水里鄉頂坎村圳頭巷15之1號

中華民國八十二年正月月中旬恭印

## 弘一大師書簡





